

مَسْكَنَاتٌ بَعْدَ مُنْتَصَفِ اللَّيْلِ

الطبعة الأولى

١٤٤٤هـ - ٢٠٢٣م

اسم الكتاب:	مُسكّنات بعد مُنتصف اللَّيل
اسم المؤلف:	أحمد طارق التوني
التدقيق اللغوي:	شهد محمد
تصميم الغلاف:	محمد درباله
الإخراج الداخلي:	خالد محمود
رقم الإيداع:	٢٠٢٢ / ٢٣٩١١
الترقيم الدولي:	٩٧٨-٩٧٧-٨٦٣٧٢-٥-٠



ش - حسن خطاب - قسم يوسف بيك - الزقازيق - الشرقية



01020439639



massar.pub1@gmail.com



مسار
للنشر والتوزيع
Massar Publishing & Distribution

جميع الحقوق محفوظة، ولا يسمح بإعادة إصدار هذا الكتاب، أو أي جزء منه، ورقياً أو إلكترونياً، سواء بشكل كامل أو جزئي أو عرضه مجاناً عبر أي وسيلة وبأي شكل من الأشكال من دون الحصول على تصريح خطي من دار مسار للنشر.

مُسكَنَات بَعْد مُنْتَصَف الَّيْلِ

أحمد طارق التوني



إهداء

إلى أول من غادر منزلنا، وترك الحُزن والبؤس يملُكنا،
لقد غادرت وتركتني أهدي إليك كتاباتي، لقد أهديتك
جميع إنجازاتي السابقة، أعدك بأنني سأقوم بإهداءك
الكتب القادمة، إلى أن أصل لآخر كتاب في مسيرتي
الأدبية، لتكون أنت الشخص الأول في كل شيء يصدر
مني ومن قلمي، رحمة الله عليك يا أبي.

إلى الذين ظنوا بأن المسكّنات تصلح لمرضى الجسد فقط..
عذراً، فـ المسكّنات الورقية المليئة بالقصص التشويقية
جاءت لتنقذ تلف أذهانكم، هذه المسكّنات أهديتها لكم
جميعاً، لتمتلي دمائكم بالجرعات الممزوجة بالهلع!

مقدمة

تتوافر حالياً العديد من الأدوية المُسكّنة، منها على سبيل المثال ما هو لتسكين الصداع، أو آلام العضلات، أو آلام المفاصل، ومع وجود خيارات عديدة من الأدوية المُسكّنة، فإن أنواعاً معينة من الألم تستجيب لأدوية محددة أكثر من الأخرى.

ولذا، فمن المهم اختيار الكتاب الصحيح والفعال لعلاج الألم الذي تعاني منه. وبالطبع فإن لكل دواء إيجابياته وسلبياته، كذلك الكتاب، إلا أن هناك خبير متخصص سيساعدك على اختيار جرعة "الرعب" الأكثر فعالية لحالتك بالتحديد. هذا الكتاب لجميع الذين يعانون من الخوف، الهلع، الرعب، الفزع، الهذيان، الهوس .. فما علاجهم؟

أبشرك، لقد امتزج مفعول المُسكّنات بدمي وأصبح جزءاً مني، حيث تم اكتشاف مُسكّن قويّ لآلام الخوف والهلع يُغني عن حبوب النوم، لذلك فأنا قُمت بتقديم هذا المُسكّن إليك الآن، فهو يحتوي على أربع جرعات مختلفة، كلما تخطيت جرعة، ترى الجرعة الأخرى في انتظارك، ولتكن أكثر رعباً وغموضاً عن الجرعة السابقة، لذلك فإن جميع الجرعات المذكورة في الكتاب سوف يتم تناوؤها بعد منتصف الليل، في توقيت الخوف وعدم الاطمئنان، حينما تشعر بالهلع إقرأ هذا الكتاب، عندما تكون خائفاً أو تشعر بالملل إقرأ هذا الكتاب، فهو قادر على تغيير حالتك النفسية بنسبة مائة بالمائة ..

والآن .. سوف اتركك لتأخذ الجرعة الأولى.

نُتُوهِ:

إن قراءة عدد كبير من الجرعات في آن واحد قد تتسبب بآثار جانبية دماغية أو قلبية وعائية، فيما قد تؤدي التساؤلات والتفكير بعمق إلى تخريش المخ في موضع سيء، مما يؤدي إلى الوفاة.

ولذا يجب استشارة الكاتب قبل ظهور هذه الآثار، في حال قراءة المُسكِّنات لمدة طويلة أو في حال وجود خلل صحي، وإن كان معظم الأشخاص يستطيعون قراءتها دون أية مشاكل.

"الجرعة الأولى"

يمكن أن تؤدي قراءة هذه الجرعة إلى إعاقة الوظيفة الإدراكية
للأشخاص المصابين بالخوف الهستيرى والذين يكونون أيضاً أكثر
حساسية للآثار الجانبية للرعب.
(وجب التنويه).

"الخادمة الملعونة"

في السعودية .. تحديداً في منطقة تبوك، من حوالي ٧ سنين ظهرت جريمة هزّت العالم، والشرق الأوسط كله سمع عنها، والصُّحف المصرية نقلتها لنا وانتشرت في كل حنة .. والحادثة كانت بتتكلم عن راجل أربعيني أرمل قام بأغتصاب خادمة عليها عشيرة من الجن.

كان يُقال أنه عايش في بيت كبير مع أولاده اللي أعماهم بتتراوح ما بين ١٠ سنين و١٧ سنة، زوجته كانت مريضة كانسر وتوفت من فترة مش كبيرة، وأصبح عايش في البيت مع أولاده، مع صعوبة الاعتناء بالأولاد والنضافة والبيت اضطر إنه يجيب خادمة تهتم بالأولاد وبالبيت وبه هو شخصياً، والأمور كانت ماشية طبيعية زي أي بيت فيه خادمة، بس الخادمة دي كانت شايلة جواها أسرار كثير جداً، البيت كله كان فيه كاميرات مراقبة، والكاميرا اللي في أوضتها كانت جاية إنها على طول صاحية مابتنامش، حتى بعد تنظيف البيت كله وبتيجي آخر الليل تفضل صاحية في أوضتها وقاعدة زي التمثال مبتتحركش ولا بتعمل أي حاجة، الموضوع سبب فضول للزوج ولو سألتني هو حاطط كاميرة مراقبة في غرفتها ليه؟ هقولك عشان دة راجل أربعيني

أرمل ومحروم من الحياة الزوجية، لكن في كل الأحوال دة مش مبرر أنه يعمل كدة ويصوّر ها وهي في غرفتها، الموضوع اتطوّر وعينه بقت مبتزلش من عليها، تقدر تقول إنها عجبتة ودخلت دماغه، وفي يوم قرر إنه يتكلم معاها ويفاتحها بموضوع الزواج، لكنها أول ما سمعت منه كدة اتجننت وزعقتله بصوت خشن وقالتله "إياك اسمعك بتقول كدة تاني"، هو اترعب من نبرة صوتها اللي اتغيّرت فجأة لكن ما زالت نظرته ليها حاضرة، وفضل كاتم جوة نفسه ويتفرج عليها وهي بتمسح أو وهي بتاكل، دة وصل بيه الحال إنه يتفرج عليها وهي في الحمام من فتحة الباب!!

الأولاد مشغولين بالدراسة والسفر وكل اللي في دماغهم إن الأب بيرجع من شغله بيقضي يومه في البيت طبعي، لكن هو دماغه كانت مسحولة بيها وبجهاها، كان يقول انها أجمل من مراته، وكان بيكتب جوابات غرامية بس بيخاف يديها للخدمة، وفاة زوجته وعدم قبول الخدمة بالزواج منه وكمان مشاكل شغله كل دة كان مسبيله حياة تعيسة بدون شغف ولا استمرارية، اتجه للمخدرات والكحول لفترة طويلة وكان ساعات بيتحرش بالخدمة وهو سكران لكنها بتقدر تصدّه وتبعده عنها، وبالرغم من إنه وزنه ثقيل وضخم إلا إنها كانت بتعرف تسيطر عليه، وكانت بتراعي شعوره ووحدته اللي عايش فيها..

أما الخادمة فـ كانت بتعمل طقوس غريبة في البيت دة طول اليوم، زي مثلاً تقوم بالليل تتجول في حديقة البيت وهي مغمضة عينيها!!

أو تقعد في الحمام لفترة طويلة ممكن توصل لـ ٦ ساعات متواصل، ريححتها كانت دايمًا غريبة، وتشبه ريحة البخور القديم، غرفتها كانت مليانة ورق أبيض مكتوب فيه كلام مش مفهوم بخط إيديها، وبعد مرور أكثر من ٣ شهور وبعد ما بقت حافظة البيت بكل تفاصيله قررت إنها تمشي من البيت وتسبب شغلها، ولما كلمت الراجل وقالتله كدة كانت صدمة العمر بالنسبale، لأن الجمال دة مينفعش يمشي من البيت وقالها إنه هيوفرها كل اللي تطلبه، وكمان هيزودها ٣ أضعاف المرتب اللي بيديهولها، وحاول يتوسل إليها أكثر من مرة وقالتله تمام أنا معاك، فرح جداً ساعتها وكان عايز يعمل حفلة، المهم هو حس إن وجودها في البيت مش مضمون وإنه ممكن يصحى من النوم ميلاقيهاش، خصوصاً إنه اتعود على وجودها في البيت وعلى اهتمامها بيه، بصرف النظر عن الطقوس المريبة اللي كانت بتعملها..

وفي ليلة من ليالي الشتاء في وقت متأخر قام من سريره على صوت صرير جامد في البيت، واللي كان مصدره هو غرفة الخادمة، وكان مرعوب يروح غرفتها لأن الصوت كان بشع جداً جداً ومحدث

يستحمله، المهم فتح شاشة الكاميرات وجاب كاميرة غرفتها، واتصدم من المنظر الي شافه .. شافها وهي واقفة قدام الكاميرا بالظبط وملاحها متغيرة وبشعة جداً، وبتصرخ بقوة وتبعد وتقرّب للكاميرا بشكل مُرعب جداً، هو كان خايف عليها جداً بس الصدمة الكبيرة إنه لما راح لحد غرفتها وفتح الباب عليها لقها نايمة في سريرها في وضع سكون تام والدنيا هدوء ومفيش أي حاجة، ولما رجع تاني للشاشة وفتح الكاميرا لقها نايمة فعلاً ومفيش حاجة، ساعتها كان شبه سكران زي ما بيقول والشیطان لعب في دماغه وخلاه يرجع لغرفتها تاني وقرر إنه مش هيعدي الليلة دي غير لما يتلذذ بيها، سواء برضاها أو غصب عنها، وبالفعل راح غرفتها للمرة الثانية وفتح باب الأوضة وفضل باصص عليها وهي نايمة ونظراته كلها شهوة ليها، وبعدين دخل الأوضة وقفل الباب وراه بالمفتاح، وراح ناحية سريرها وقلع الهدوم الي كان لابسها وكَتَفَها بيهم، وأول ما بدأت تفوق هي راح كاتم بوقها، وقضى الليلة دي كلها وهو في أوضتها، وخرج منها الساعة ٧ الصبح بعد ما أخذ غرضه منها وعمل الي في دماغه والي شيطانه قاله عليه، الخادمة مقدرتش تكمل يوم تاني في البيت دة وقررت إنها تمشي من غير ما تاخذ حسابها حتى بتاع الشغل، ولما مشيت من البيت راحت قسم الشرطة وقررت إنها ترفع عليه قضية "هتك شرف" وبالفعل تم استدعاءه للقسم وعملوا مواجهة بين الخادمة والراجل دة وحكا لهم كل الي حصل بالتفصيل، أما الخادمة والتصرفات الغريبة الي عملتها، ف اتضح مؤخراً إن عليها

عشيرة كاملة من الجن، والراجل قال إن أثناء الأغتصاب كان يسمع صوت صريخ راجل نابع من جواها، ومش راجل واحد بس دة كأن فيه خناقة رجالة شغالة بصوت عالي جداً ومرعب، لدرجة إنه مكنش عارف يفرّق هل دة بسبب إنه سكران ولا هي جواها جن فعلاً، لكن بعد اعترافاتها دي هو أتأكد إنها ممسوسة، بدليل كل الطقوس الغريبة اللي كانت بتعملها في البيت، وقتها هو حسّ بالندم وكان بيتمنى إن الزمن يرجع بيه تاني عشان ميغلطش الغلطة دي ويحافظ على بيته وأولاده وبس، وأثناء المحاكمة اتحكم عليه بالسجن المؤبد لكن وهو في السجن كانت بتجيله نوبات صرع وحاجات غريبة بتحصله، واللي فسّروا الكلام دة قالوا إنه بسبب الجن اللي كان على الخادمة، لحد ما نقلوه لمصحّة نفسية داخل السجن، وأصبحت حياته كلها في عذاب بعد ما كان عايش في نعيم بسبب غلطة ارتكبها في ساعة شيطان وسُكر، أما الخادمة فهي مقدرتش تستحمل ضغط الجن اللي عليها ولا التعب النفسي اللي سببها الراجل دة بسبب الاعتداء عليها، وبالرغم من إن عمرها كان صغير إلا إنها قررت تنهي حياتها فوراً وانتحرت بشكل غير مباشر...!!

ساعات اللحظات اللي الإنسان بيبقى هيموت ويعملها دي بتبقى ألعن ساعات حياته، لأنها حرفياً هتخلص على حياته بالتدريج، ومش

هيلحق يستمتع بأي حاجة هو عملها، سرّ الأولاد كان غامض ومحدث عارف مصيرهم فين بس واضح إنه بنسبة كبيرة اتبروا من أبوهم، وكم إن البيت أصبح ملعون محدش يسكن فيه، وبشهادة أهل الحي قالوا إنهم كل يوم بالليل يسمعون أصوات خناق رجالة وستات جوة البيت، وفيه حاجات بتتكسر وحاجات بتتحذف من البلكونة، والأمر أصبح مُريب في ظل الأجواء دي بعد الواقعة اللي حصلت..

غريبة هي الأيام.. عندما نملك السعادة لا نشعر بها، ونعتقد أننا من التّعساء، ولكن ما أن تغادرنا تلك السعادة التي لم نقدرها حق قدرها احتجاجاً، ربما علينا حتى تعلن التعاسة عن وجودها الفعلي، فنعلم أن الألم هو القاعدة وما عداها هو الشذوذ عن القاعدة، وندم ساعة لا يفيد الندم على ما أضعنا وما فقدنا.

فزخارف الدّنيا أساس الألم، وطالب الدنيا نديم الندم، فكن خليّ البال من أمرها، فكلّ ما فيها شقاءٌ وهمّ..

لذلك عزيزي القارئ.. قبل الندم.. اشتر نفسك اليوم، فإن السوق دائمة، والتمنُّ موجود، والبضائع رخيصة، وسيأتي على تلك السوق والبضائع، يومٌ لا تصلُ فيه إلى قليلٍ ولا كثير، (ذلك يوم التغابن).. (ويوم يعرض الظالم على يديه).

"تمت"

"الإبنة العاق"

طبيعي لما بنسمع عن جريمة قتل بنبقى عارفين إن القاتل صعب يتجاب، لأنه مش بيسيب وراه أي دليل على جريمته، ولكن الجريمة اللي هحكىها دي بتدل على ان القاتل مهما كان شاطر ومش سايب أثر لجريمته، برضو ربنا هيكشف الجريمة اللي ارتكبها..

في محافظة أسيوط مركز القوصية سنة ٢٠١٥ ..

عريس قاعد مع أبو العروسة ويحاول يقنعه أنه شاري بنته وهيعيشها في نعيم، أبو البنت كان مستلطف العريس بس بعد اللقاء ده ما خلص، نزل يسأل عنه زي ما بيعمل كل مرة مع أي عريس متقدم لبنته، المهم إن سمعته طلعت زي الزفت وأنه شاب بتاع مخدرات ومحدش قال فيه كلمة حلوة نهائي، الراجل رجع للبيت ويقول للبنت أنا هرفض الشاب ده لأنه طلع كذا وكذا، البنت اتصدمت وقالتله مستحيل!! ده الوحيد اللي أنا ارتاحت لما شوفته وحاسة إن حياتي هتبقى حلوة جداً معاه، قالها مش هتتجوزيه غير على جثتي..

البتت نظراتها اتملت شر وجملة (مش هتتجوزيه غير على جثتي) بتردد في ودنها كثير جداً، واليوم الي بعده هي اتواصلت مع العريس وقالتله أبويا رافضك، رغم ان العلاقة بين البنت والشاب ده كانت علاقة قديمة وعلاقة تعارف من الفيسبوك، وهي الي اقنعتة إنه يحبي يتقدملها وهو كان متمسك بيها وهي برضو، المهم الشاب قالها أنا هتجوزك غصب عنه وغصب عن أي حد، حتى لو اضطريت أولع في أهلك كلهم، وهنا الشر بيزيد جوة البنت بمجرد ما تسمع أي حاجة خاصة بأهلها، بس بتحاول تبين إنها بتحب اهلها ومش بايعاهم، قالتله لا انت هتيجي تاني وهتقنع أبويا والمرة دي مش هيرفضك متقلقش، الشاب سمع كلامها واتصل بأبوها عشان يحدد معاه ميعاد تاني بس أبوها رفض الميعاد أصلاً، وقاله أنت تنسى بنتي ومتقربش ناحية البيت ده تاني وإلا مش هيحصلك كويس!

وبدأ يهدده ويقول له انه سأل عليه وطلعت سمعته وحشة ومش كويسة وسط الناس والناس كلها بتكرهه وبتقول انه بتاع مشاكل ومش تمام، الشاب قاله تمام بس بتتك محدش هياخذها غيري..

بدأ الشاب يجهز في خلطات معينة بيعملها ويكون مقري عليها تعاويذ بتخلي أي حد يقابله يحبه على طول ويقع في غرامه، نفس الي عمله مع البنت لما قابلها، مكانتش طايقاه بس هو قدر أنه يوقعها في

حبه بالأعمال الي يعملها والسحر، كان يعمل حاجة غريبة جداً، كان بيعجب زيوت طبيعية وأعشاب نادرة جداً ويخلطهم ببعض ويقرأ عليهم كلام مش مفهوم ويدعكهم في إيده، وبكدة أي حد يسلم عليه بس هيقع في غرامه ويحبه، وابتدى بالخطه دي مع البنت الغلبانة وقدر يسيطر عليها، بل وخلاها تكره أهلها كمان وكانت مستعدة تبيع العالم كله عشان تشتري حببيها، الموضوع اتطور معاهم وكانوا بيتكلموا في الموبايل بالساعات، وفي مرة أبوها قفشها وهي بتكلمه في نص الليل، مسكها ضربها وكان هيرميها من الشباك لولا إنها قدرت تنقذ نفسها وتهرب منه بصعوبة!

وبدا الأب يعاقب بنته في الأيام الي بعدها وسحب منها الموبايل وكان بيعبسها في اوضتها بالأيام من غير خروج، والشر جواها بيزيد تدريجياً وحُب الانتقام بيتكاثر جوة قلبها، وصل بيه الحال انه منعها من نزول الكلية، وبسببه هي عادت السنة، وفي يوم من الأيام الجيران سمعوها بتصرخ من أوضتها وبتقولهم انها لو متجوزتش الشاب دة هتنتحر وتولع في نفسها او تنط من الشباك، أبوها أخذ الموضوع بهيافة وقال مش هتعمل حاجة، بس في نفس اليوم بالليل سمع باب البيت يخبط جامد، ولما فتح الباب لقي الجيران شايلين البنت ومغمى عليها وراسها غرقانة دم، قالوله يا حاج بنتك نطت من الشباك، وبسرعة

أخذوها على المستشفى بس طلعت لسة عايشة ممتتش، وقعدت حوالى ١٥ يوم في المستشفى، وبعدها خرجت وأخذوها البيت وأبوها بقى قعد يعاتبها وانها ازاى تعمل كدة عشان خاطر شاب سرسجي وإن الشباب الكويسة مالية الدنيا اشمعنى دة، وكل ما بيتقدملها عريس هي بترفضه، أبوها شك في موضوعها وقرر انه يجيب موبايلها ويراجع الكلام الي حصل بينها وبين الشاب دة، وهنا كانت المفاجأة!!

البنت على علاقة غير شرعية بالشاب دة وحصلت ما بينهم كذا مرة في شقته، أبوها لما شاف الكلام دة وأنهم كانوا بيتفقوا على ميعاد العلاقة جتله صدمة ودخل العناية المركزة، وخلال تواجده في المستشفى البنت استغلّت الموضوع وأخذت موبايلها وكلمت الشاب دة قالتله أبويا عرف كل حاجة ولازم نخلص من الموضوع دة، بس الرد بتاعه كان مفاجأة ليها، قالها (متقلقيش .. إحنا هنلخص من أبوكي) البنت سمعت الكلمة دي والشيطان الي جواها صحي من تاني وافتكرت العقاب الي أبوها كان بيعاقبهولها وإنه دمر حياتها، قالتله تمام، وسيب الموضوع دة عليا..

بعد أسبوع الراجل خرج من المستشفى والبنت كانت بتعيط تحت رجليه بالساعات عشان خايفة عليه، بس دموع التمساح كانت باينة جداً في عنينا، قالتله أنا هعمل كل اللي هتقولي عليه وكمان هجييلك

الشاب دة يعتذرلك وينفذك كل الي تطلبه، الرجل دخل في حالة سُكات رهيبة ومكانش بينطق بكلمة من أثر الصدمة، وبالفعل بعد يومين البنت اتصلت بالشاب وقالتله أنت النهاردة هتيجي تقعد مع أبويا، هحطلك كوباية شاي، عايزاك تسحب الكوباية الصغيرة وتسبب الكوباية الكبيرة، لو سحبت الكوباية الكبيرة هتموت لأنني هحط فيها سم!!

الشاب في كل الأحوال كان بيخطط لقتل الرجل دة ولكن لما سمع ان البنت هي الي هتقوم بالمهمة دي قال أنا هبعد نفسي من الموضوع وهي تقتله، وبالفعل في نفس اليوم جه وكان بيوس على رجل الرجل عشان يعتذرله والرجل ميينطقش، البنت جت بصينية الشاي وحطتها قدامهم على الترابيزة وهي بتبص للشاب وبتشاورله بعنيها على الكوباية الصغيرة، الشاب قام بسرعة وسحب الكوباية الصغيرة قدامه وساب الكبيرة قدام أبوها، أبوها بدأ يتكلم وقاله أنا كل الي طالبه منك إنك تبعد عن بنتي، مش عايز اسمع اسمك على لسانها، الشاب قاله حاضر أوامرك يا حاج الي تقوله هنفذه بالحرف، بس المهم صحتك وأنتك تبقى كويس، الحاج مسك كوباية الشاي وشرب منها، وعيون البنت والشاب مليانين شر وهما بيبصوله وهو بياخذ منها رشفة والثانية والثالثة، وبعد كدة ساب الكوباية قدامه، وبدأ يتكلم معاهم وهما بيكلموه، بس مرة

واحدة عينه بدأت تغيب وراسه تتقل وتوازنه اختل، وفجأة وقع من الكرسي على الأرض مغمى عليه، البنت والولد قاموا بسرعة ويسألوا بعض هنتخلص منه ازاى؟ والأتنين جتلهم نفس الفكرة، وهي إنهم يحدفوه من البلكونة وينزل ميت، وبكدة يبقى توازنه اختل وهو واقف في البلكونة ووقع لوحده، وهما برا الموضوع وهيتجوزوا وهيعيشوا في هنا وسعادة، وبالفعل قرروا انهم يعملوا كدة ومسكوا الرجل رفعوه من البلكونة، وحدفوه من فوق، وقع على راسه ودماغه انفجرت والناس كلها اتلّمت، الشاب مشي بعيد عن البيت والبنت نزلت تصرخ على أبوها وكأنها متعرفش حاجة، وشالوه حطوه في الإسعاف وراحوا بيه المستشفى، لكن الدكتور قالهم إن الحالة اتوفت، وهنا دخل المشرحة والطب الشرعي تدخل في الموضوع، ولما سألوا البنت عن الي حصل قالتهم دة كان يشرب الشاي عادي في البلكونة ومرة واحدة وقع لوحده، وهنا هي كشفت نفسها بدون ما تعرف، وقرروا إنهم ياخدوا عينة من دمه ويعملوها تحليل، ونتيجة التحليل أثبتت ان الدم دخل فيه نسبة كبيرة من السم، وبما إن البنت وقعت بلسانها وقالت ان آخر حاجة شربها كانت الشاي، قرروا يوصلوا الموضوع للنيابة، لأن وفاته مش طبيعية وإن فيه حاجة غلط، النيابة أمرت بتفتيش بيته وبالفعل راحوا هناك لقوا التراييزة عليها كوبايتين شاي، واحدة ناقصة نصها والثانية مليانة، قالوها هو وقع من البلكونة ازاى وكوبايات الشاي هنا؟ قالتهم لأ دة كان فيه كوباية في إيده ووقع بيها، وعشان هي كانت خائفة وهي

بتكلم ومهزوزة، الشرطة شكّت في أمرها وأخذوا كوبايتين الشاي معاهم وشوية مقتنيات تاني، ولما حللوا الشاي في الطب الشرعي اتضح ان السم في الكوباية الي ناقصة نصها، وكم ان عليها بصمات صوابع أبوها، أما الكوباية الثانية فمكش فيها سم وكان عليها بصمات صوابع لشخصية مجهولة، البنت التحجرت في النيابة وقالوها إنها متهممة بجريمة القتل دي، وهي حبت تبرأ نفسها قامت قالتلهم ان الي قتله هو حبيبها، مش هي الي قتلته، وهنا ظهرت الشخصية المجهولة الي كانوا مختارين فيها، والبنت قالتلهم على عنوانه وبالفعل راحوا قبضوا عليه وجابوه في التحقيقات وقالهم ان هي صاحبة الفكرة وهي الي حطت السم في الشاي، وبعد ما راجعوا مكالمات تليفوناتهم من شركات الاتصال اتضح بالفعل إنهم هما الاتنين اتفقوا على قتل الأب عشان يتجوزوا براحتهم، ولما صدر حُكم الإعدام عليهم هما الاتنين البنت قالت جملة غريبة قوي، قالت أنا سمعت كلام أبويا لما قالي (مش هتتجوزيه غير على جثتي)..

وكلامها ده خلى حُكم الإعدام يتنفذ بسرعة، والاتنين اتعدموا في يوم واحد بعد ما اعترفوا على بعض ومثلوا الجريمة في البيت.

وأصبحت كوباية الشاي هي السر الي كشف جريمة قتل الأب على أيد بنته وعيشقها..

الخلاصة إن عشان تربى بنتك في الزمن ده انت محتاج طاقة وقوة

رهيبة عشان تقدر تغيّر تفكيرها من حاجة هي حاباها لحاجة هتنتهي على حياتها..

أبوكي او أمك دول أغلى اتنين في حياتك، مهما جيه الي هتجيبه أكثر منهم بس خليك عارفة إنهم عارفين مصلحتك كويس مع الشخص المناسب، ولما بيرفضوا شخص معين دة مش معناه إنهم بيحرموكي منه لأ، دة معناه إنهم شايفين قد إيه إنه هيعذبك في حياتك ومش هيخليكي مبسوطة..

الشاب الي بيضحك على بنت بعلاقة غير شرعية وبيلجأ للحلول الي زي دي، اعذرني فأنت لا تصلح للعيش في المجتمع دة، أنت عمرك ما تتمنى ان أختك او أي بنت تقربلك انها تمر بالموقف دة، فبلاش تضحك على بنات الناس لأن نهاية كل قصة غرامية بتكون نهاية سوداوية على كل الأطراف..

"تمت"

"جن داخل الحائط"

هو ليه البنات أكثر عرضة للخطر من الجن؟

معظمهم بيناموا وييلفوا ضهرهم ناحية الحيطه، قال يعني محدش هيبقى جنب الحيطه، ميعرفوش إنه أفضل مكان لسكن الجن هو بجانب الحيطه وفي زاوية الأوضة، يعني مَيّت مَيّت..

بس الغربية في الموضوع إن مطلعش البنات بس الى بيلفوا ضهرهم للحيطه، ده كل الناس بتعمل كده بما فيهم أنا، طيب لو قولنا إنه قاعد ورايا زي ماهو قاعد وبيتفرج عليا، هيستفاد ايه؟ هياكلني مثلاً؟؟ طب ليه مانقولش إن ده حصل فعلاً؟؟

تعرف "ألاندا"؟؟

أكيد متعرفهاش، بُص دي بنت عندها ١٢ سنة من الولايات المتحدة، كانت نايمة على سريرها زي ما أي حد بينام عادي، أهلها كانوا حاطين كاميرا مراقبة في غرفتها لأنها كانت بتعاني من مشاكل صحية في النوم وكانت بتقوم تمشي وهي نايمة وتكسر حاجات، اضطروا أهلها

أنهم يخطوا كاميرا مراقبة عشان يطمنوا عليها وهما في أوضتهم بدون ما يخطوا عليها كل شوية ويسببونها إزعاج، دة في مرة الأم بتقول إنها أثناء تواجدها في الريسبشن وقاعدة قدام التلفزيون في أمان الله، شافت ألاندا وهي شايلة قطعة سودة في أيديها وبتمشي من جنبها، المشكلة مش هنا، المشكلة الأكبر إن ألاندا كانت بتمشي وهي مغمضة عينها، يعني كانت نايمة تماماً، والصدمة الأكبر كمان إن القطعة مكانتش بتطلع صوت نهائي، كأنها متخدرة بس صاحية، الأم مشيت ورا ألاندا في اليوم دة وبتشوفها هي رايحة فين، لقتها خرجت برا البيت خالص وراحت في جينة البيت وبتحفر حفرة، وبعد ما خلصت الحفرة حطت القطعة جوة الحفرة وقفلت الحفرة ومشيت، والأم بتراقبها في ذهول رهيب وخوف، رجعت ألاندا غرفتها عادي جداً وكل دة حصل وهي مغمضة عينها ونايمة، الأم قالت إنها لما راحت للحفرة تاني مرة وفتحتها ملقيتش القطعة جواها !!

ومكانتش عارفة تفسر دة بأيه بس هما كانوا بيخافوا من ألاندا جداً، دة مكانش عندهم ققط أصلاً أو مال ألاندا جابت القطعة دي منين؟؟ سر مجهول محدش يعرفه.

واستمرت الأحداث الغريبة دي وكل حاجة كانت بتسجل على كاميرات المراقبة وكانوا بيراجعوها كل يوم بالليل ويحاولوا يلاقوا تفسير لتصرفاتها بس مفيش أي تفسير يخلي شخص يمشي وهو نايم، لا

ويعمل حاجات كأنه صاحي بالظبط، محصلتش قبل كدة.

المهم آخر نومة نامتها "ألاندا" كانت في يوم عيد ميلادها، بعد ما الحفلة خلصت وراحت غرفتها واتغطت ونامت، الأهل نايمين وكل البيت سكون لحد الساعة ٥ الفجر، الأهل سمعوا صوت تخبيط ورزع جامد في أوضة "ألاندا" وصحيوا بسرعة راحوا أوضتها لقوها مقفولة من جوة، فضلوا يخطوا عليها بس مكانوش سامعين صوتها، الصوت الوحيد اللى كانوا سامعينه هو صوت "مضغ الطعام" كأن حد بياكل لحمه بصوت عالي جداً وبلهفة، اضطروا إنهم يكسروا الباب وبالفعل عملوا كدة بس بعد فوات الأوان، ولما فتحوا الباب لقيوا سريرها غرقان دم والحيطه كلها دم والأرض كمان، لكن فين "ألاندا"؟؟ السؤال اللى قعد فترة محدش عارف إجابته، الصحف البريطانية والألمانية والأمريكية كتبوا تقارير كثير جداً عن الحادثة دي وعن السر وراء اختفاء "ألاندا"!!

بعد مرور أسبوع..

الزوجة بعد ما كانت منهارة من البكاء والصريخ فاقت فجأة وقالت "كاميرات المراقبة" وبصت لزوجها وقالته إحنا ازاي يفوت علينا أسبوع كامل من بعد اختفاء بنتنا ومنشوفش كاميرات المراقبة، الزوج عينه وسعت وظهرت على ملامحه الفرح والسعادة وأنه هيعرف

مَصِيرُ بَنْتِهِ فِينِ دَلُوقَتِي، الْمَهْمُ صَعَدُوا لِلدُّورِ الثَّانِي بِسُرْعَةٍ وَفَتَحُوا جِهَازَ الْكَمْبِيُوتَرِ وَجَابُوا كَامِيرَاتٍ مُرَاقِبَةً غُرْفَةَ "أَلَانْدَا" .. وَشَافُوا الْآتِي.

"أَلَانْدَا" كَانَتْ نَائِمَةً نَوْمَةً طَبِيعِيَّةً لِحْدِ السَّاعَةِ ٤ الْفَجْرِ، بَدَأَ اللَّحَافُ يَتَشَدُّ مِنْ عَلَيْهَا بِشَكْلِ بَطِيءٍ بَدُونِ مَا يَظْهَرُ أَيُّ شَخْصٍ حَوَالَيْهَا، بَعْدَهَا بِثَوَانِي جَتَ لَحْظَةً خُرُوجَ خِيَالِ أَسْوَدٍ مِنَ الْحَيْطَةِ إِلَى جَنْبِهَا، وَفَضَلَ وَاقِفَ جَنْبِ السَّرِيرِ بِاصْصَ لِيهَا مَبِيتَحَرَكْشَ، الزَّوْجَ وَالزَّوْجَةَ فِي وَضْعٍ صَادِمٍ وَغَيْرِ مُقْبُولٍ بِالْمَرَّةِ، بَعْدَ مَرُورِ ١٠ دَقَائِقٍ بِالظُّبُطِ اتَّحَرَكَ الْكَائِنُ الْأَسْوَدُ نَاحِيَةَ "أَلَانْدَا" وَرَفَعَ إِيْديهَا وَعَضَهَا جَامِدًا، لِدَرَجَةٍ إِنْ إِيْديهَا اتَّقَطَعَتْ فِي بَوْقِهِ مِنْ أَوَّلِ عَضَةٍ، "أَلَانْدَا" فَاقَتْ وَقَبْلَ مَا تَصْرُخُ كَانَ قَرَّبَ وَشَهُ عَلَيْهَا وَعَضَهَا مِنْ رَاسِهَا قَطَعَهَا فِي ثَوَانِي، الزَّوْجَةُ كَانَتْ بِتَقْوِيلٍ إِنْ شَكْلَ أَسْنَانِهِ كَانَ مَنَظَرُهَا بِشَعٍّ وَكَبِيرَةٍ وَهُوَ يَبَاكِلُ أَيُّ طَرَفٍ مِنْ أَطْرَافِ "أَلَانْدَا" بِسُرْعَةِ الْبَرْقِ، وَصَوْتِ الْمَضْغِ عِنْدَهُ عَالِي جَدًّا، بَعْدَيْنِ جِسْمِ "أَلَانْدَا" بَدَأَ بِالْأَرْتِعَاشِ بِطَرِيقَةِ هَيْسْتِيرِيَّةٍ وَالْكَائِنُ مَسْكُهَا مِنْ رِجْلَيْهَا الْاَتَيْنِ وَفَضَلَ يَشِيلُهَا وَيَخْبِطُهَا فِي الْأَرْضِ جَامِدًا، وَبَعْدَيْنِ يَرْمِيهَا عَلَى الْحَيْطَةِ وَعَلَى السَّقْفِ كَأَنَّهُا بِلُونَةٌ فِي إِيْدِهِ، فِي الْوَقْتِ دَةً كَانَ بَايْنِ عَلَى الْبَابِ وَهِيَ بِتَتَخَبَّطُ وَدَةً كَانَ مِنَ الزَّوْجِ وَالزَّوْجَةِ، الْخِيَالِ الْأَسْوَدِ كَانَ قَاعِدَ عَلَى السَّرِيرِ نَفْسَ قَعْدَةِ الضَّفْدَعِ بِالظُّبُطِ، وَكَانَ فَاتِحَ بَوْقِهِ وَبِيَاكِلَ بِصَوْتٍ عَالِيٍّ، وَكَانَ بَايْنِ فِي الْكَامِيرَا أَنَّهُ يَبْكِبُ وَيَصْغُرُ

كل شوية وسرعة تنقله في الأوضة رهيبة، لدرجة إنه أكل جسم "ألاندا" كله في أقل من ربع ساعة وبعدين دخل جوة الحيطه تاني والباب اتكسر وظهر لحظة دخول الزوج والزوجة الغرفة..

أخدوا شريط الفيديو وراحوا قسم الشرطة ولما شافوه هناك قالولهم إن الحالة دي نادرة جداً وأول مرة تحصل، ومش عارفين يجلوها ازاي، بس مفيش طريقة أسلم من إنهم يسيبوا البيت ويمشوا خالص، بعدها بـ ٣ سنين اتكررت نفس الحادثة بنفس السيناريو، بس المرة دي في "اليمن" دولة عربية ومعترفين بالقرآن والعبادة، بس الحادثة حصلت للزوجة المرة دي، أثناء سفر زوجها للعمل كانت بتقعد بالشهور لوحدها، وساعة النوم حصلها نفس اللي حصل لـ "ألاندا"، بس مكانش عندهم كاميرات مراقبة ولكن شكل الغرفة وهي مليانة دم على الحيطه والأرض مع تقارب أحداث الجريمة الأولى اتضح إنها ماتت بنفس الطريقة، على حسب كلام "مايكل دوينسون" خبير الجرائم والحالات النادرة في القتل قال إن الحادث ده بيحصل في كل الدول لحد النهاردة، ولكن فيه قرار دولي بأن الحكومة متقولش على الحوادث اللي بتحصل من النوع ده، وده عشان ميخوفوش الشعب ويحس بالهلع!!

يعني الحوار ده بيحصل في مصر عادى؟؟

أيوة طبعاً وممكن في محافظتنا ويمكن في شارعنا، أنا فعلاً فاكّر جرايم قتل حصلت زي دي في منطقتنا بس كانوا بيقولوا إن الضحية انتحرت، وكان الموضوع بيخلص بعدها وبيتقفل، اشكّ إنها ممكن تكون اتقتلت بالطريقة الوحشية دي، بس ليه بيختار البنات؟؟

السؤال الي هيفضل مراودني طول حياتي، وحوادث البنات والجن موقفتش على طريقة القتل دي بس لأ، معظم حالات المسّ بتلاقىها حصلت للسّات والبنات الصّغيرين، طيب هل إيمانهم ضعيف؟؟ أنا أعرف واحدة جيرانا زمان سُكان البيت عندها كلهم كانوا ملبوسين ما عدا هي، ولما أفصحت عن السرّة قالت إنها كانت بتنام متوضية وتقرأ قرآن قبل ما تنام ومحافضة على الصلاة، مُعظم حالات القتل النادرة دي بتحصل حقيقي مبتكونش تأليف أو قصص ما قبل النوم ولكن الغرض منها هو التساؤلات، وإجادة حل للتساؤلات.. ليه بتنام وانت ضهرك للحيطه رغم إنه ممكن يكون قاعدلك جنب الحيطه الي بيطلع منها؟

المقصد مش إنك تخاف يا معلم بس لو فكرت معايا لمدة ثواني كدة في إن ازاي مفيش حل للكائنات دي وازاي مكانتش موجودة في العصور القديمة الي قبلنا، بس الحقيقة هي كانت موجودة وهتفضل موجودة للعصور الجديدة كمان والي هيجوا بعدنا..

فيه تفاصيل كثير وأسرار خفية في موضوع مقتل الطفلة "ألاندا" والزوج والزوجة مقالوش كل حاجة وكل الأفاويل دي من كلامهم هما، يعني وارد إن يكون فيه حاجات كثير مخبئها عن الناس، ولنفترض إن "ألاندا" كانت باصة للحيطه وهي نايمة، هل كان هيظهر الكائن دة برضو؟؟ لو دققنا في التفاصيل دي هنتعب ومش هنعرف نعيش، يستحسن متركزش ولا تحاول تعرف إيه سر حنفية الحمام الي بتتفتح لوحدها بالليل ولا تركز في شاشة موبايلك وهو مقفول بعد الساعة ١٢ بالليل، حتى أصوات الكركبة الي بتسمعها في المطبخ مش عايزك تركز فيها، ولكن أنا طالب منك حاجة واحدة بس، إياك تدي ضهرك للحيطه وتنام.. اللهم بلغت.

"تمت"

"زوجة إبليس"

تَحْيَلُ تتجوّز حُبَ عمرِكَ اليّ ضحيّتِ عشانها سنين كثيرة وبيعت كل حاجة عشان تشتريها وتعيش معها في سعادة زوجية وانبساط، ولكن تصحى في يوم تلاقي نفسك متكثف بحبال قوية ومراتك جايبة مجرمين وماسكين سكاكين وآلات حادة ويقطعوا في جسمك وأنت حيّ !!

بص يا سيدي دايمًا الإنسان يتولد وهو على الفطرة السليمة اليّ متعرّش الأذى أو الإجرام، وتساهم البيئة المحيطة به في تشكيل شخصيته والتأثير فيه، وفيه ناس بتتعرّض لتأثير سلبيّ من قبل البيئة المحيطة بهم، ودة بيخليهم ينحرفوا للسلوك الغير طبعي، وارتكاب الممارسات غير المقبولة بالنسبة لإنسان سوّي، بيبقى قدامهم اتجاه واحد بس يمشوا عليه، وهو الاتجاه إلى الإجرام ..

ودة عشان كل شخص فينا جواه مجرم صغير، بيطلع لما بتحصل مشكلة مع شخص تاني، ويراوده شعور الانتقام، الانتقام من الخصم، بس خليني أقولك إنك عشان تبقى مجرم وتدخل عالم الجريمة دة مش بالسّاهل، وحتى لو كان بالسّاهل فأنت هتدفع عمرك كله مقابل

الجريمة الي هترتكبها في خصمك، وقبل ما تعمل أي حاجة عايزك
تركز في الحكاية دي قوي، وتراجع نفسك قبل أي قرار تاخده أو أي
فكرة تراودك في حياتك..

أنا من أوائل الناس الي سكنوا في مدينة "المنيا الجديدة" .. في
محافظة المنيا في الصعيد، كنا دايماً بنسمع إنها متميزة بالهدوء والأمان
والأجواء الساكنة، في مرة كنت مخلص شغل ومروح، أول ما دخلت
سلم العمارة سميت ريحة بشعة جداً جداً، قلت أكيد فيه قطعة أو كلب
ميت في العمارة، محطيتش في دماغي وطلعت الشقة عادي ونمت،
اليوم الي بعده خلصت شغل وبرضو وصلت العمارة سميت الريحة
ابشع من اليوم الي قبله، قلت هو كل يوم فيه كلب ييموت ولا إيه؟
مستحملتش الريحة وحطيت منديل على مناخيري وطلعت، دخلت
الشقة بسأل أخواتي بقولهم هو حد شم الريحة الي على السلم دي؟

قالولي هو أنت معرفتش؟؟

قولتلهم لا .. هعرف إيه؟

قالولي إن امبارح الساعة ٤ الفجر ظهرت واحدة ست من احدى
الشقق الي في العمارة وكانت شايلة شُنت سفر كبيرة شوية، والجيران
كانوا اشتكوا من الريحة دي ولما شافوا الست دي نازلة من الشقة بالشُنت
الكبيرة الي معاها وقفوها وقالوها هي الريحة دي من شقتك؟ بس هي

ارتبكت جداً وقالتلهم "آه .. أصل أنا كنت شايلة لحمه في التلاجة والتلاجة فصلت واللحمة باظت"، المشكلة إن شُنت السفر الي معاها كانت بتنقط دم، والنقط دي هي الي فضحتها، بس لما سألوها عن الي جوة الشنت قالتلهم لا دي فاضية وانا رايحة أرميهم في الزباله وراجعه، مع إن الشنت كان باين عليها شنت جديدة مش قديمة ولا بايظة، وكان كان باين جداً إنها شايلاهم بالعافيه ووزنهم ثقيل، الجيران ماسكتوش عليها وقالوها لأنتي تفهمينا حكايتك وإلا هنطلبك البوليس، عشان كلامك مش راكب على بعضه..

هي خافت منهم وراحت رمت الشنت في الارض ونزلت على السلم تجري وعازية تهرب منهم، بس قدروا انهم يمسكوها ووقتها شكوا فيها بنسبة ١٠٠٪ ان فيه مصيبة وراها، المهم الشك والفضول غلبهم وأصروا انهم يفتحوا الشنطة وينتصروا على ريحة العفونة الي طالعة من الشنطة، ولما فتحوها وشافوا الي جواها اتصدموا جداً، لقوا أعضاء إنسان متقطعة جوة الشنطة، عبارة عن رجل وإيد وراس وأحشاء الجسم، قفلوا الشنطة بسرعة وقرروا انهم يتصلوا بالبوليس يجي يشوف الموضوع ده، وبالفعل اتصلوا عليه فوراً والشرطة جت لقوا الجيران مكتفين الست دي والشنط جنبها، عرفوا الموضوع منهم بالتفصيل وطلعوا الشقة، مكانوش مستحملين الريحة نهائي وأول ما دخلوا أوضة

النوم لقوها غرقانة دم وبُقِع دم في كل حِته في أنحاء الغرفة، وفيه بواقى أعضاء بشرية متقطعة ومتنطّورة في أماكن مختلفة، الظاهر كدة إن الضحية اتقطّع وهو عايش، وكان بيحاول يهرب من الي عملوا فيه كدة، المعمل الجنائي كان حاضِر الواقعة وعمل الإجراءات اللازمة واتضح ان الجثة فصلت في الشقة دي لمدة ٣ أيام، وإن الجثة اتقطعت وهو عايش فعلاً وكان باين جداً على أثر تقطيع الأعضاء انه كان تقطيع عشوائي، النيابة أجرت التحريات اللازمة مع القاتلة واعترفت بأنها قامت بتقطيع الضحية هي وثلاث شباب آخرين، والي حصل ان الضحية دة كان زوجها وكان كل يوم يتخانق معها، وهي كانت بتغلط مع رجالة كثير بس يوم ما اكتشف خيانتها قرر انه يقتلها، ولكنها اتعدت بيه قبل ما هو يتعشى بيها وقدرت انها تبلغ مجموعة شباب من الي تعرفهم وتقولهم ان الزوج ناوي على قتلها، وخلال دقائق كان الشباب حضروا ومسكوا الزوج كتفوه وقطعوا لسانه بالمقص عشان مينطقش ولا يتكلم مع مراته بكلمة وحشة..

لكن هي كان عندها رأي تاني وكانت خايفة لأحسن يعمل فيها حاجة تاني، ودة الي خلاها تقرر إنها تتخلص منه في نفس الليلة، وأثناء التحقيق معها اعترفت على المشاركين في الجريمة وقالت إنهم بعد ما كتفوه قطعوا إيده الاتنين، وهو كان بيحاول يصرخ ويتحرك،

وبعدين قطعوله رجله الاتنين وهو كان بين الحياة والموت، والتعذيب
 دة كان بأمر من الزوجة وفي الآخر قطعوا راسه وفصلوها عن جسمه،
 وقالتهن امشوا انتوا وسيبولى الجثة أنا هتصرف فيها، وبالفعل لما مشوا
 بدأت تمسك السكينة وتقطع في جسمه أكثر عشان تقدر تتحفظ بيه لحد
 ما تشوف هتودي الاشلاء دي فين، وبعد ما خلصت تقطيع جابت شنط
 سفر كبيرة وحطت أعضاء الجثة فيها وركبتهم تحت السرير، وفضلت في
 الشقة لمدة ٣ ايام لوحدها وفي اليوم الرابع كانت نازلة عشان ترميهم في
 الزبالة، ولسوء حظها إن ريحة الجثة فضحتها في العمارة والجيران قدروا
 يسيطروا عليها ويبلغوا الشرطة، المشكلة إن باقي المشاركين في الجريمة
 لما تم التحقيق معاهم قالوا إنهم متجوزين الست دي عُرْفِي هما التلاتة،
 وهي كانت كل يوم تقضي وقت مع واحد، وكانت مفهمة جوزها انها
 شغالة في جمعية رسالة وتعمل أعمال خيرية..

-ربنا يقوِّي إيمانك يا بنتي والله.

صحيح ما انتي زوجة إبليس، والتجوزتي راجل غلبان ودمرتي حياتي،
 العقل والمنطق بيقول ان حوادث قتل الزوج للزوجة او الزوجة للزوج
 دي حوادث لا غنى عنها، وتتحصل بشكل يومي في جميع المحافظات
 والدول، بس لما القتل سهل بالنسباهم كدة، بيتجوزوا ليه؟ يمكن
 نجيب اللوم على الزوج ونقول انه كان مهمل فيها بس الطب الشرعي

فَجَر مفاجأة كبيرة جداً، وقال ان الست دي كانت بتتعاطى مخدر قوي وخطر جداً، ودة بيخليها تعمل أشياء بدون وعي منها، ما هو حقيقي مفيش حد واعى يقطع جثة لأكثر من ١٥ قطعة، دة كمان اكتشفوا مؤخراً انها كانت بتبيع "حشيش" في شقتها بدون علم زوجها، هو فعلاً فيه زوج مُعَيَّب عن مراته بالشكل الفظيع دة؟

يا معلم دة ٧٠٪ من جرائم القتل بترجع لتعاطى المخدرات!! و دي دراسة عملتها الجمعية التونسية لعلوم الإجرام، وفيه كمان دراسة أمريكية قالت إن ٩٣٪ من المجرمين مروا بسوابق إدمان على المخدرات والكحول.

حقيقي إحنا دايماً بنقول "الأهمال" في العلاقات الزوجية بيؤدي لنتائج سلبية جداً جداً، سواء التقصير من الزوج أو من الزوجة، الشقة اللي حصل فيها الجريمة اتشمّعت والزوجة تم الحكم عليها بالإعدام هي والمشاركين في الجريمة معاها، ولكن الشقة لحد الآن أصبحت مُريية وبيصُدُر منها صوت زعيق وكأن فيه حد محبوس جواها وبيستتجد بالناس، الأمر اللي سبّب رعب وخوف لباقي الشقق في العمارة، وأصبحت العمارة دي ملعونة بسبب الواقعة اللي حصلت فيها..

أنا بس قبل ما انهي القصة عايز أسأل سؤال .. هو ليه الإجرام انتشر في العالم وبالأخص جرائم القتل؟ في الأول والآخر أنا سايلكم حرية

الرأي في التعبير والتفكير في الموضوع دة.

"تَمَّتْ"

"الجرعة الثانية"

قد تؤثر هذه الجرعة على الألياف العصبية الكبيرة، ليقوم بشكل مؤقت بتخدير إحساسات الفزع التي يتم إرسالها إلى الألياف العصبية الأصغر. ولذا فغالباً ما يوصى بأخذ جرعات خفيفة من هذا الكتاب. (وجب التنويه).

"عَادَ مِنَ الْمَوْتِ"

بعد ما دفنناه في القبر وعملنا العزاء والناس كلها عرفت أنه مات،
اكتشفنا بعدها أنه عايش!!

في محافظة الجيزة منطقة العجوزة سنة ٢٠١٨..

أنا اسمي "هادي" وعاش في بيت عائلة مع أهلي وأعمامي وستي،
في مرة صحينا مخصوضين على صريخ في البيت وقومنا نجري بسرعة
نشوف فيه إيه، لقينا ستي قاعدة على سرير عمي وحاضناه وبتصرخ
جامد، أخذناه المستشفى بسرعة وكشفوا عليه وقالولنا البقاء لله ..
الحالة توفت.

الدنيا اتقلبت بقي صريخ وزعيق وليلة كبيرة، عمي كان إمام مسجد
وكان معروف جداً وسط الناس ولما اتذاع خبر وفاته أهل المنطقة كلهم
جُم في تشييع جنازته وكنا حوالي أكثر من ألف شخص ماشيين في
الجنازة، فيه اللي كان بيصور فيديو وفيه اللي كان يبكي وناس كتير
جداً حواليا، روحنا صلينا عليه في المسجد اللي هو كان إمام فيه وبعدها

اتجهنا ناحية المقابر عشان ندفنه، النعش كان طائر بينا وحرافياً كنا بنمشي سريع جداً لدرجة إننا قربنا نجري بيه، ودي من حُسن الخاتمة، عمي مكانش كبير في السن ولا كان عجوز يعني نقدر نقول ٥٠ سنة مثلاً، المهم وصلنا المقابر وكانت الساعة ٨ بالليل، وكله كان مشغل الكشاف بتاع الموبايلات وروحنا ناحية المدافن بتاعتنا وحطيناه في القبر وقرأنا الفاتحة ودعيناله ومشينا، كان فيه طفل ماشي جنبني عمال يبص وراه ويبكي، فبقوله اهدي يا حبيبي متبكيش هو في مكان أحسن، بس الرد بتاعه صدمني وقال "هو هيرجع لنا امتي؟" ..

قولتله ادعيله يا حبيبي وقول ربنا يرحمه ويغفرله، المهم ركبنا العربيات ومشينا وكل واحد راح بيته وبقينا بنجهز بقى للعزاء، كانت فيديوهات تشييع الجنازة نزلت في كل حته وكل الناس شافتها، عملنا أول يوم عزاء وعدى على خير وتاني يوم وبقينا في اليوم التالت والأخير، أنا واقف في العزاء عادي وباخذ عزاء عمي ولقيت شخص غريب معروفش عمره حوالي ٢٥ سنة بيقولي "هو المتوفي يقربلك إيه؟" قولتله يبقى عمي .. قالي "طب عايزك في كلمتين على جنب".

مشينا بعيد شوية أنا وهو ولقيته بيطلعلي موبايله وبيقولي شوف الفيديو دة كدة، فتحت الفيديو اشوفه لقيته فيديو تشييع جنازة عمي، قولتله الله يرحمه ماله الفيديو؟ قالي ركز في النعش كويس، شغلت الفيديو

تاني وفعلاً ركزت في النعش بس برضو ماله الفيديو والنعش؟ قالي طب ركز على ذراعه، شغلت الفيديو لتالت مرة وركزت على ذراعه وهنا كانت الصدمة، ذراعه كان محطوط على بطنه بس وإحنا شايلينه لقيت ذراعه اتشال واتحط جنبه وبقي مفرد!!

اتصدمت جداً ومكنتش مستوعب دة وقولتله هو أنت عامله على الفوتوشوب يعني؟ قالي فوتوشوب إيه أنا من ساعة ما شوفت الفيديو وأنا دماغى قربت تنفجر ومش عارف دة بجد ولا لأ، قولتله وكنت فين طول اليومين الي فاتوا وازاي أوريهم الفيديو دة دلوقتي؟ عايز تقنعني إنه عايش مكش ميت وهو في النعش؟ طب ليه محاولش يتكلم أو يصرخ؟ ليه وإحنا بندخله في القبر محاولش يتحرك؟ لو دة فعلاً عايش، قالي معرفش أنا لقيت الفيديو دة وقولت آجي اوريهولكم بقى في الأول والآخر أنا مليس دعوة بس حبيت أساعد بمعلومة مش أكثر، قولتله ابعتلي الفيديو، وبعد ما بعتهولي هو مشي وروحت ناحية أعمامي قولتلهم فيه حاجة لازم تعرفوها، وجمعتهم في مكان هادي ووريتهم الفيديو، مكانوش مركزين بس اضطريت أقولهم على ذراعه وأخذوا بالهم، وقالوا مستحيل!! ازاي دة يحصل إحنا لازم نروحله، لسة هننزل ونتحرك لقينا موبايل عمتي بيرن، ورقم غريب منعرفوش، عمي الثاني أخذ الموبايل ورد على الرقم .. وهنا كانت المفاجأة الكبرى!!

لقينا عمي الي دفناه هو الي يتصل ويقول "الحقوني مكان ما دفتوني أنا لسة عايش، تعالوا بسرعة"

اتصدمنا كلنا ومكانش مستوعبين الي حصل ولما عمي حاول يتصل بالرقم تاني لقاه مُغلق، نزلنا بسرعة وركبنا عربية واتجهنا للمقابر تاني، كنا بالليل برضو مكنش ينفع نستنى للصبح، وأول ما وصلنا نزلنا من العربية واتمشينا على رجلينا لحد القبر بتاعه، واتصدمنا كلنا لما لقيناه قاعد على الأرض بالكفن وباصص لتحت، وفيه حد جنبه نايم على الأرض، كنا مرعوبين جداً بس كملنا مشي لحد عنده وندهناله واحنا بنكبّر وننسّج ربنا بصوت عالي، وهو مكانش قادر يتكلم وكان بيتحرك بصعوبة جداً، أخذناه وحطيناه في العربية وقالنا هاتوا الراجل الي نايم على الأرض دة معانا، وأخذناه برضو ومشينا، وخلال الطريق بنحاول نتكلم أو نشوف فيه إيه بس مكنش بيتكلم خالص، وكان بيرفع راسه بالعافية ويبشاور إنه عايز مياه، اديناله مياه وشرب منها كثير جداً، لحد ما وصلنا أقرب مستشفى ونزلناه من العربية وطلعناه فوق والراجل التاني معاه وبلغنا باقي العائلة وكلهم بقوا في المستشفى، الدكاترة حطوه في غرفة العناية المركزة على جهاز إنعاش، وطلعوا قالولنا ان القلب شغال والراجل عايش!!

كنا واقفين حقيقي مذهولين ومش عارفين نقول إيه، والدكتور

قالنا الرجل الثاني اتوفى، مكناش عارفين هو مين ومكنش معاه بطاقة شخصية حتى بس كان راجل كبير في السن ومُلتحي ولا بس جلالية قديمة، فضلنا في المستشفى لحد تاني يوم صاحيين ولما نبضات قلبه استقرت الدكتور قالنا تقدرُوا تدخلُوا تشوفُوا الحالة، ستي كانت معانا وأول ما دخلت وشافته وهو عايش ومفتح عينه قامت واقعة على الأرض، نقلناها في أوضة تانية على جهاز إنعاش بس مفيش ١٠ دقائق والدكتور خرج قالنا الحالة اتوفت بذبحة صدرية، مكناش عارفين نفرح على رجوع عمي ولا نزل على وفاة ستي، ولما كنا قاعدين مع عمي وبنحاول نخله يتكلم ونفهم منه اللي حصل مكناش عايز يتكلم خالص، واضطرينا نسيه يرتاح وأكل وشرب وفضل صاحي، مكناش بينام خالص ولا عينه تغمض حتى لو لدقائق، ومفيش كلام مكانش بيتكلم، أخذناه البيت وعمتي اعتنت بيه، ستي دفناها ورجعنا عملنا عزاء تاني ليها..

وبعد أكثر من ٣ شهور عمي طلب منّا إنّا نتجمع عشان عايز يقعد معانا، خلال الـ ٣ شهور دول مكناش بيتكلم خالص وما صدقنا أنه طلب يقعد معانا وهيتكلم، وحالنا بقى..

قال أنا من وقت الغسل والتكفين وأنا عمال أصحى وأنام تاني ومكنتش عارف أصحى ثانيتين على بعض، ولا كنت عارف أقول للي بيغسلني إني صاحي مومتش، وفي التشيع كنت بحاول اطلع إيدي أو

اتكلم بس محدش كان شايفني، وكل ثانية كان بيغمى عليا وافوق تاني، لحد ما دفتوني وأنا مش عارف أقولكم إني صاحي، بس كنت حاسس بيكم جداً وأغمى عليا أول ما دخلتوني القبر، بعدها صحيت لقيت نفسي في مكان ضلّمة ومش عارف أنا فين، طلعت أيدي من الكفن وبحاول امسك أي حاجة حواليا بس اكتشفت إني بمسك جثث بشرية وعظام، كنت بحاول اصرخ وانا دي على أي حد برا بس مفيش حد سامعني، وفضلت ٣ أيام وأنا عايش جوة القبر وكانت روحي بتطلع، وكل شوية يغمى عليا وأفوق وكنت بدعي ربنا إني أموت بجد وياخد روحي عشان ارتاح من اللي أنا فيه، أنا كنت مدفون حيّ، ومحدش سامعني، لكن شايف ظل بيتحرك حواليا وحاسس بالجلث اللي جنبني والريجة بتاعتهم، وفي اليوم الثالث أنا كنت سامع إن فيه جنازة في نفس المكان وكنت بنادي بأعلى صوتي لحد ما حارس المقابر سمعني، وكسر قفل الباب الحديد ودخل عندي جوة وفتح القبر، كان هو ومعه ناس تاني، أول ما شافوني وأنا بخرج من القبر كلهم جريوا بسرعة وخافوا، افتكروني عفريت، ما عدا حارس المقابر أول ماشافني جاله ضيق تنفس وصدمة ووعكة صحية ونطق الشهادة ووقع قدامي، معرفتش اعمل حاجة والوحيد اللي كان هينقذني ويخرجني برا المقابر مات قدامي، اضطرريت افتش في هدومه على الموبايل بتاعه وطلعته واتصلت بيكم، وفضلت مستني لحد ما انتوا جيتوا..

عمي مرَّ بحالة ووقت محدش في الدنيا يقدر يُمُر بيه، عمي كان شعرُه أسود وقت ما مات، حالياً شعرُه كله أبيض بلا استثناء، وكمان ملامحه عجّزت والي يشوفه يقول عنده ٩٥ سنة، مش قادر يتحرّك ويمشي بسبب الصدمة اللي حصلتلها، الموقف صعب، وكمان خروجه من الموت اتسبب في وفاة اتنين، حارس المقابر وستي، الموضوع ما انتهش لحد هنا وبس لأدّة مراته لما عرفت إنه عاش من تاني ورجع للحياة طلبت منه الطلاق!!

وقالت إن دة مستحيل يكون هو، أكيد دة عفريت وأنا مش هعيش مع عفريت، عمي صعبت عليه نفسه ومكنش يعرف إن خروجه من القبر هيعمل كل دة، بس الموقف دة علمني درس مهم جداً، وهو إنّي لازم لازم أكون مستعد لليوم اللي هقابل فيه ربنا، وبقيت كل دقيقة أفكر في ظلام القبر والعزلة عن الناس، ويا ترى لو كنت مكانه كنت هعمل إيه؟ لو اتدفنت حيّ هيجرالي إيه وهخرج ازاى؟ اللي شاغل تفكيري أكثر هو سؤال الطفل الي قالي "هو راجع لينا امتى" معرفش كان يقصد إيه بالسؤال دة وهل كان عارف أنه عايش وهيرجع؟ الله أعلم.

"تمت"

"مُعالِج رُوحاني"

دايماً الحاجات الغريبة والغامضة في الكون بتاعنا بتبقى مُريبة حبتين، وبالذات لو الحاجات دي بتحصل مع شخص عايش معانا وبيتأذي منها وبنروح نعالجه..

أنا "أيمن شحاتة" .. مُعالِج رُوحاني وبعالج الممسوسين بالسحر والأعمال، كان بيعدّي عليا حالات صعبة جداً بس كنت بخلصهم من الأذى بفضل الله، ولكن سبب اعتزالي الشغلانة دي كان بسبب حالة لشاب من القليوبية بدون ذكر اسمه، أنا قبل ما اروح كنت مستغرب حالته لأنه بيحكلي حاجات صعب الإقتناع بيها شوية، المهم لما أهله طلبوا مني أسافرهم وروحت هناك ووصلت عندهم، حببت أعرف الموضوع كله من البداية وطلبت منهم إنهم يسيبوني ساعة زمن مع الشاب دة، وبمجرد ما بقى المكان خالي من الناس بدأت اتكلم معاه وكان طبعي جداً وبيجاوبني وبيضحك وبيهزر، لحد ما قالي أنا هحكلك اللي محدش يعرفه..

"أنا قبل ما اتجوز كان عليا جنيّة، وكانت بنت ملك كبير من عشائر الجن، وكانت عايزاني اتجوزها واروح معاها العالم بتاعهم بالرغم إني كنت خاطب وقتها، بس هي كانت بتظهرلي في أوقات غريبة، زي بين العصر والمغرب، أو لما آجي أنام ألاقىها قاعدة على طرف سريري، كان شكلها جميل بصرحة وشعرها أسود وطويل جداً جداً لدرجة أنه لامس الأرض، كانت بتقنعني إن الحياة عندهم جميلة بس أنا كنت رافض، ولما ميعاد الجواز قرّب بدأ يحصلي مشاكل في جسمي وبقيت بتعب، وبقيت بعمل عمليات كثير في صدري وفي عمودي الفقري، واضطريت اعمل تأجيل للزفاف، والتأجيل استمر لأسابيع وشهور، وبدأ حُبها ليا يتحوّل لغضب وشر وانتقام مني، قابلت شيوخ كثير جداً وكل واحد كان بيديني كلام مختلف عن اللي قبله، جيه وقت الزفاف واتجوزت أنا وخطيبتني والموضوع عدا بسلام والحمدلله، في أول أسبوع في الجواز كانت حياتي كويسة وكله تمام، تاني أسبوع بدأت أشوف حاجات غريبة في البيت، زي مثلاً ابقى سايب أوضة النوم مكركة ومراقي في الشغل، ارجع الأوضة ألاقىها مترتبة وكل حاجة فيها منتظمة، مراقي كانت فكراني أنا اللي برتب الشقة وبغسل المواعين وبعمل كل حاجة، بس أنا كنت عارف مين السبب، بعدين لما مراقي بدأت تشك فيا وتقول أنت أكيد بتجيب حد الشقة من ورايا، قررت إني أعالج نفسي بنفسي، وجيبت بخور وآيات قرآنية تحبس أي جن، وجيبت زجاجة مياه فاضية وقرئت عليها الآيات القرآنية وحطيت فيها دخان بخور وسيبت الغطا

مفتوح، تدريجياً كنت شايف الخيال بتاع الجنيّة وهو بيتسحب ويدخل في الزجاجة وروح قافل الغطا عليها، وحبتها في قزاة حرفياً والخطّة نجحت، لدرجة ان القزاة كانت ثقيلة وخبيتها فوق الدولاب، مع مرور الأيام كُنت بسمع أصوات صريخ بعيدة جداً بس أنا عارف إن الصوت دة منها وكنت بكابر كثير ومراتي كانت واخدة بالها من الي بيحصل، لحد ما في مرة مراتي جت توضّب البيت ونزلت الحاجات الي فوق الدولاب وكان من ضمنهم القزاة وكانت ثقيلة، هي أخذت بالها إن وزنها ثقيل بالرغم إنها شفافة وباين إنها فاضية، بس فضولها أخذها بأنها تفتحها وأول ما فتحتها أغمى عليها، ولما رجعت من شغلي دخلت الأوضة لقيتها مغمى عليها والقزاة جنبها مفتوحة، بمجرد ما أخذتها وروح المستشفى لقيت موبايلى بيرن، رديت لقيتهم جيرانى يقولولى شقتي ولعت، من أولها لآخرها بقّت قايدة نار، واضطريت أعيش في شقة إيجار مؤقتاً، وحياتي أصبحت جحيم ومتبهدة على طول وعلاقتي بمراتي ازدادت سوء، وبعد سنة خلفنا طفلتين توأم، وكانوا بيعيطوا كل يوم لفترات طويلة ويصرخوا جامد، حرفياً حياتي اتبهدت لدرجة إني قررت انتحر، بس مراتي وقفت معايا واستمرت لسنة كمان في العذاب دة، لحد ما في مرة دخلت البيت لقيت مراتي وعيالى مدبوحين والدم مغرقهم!!"

أنا كُنتُ بسمع للشاب دة بلهفة وعارف أنه مش بيكذب، وحكالي بلاوي بصراحة وكان قلبي بيتقطع على الي حصله، بس قررت اساعده وأعالجه، وكان يوم أسود..

استعنت بتلاثة تاني من عيلته وحصّنت المكان وحصّنتهم شخصياً وحصّنت نفسي، وبدأت أقرأ عليه قرآن واستعنت بآيات الحرق على طول، واضطريت احرق الجنية الي كانت عليه بعد صراع وعذاب طويل، حياته استقرت شوية لكنه رجع كلمني بعد أسبوعين بالظبط وقلالي إن الموضوع رجعله تاني!!

بس لما وصلت عنده وكشفت عليه لقيت حاجة غريبة جداً، الي اكتشفناه مؤخراً أنه مكانش عليه جنية واحدة بس، دي كانت عائلة كاملة من الجن والسُلطان نفسه كان مسيطر على دماغه وعقله، ولما اتكلمت مع السلطان بتاعهم قلالي إنه مش هيسيه إلا لما يحرقه زي ما أنا حرقت بنته، وإنهم كانوا عايزينه يتجوز بنتهم بالغصب ويعيش معاها، الصدمة الكبيرة بقى أني لما قرئت قرآن عشان احرق السلطان بتاعهم لقيته بيضحك بسخرية ويكمل معايا آيات القرآن، أنا كان قلبي بيدق جامد وكنت خايف على الشاب نفسه وكنت كل ما أقرأ آية معينة ألاقه هو كملها معايا ويقرأها هو كمان، احتارت ومبقيتش عارف اعمل إيه، جيت مسك ومياه مقري عليها قرآن وكيبتها عليه لقيت جسمه بيطلع بخار، وكأن جسمه هو بيتحرق والجن الي عليه بيضحك بصوت عالي

ونبرة خشنّة جدّاً، وماكنش صوت واحد بس دة كأن فيه شلة رجالة قاعدين مع بعض وييتكلموا بصوت عالي باللهجة المصرية ويتريقوا عليا، وواحد يقول للتاني "سييني أنا عليه أنا عارف تمامه"، والتاني يقوله "سييه يكمل شغله متقطعش أكل عيشه"، وأنا قاعد سامعهم وحقيقي أول مرة يعدي عليا موقف زي دة، ماكنتش اعرف إن العشيرة دي من الجن المسلم وأنهم كانوا طيبين ويحبوا يخدموا الناس، لولا أنه حبس بنتهم في قزازة وهما غضبوا عليه وقتلوا مراته وبناته، أنا كملت شغلي واستمرّيت بالمكابرة قدامهم وبقيت بقرأ بصوت أعلى وأعلى واجيب مسك وامسح راس الشاب وامسح على عيونه، وفجأة لقيته فتح عينيه وبرق لي جامد وقام من مكانه بحركة سريعة وراح ماشي على الحيطّة وطلع على السقف وقعد فوق المروحة، وأنا قاعد مع باقي عيلته في زهول شديد ومش مستوعبين الي بيحصل، واحد من الي قاعدين قالي اشغل المروحة ياشيخ!! راح الجن الي على الشاب رد عليه وقاله "آه ياريت عشان حران هاهاها" وبعدها بدأ يشتم ويهدد بالقتل ويقول مش هسييه ومش هسييكم، العالم كله غضبان عليكم وهتشوفوا أسوء أيام حياتكوا وكلام من هذا القبيل، وبعدين لقيته مرة واحدة نط من فوق المروحة ووقف على الأرض، بس مكانش لامس الأرض وكان شبه طاير فوق الأرض بمسافة بسيطة، هنا بقى بدأت ملامحه تتحول وبدأ وشه يبقى أحمر بلون الدم، وعينه توسع، أحنا أصلا كنا مكتفينه بحبل جامد بس الي عليه قطع الحبل وقدر يتحرك بسهولة، أنا دماغِي

اتشتت أكثر بس افتكرت إني كنت على معرفة بشيخ ثاني ليه كرامات مع ربنا وتواصل كبير، جريت برا البيت واتصلت عليه وأنا عارف إنه من القليوبية وقريب من هنا، وخلال خمس دقائق كان الشيخ "أبو الفضل" وصل عندي وأول مادخلت البيت معاه لقيت الشاب وقف مصدوم قدأما وقال بنبرة عالية وغلظة "هو أنت جيت؟؟" ولقيته بيص على الشيخ أبو الفضل ويرتبك في الكلام، الشيخ أبو الفضل أول ما شافه قاله "أنا كل مرة بطلعك من شخص مش برضى أحرقك لأنك مسالم ومبتأذيش حد، لكن المرة دي أنا مش هسيبك تعيش ليوم ثاني" ..

وبدأ الشيخ أبو الفضل يشمر الكُم بتاع الجلالية ودخل مسك راس الشاب ورفع من الأرض وقال بصوت عالي.. "وعزتك وجلالك يا الله، أن تقضي على كل من هو مؤذي ويريد الخراب، وعزتك وجلالك يا الله أن تلهم هذا الشاب السكون والراحة"

وكمل كلامه وقرأ قرآن بآيات الحرق الي أنا قريتها وطبعاً خلال الدقيقتين دول أنا كنت سامع فيه خناقة وحرب جوة الشخص دة، وحقيقي فيه حاجة جواه باظت في جسمه، وفعلأ بعد ١٠ دقائق بالظبط الشاب وقع من طول له مُغَمَى عليه وجسمه بيتنفض، ويطلع ريمة من بوقه ويكح، انا وقتها عرفت إني مقدرتش أعالجه وإني لا أصلح لهذا الشيء، وبقينا على تواصل مع أهل الشاب دة وقالوا إنه خَفَ وبقى

طبيعي عن الأول بكثير بس عنده أَلْتِهَابٌ فِي الرِّئَةِ وَيَبْكُ دَمًا، ودايمًا عنده صداع نصفي مش مفارقُه، ودي كانت الآثار اللي سابوها العشيرة اللي كانت عليه، بس بقى كويس من ناحية الجن ومبقاش عليه حاجة وحياته رجعت طبيعية، أما أنا بقى فأنا مش كبير، أنا سني ٣١ سنة وقررت أعتزل الشغل دة، ودة لأسباب كتيرة مش شرط اذكرها، بس كل اللي عايز افهمه إن ازاي دة حصل؟؟ ودة السؤال اللي جاوبني عليه الشيخ أبو الفضل وقلّي إن الشاب دة كان بعيد عن ربنا، ويشرب محرّمات كتير وجسمه مكانش طاهر باستمرار، وعناده مع البنت الجنية دي كان سبب كبير إنهم ينعندوا معاه ويحتلوا جسمه، ولكن السبب الرئيسي أنه كان عنده فضول بتحضير روح تصاحبه طول الوقت، ولما عمل دة انقلب عليه بالشر..

الشيخ أبو الفضل كان راجل دارس وفاهم في المجال دة كويس جداً، عنده حوالي ٤٧ سنة وقلبه قوي، أنا اللي هزني فعلاً وخلاقي مقدرتش استوعب الموقف لما قرّيت عليه قرآن ولقيته بيردد معايا الآيات، والحمد لله أنا دلوقتي مبروحش حالات خالص ولا بعالج حد بس اللي بيحتاج مساعدة بساعده..

كون إنك تكون بعيد عن ربنا أو بتعمل حاجة غلط فدة سبب كبير

في أنه يحصل لك مشاكل في حياتك بالشكل دة، خصوصاً لو بتدور على
شخص تصحبه معاك من العالم الآخر، وإلا هيتتهي بيك المطاف إلى ما
لا يُحمد عقباه..

"تمت" ..

"دُمى مسكونة"

أنا عايز أعرفكم على أصحابي، آه الدُمى والعرايس دول أصحابي، بيتكلموا معايا ويساعدوني في حاجات كتيرة..

انا أوضتي كلها ألعاب أطفال وعرايس، في عيد ميلادي كانوا بيعجبولي هدايا كتيرة جداً وبحتفظ بيهم في أوضتي، كُنت بحب اتكلم مع العرايس واحس أنهم أصحابي، ولما كبرت بقيت بعمل نفس العادة لأن معنديش أصحاب ولا حد أكلمه، أنا دلوقتي ١٦ سنة وسنجل ومش بصاحب حد ولا حد بيرضى يصاحبني، مكانش ليا في حياتي غير العرايس وبس، أهلي كانوا مانعيني من الخروج وقالولي أنه بسبب ملامحي الجميلة بزيادة كانوا خايفين عليا من أي حد، انا والدي مصري بس والدتي من الأرجنتين، بابا كان شغال في السياحة وقابل ماما زمان واتفرفوا على بعض واتجوزها وعيشنا فترة كبيرة في الأرجنتين، في محافظة "بوينس أيرس" تحديداً في مدينة "لابلاتا" .. وجينا مصر من كام سنة كدة وبقينا مُقيمين هنا، كانوا بيقولولي أنت ممنوع من الخروج عشان خايفين عليك من الحسد، بحُكم شكلي اللي واخد من ملامح ماما والشعر الأصفر والعيون الملونة والبشرة الفاتحة، سمعت كلامهم

واهتميت بالموضوع وفضلت قاعد في أوضتي لحد ما جالي توحد تقريباً وكُنت بكلم نفسي، وساعات بكلم العرايس والألعاب، كان موضوع روتيني جداً حتى لما العرايس بترُد عليا ويتكلموا معايا كنت بحس إن الموضوع طبيعي ودة عادي، مكنتش اعرف العالم الخفي والماورائيات..

وفي يوم الساعة ١٢ بالليل كُنت بحاول أنام في سريري، أوضتي كانت ضلمة وفيها إضاءة بسيطة من الأباچورة اللي جنبي، كُنت باصص للنور دة وبعد من ١ لحد ١٠٠ عشان أنعس وأنام، بس وانا بعد وصلت للرقم ٥٨ ولقيت الأباچورة قفلت وانطفت لوحدها..

وبعد دقيقة كدة راحت اشتغلت تاني، كنت نسيت بقى انا وصلت للرقم كام وقعدت أفكر في سري وأقول وصلت للرقم كام، وصلت للرقم كام!! وفجأة سمعت صوت من الدولار بيقولي "رقم ٥٨" !!

على ما قد ما كُنت واخذ على الأصوات الغريبة من العرايس دي بس المرة دي حسيت إن روحي اتسحبت وكُنت خايف جداً، غطيت وشي بسرعة بالبطانية وبعدين الأباچورة انطفت تاني، بس المرة دي فضلت مطفية ومثورتش نهائي، وسمعت صوت حد بيضحك جوة الدولار برضو، قُمت من السرير على أمل إن ألاقى حد من العرايس صاحي ويتكلم معايا زي كل يوم، بس المرة دي ملقيتش عرايس، لقيت واحد جسمه زي جسمي قاعد في الدولار ولا بس قناع في راسه وعينه بس اللي باينة، أنا رجعت ورا بسرعة واتصدمت وكنت

خايف جامد، ولقيته قام من الدولا ب وبيقولي "متخافش متخافش، أنا ميكي"، وصوته كان طفولي جداً زي صوت ميكي، وكَمَل كلامه وقال "أنا مش مرتاح في دُمِيَة ميكي فأنا ظهرت بشكلي الطبيعي يا صديقي متخافش مني"، يمكن عرفت أهدأ شوية من نبرة صوته الي مليانة براة وطمأنينة، وبعدين قُمت من الأرض وهو خرج من الدولا ب وقال "أنا زمايلي خرجوا من كُل الدُمِيَات برضو، وقررنا أننا هنعيش معاك بطبيعتنا عشان أنت إنسان طيوب وغلبان"، بدأت اتكلم معاه واطمن أكثر وبعدين لقيت الدولا ب فتح تاني وبيخرج منه شخصين لابسين نفس القناع ونفس هيئة جسمه، في الأول كُنت خايف منهم بس "ميكي" طمني أكثر وقال دول أصحابك في العرايس برضو، كُنت مبسوط معاهم بس مكتتش عارف هما ليه بيخطفوا بالنهار ويظهروا بالليل بس!

وبابا وماما مكانوش يعرفوا حاجة وفي مرة ماما دخلت علي الأوضة بالليل وانا كنت بكلمهم، قالتلي انت بتكلم مين؟ قُلتها لا أبداً أنا كُنت بغني بس، وسابتني وخرجت برا وكان باين علي ملامح وشها أنها إكتشفت حاجة جديدة، اليوم الي بعده كُنا قاعدين نفطر علي السُفرة الصبح ولقيت ماما بتقولي "ميكي عامل إيه؟"، أنا اتوترت شوية بس كُنت عارف إن قصدها علي الدُمِيَة لأن في الفترة الأخيرة هي شافتني وانا بعمل كمادات لميكي عشان قُلتها أنه تعبان، فقُلتها هو خفّ وبقي كويس وكدة، وبعد ما خلصنا فطار قالتلي جهّز نفسك

عشان هنسافر بلدنا الثانية قريب، أنا زعلت شوية بس لما افكرت إن أصحابي هيكونوا معايا فرحت جداً، كان يوم الجمعة اليوم دة وفضلت مستنيهم بالليل بس محدش منهم ظهر خالص، اتضايقت ونمت زعلان، بس وانا نايم كنت بحس أن فيه حد بيلعب بصواب رجلي من تحت، ولما كُنت بقوم أشوف مكنتش بلاقي حد، وشوية واشوف خيال حد واقف جنب السرير بتاعي بس لما أركّز فيه ألاقه أختفى، كُنت هتجنّ، لدرجة إني لما خلاص دخلت في النوم كُنت حاسس بإيد حد بتحسس على شعري، وانا الحركة دي بتخلينى أنام بسرعة، وبالفعل نمت بسرعة، ولما صحيت الصبح لقيت أثر خرايش في رجلي وشعري متقطع، كأن حد كان بيشده جامد، قُلت أكيد دول هما اللي عملوا كدة وبصراحة زعلت منهم وجيبت مياه سُخنة ورميتها جوة الدولاب، وسمعت صوت صريخ جامد وحد بيتألم، طلعت أجري برا ندهت ماما ودخلت معايا لحد الدولاب ولقينا نُقْط دم جوة الدولاب، وهي استغربت لما شافت شعري المتقطع ورجلي المخربشة، ومن هنا بدأت العداوة بيني وبين أصحابي وماما فضلت كل يوم تشغل قرآن في البيت وبتجيب مصحف تحطه جنبني وانا نايم وبقيت بنام مطمئن بس أصحابي محدش فيهم بقى بيظهر تاني، حتى رجعت أكلّم العرايس والألعاب ومحدش بيرُد عليا، بقيت أنام كُل يوم واصحى طبيعي لحد ما جيت في مرة حطيت المصحف برا الأوضة ونمت، وصحيت لقيت جسمي مليان خرايش ومتعور جامد ودم كثير بينزل من مناخيري وكأن حد

ضريني بالحديدة في وشي، أنا مكانش في بالي وقتها إن العرايس ممكن تعملي كل دة، بس الغريب في الموضوع إن الخرايش كل يوم بتزيد وبقيت بصحى ألاقى جسمي واجعني جداً كأن عربية داست عليا، كل دة كان بيحصلي وانا طفل صغير ومش مستوعب الدنيا حواليا، ماما جابتلي شيوخ كثير ودكاترة نفسيين بس مفيش حاجة نافعة، بدأت ملامح وشي تتغير وشكلي بقى قبيح جداً وشعري بيقع ووشي ظهر فيه بقع سودة وفيه سواد غامق تحت عيني وحرافياً بقى اللي يشوفني يتخض مني ويهرب، كنت بحلم أحلام غريبة وكنت بشوف العرايس كلها ملمومة حواليا وبيخنقوني ونفسي بيتقطع لحد الموت وابدأ أفوق من الحلم، الأسبوع الأخير قبل السفر دة كان أسبوع الجحيم بالنسبالي لكثرة الحوادث اللي حصلتلي فيه..

أول حاجة صوابع إيدي اليمين اتقطعوا، ودة لما كنت باخد دش بالليل وبمجرد ما حطيت الشامبو على راسي بدأت احس إن فيه حد معايا، وفيه هوا سُخن حواليا وغسلت وشي بسرعة وحوشت الشامبو وبعدين خلصت ووقفت قدام المراية، كنت ببص على شكلي الشاحب وزعلان على اللي حصللي، وأول ما جيت أمشي لقيت المراية اترفعت من مكانها ووقعت على الأرض، انا جيت امسكها وحطيت إيدي تحتها عشان امسكها وماتتكسرش بس محسيتش بنفسي غير وأنا بشوف

صوابعي بترمي قدامي وبتتقطع من تحت قزاز المראה، صرخت جامد وبابا وماما جُم دخلوا عليا الحمام ولفولي فوطة على جسمي وخرجوني برا ولبسوني هدومي ونزلوني المستشفى، وبقت إيدي مربوطة من غير صوابع، حالتي النفسية ازدادت سوء وباقي ٦ أيام على السفر، اليوم الثاني في أسبوع الجحيم بعد ما خلصنا فطار كالعادة وإيدي مكنتش حاسس بيها من البنج، دخلت أوضتي وقعدت على سريري وحطيت البطانية على رجلي، وبعد دقائق شوفت البطانية وهي بتتسحب من على رجلي قدام عيني، اترعبت وعيني وسعت ومبقيتش عارف اعمل إيه بس كل اللي جه في بالي إنهم موجودين حواليا، كُنت طول اليوم بشوف خيال حد طائر في سقف الأوضة وكُنت بشوفه بملامح واضحة جداً، وساعات بشوف حد واقف ورا باب الدولااب ولابس قناع في وشه وماسك سكينه في إيده ويبصص ليا بعين واحدة والعين الثانية مقفولة، اليوم دة نمت مع ماما وبابا في أوضتهم والليلة عدت على خير، اليوم الثالث والرابع كان عندي فيهم صُداع رهيب وكان مأثر على عيني ومكنتش شايف كويس، في الغالب اليومين دول خلصوا في الأدوية والنوم بس، واليوم الخامس نزل بابا وماما يجيبوا حاجات السفر وسابوني في البيت لوحدي، كُنت قاعد بتفرج على التلفزيون في أجواء صامتة، وفجأة التلفزيون قفل لوحده، جيبت الريموت وشغلته تاني وبعد شوية لقيت القناة قلبت على قناة تانية، والريموت مش في إيدي، جيبت الريموت عشان أرجع القناة رُحت سمعت صوت ماما بتنادي

عليها من الأوضة، كُنتُ فاكراً أنها منزلتُش ودخلت الأوضة وهنا شُفت المنظر الي مكنتش حابب إني أشوفه طول عمري، لقيت ماما قاعدة فوق الدولاب وشعرها نازل على وشها، ووشها أصلاً كُلّه دم، وبتبص ليا بنظرات خلتنِي أبلّ هُدومي، طلعت أجري على باب الشقة عشان أنزل لقيت باباً جَهْ فِي وشي وماما جنبه ومخضوضين عليها، حكيتلهم الي حصل ودخلتهم الأوضة بس مكانش فيه حد، وقعدوا يقولولي إنها تهيئات وكدة واضطريت أصدقهم عشان بثق فيهم، قعدوا يفرجونني على حاجات السفر وفي اليوم الأخير قررنا نساfer ونزلنا روحنا المطار وبعد ساعات طويلة وصلنا الأرجنتين وبقينا عايشين في بيتنا هناك، بس مبقاش يحصل ليا أيّ حاجة خالص، وعدت سنة عليها وانا كويس جداً وعايش طيبعي، وأصحابي الدُمي سيبتهم في الشقة القديمة دلوقتي عايشين فيها، في الفترة الأخيرة كُنت بشوفهم في الحلم يقولولي أنهم مفتقدين اللعب معايا وكيان بيهددوني أني لو مرجعتش البيت دة بسرعة هما هيغادروا البيت والعرايس ويشوفولهم صديق جديد يسكنوا في العرايس بتاعته، مش عارف دلوقتي هما مشيوا من العرايس بتاعتي ولا لسة موجودين، بس أنا مبقيتش أحلم بيهم وفي الغالب هما سكنوا عرايس حد وعايشين فيها، بس معرفش مين سعيد الحظ.

"تمت"

”لحم البشر لذيذ“

إيه اللي هيحصل لو أنت فاتح مطعم لحوم وفجأة الزمن جه عليك وبقيت فقير ومبقاش عندك بضاعة؟ والناس كل يوم تسألُك عن اللحمة بس أنت غصب عنك مش عارف تشتريها من التُّجَّار، ساعتها هيوصل بيك الأمر بأنك هتختار أكثر حد بتكرهه في حياتك وتدبحه وتقطع لحمه وتبيعه للناس في المطعم !!

دة اللي حصل بالظبط سنة ١٩٩٦ ميلادياً..

كان فيه متجر لبيع اللحوم في الولايات المتحدة بيع لحم الخنزير للشعب الأمريكي، المطعم دخل في أزمة مالية ومبقاش عارف يجيب لحمة عشان يبيعها، والزباين بتمشي، لكنهم بيرجعوله تاني يوم وبرضو مش بيلاقوا اللحمة، المطعم دة كان مشهور بأنه أفضل مكان بيع عمل لحمة، كان مطعم وجزارة في نفس الوقت بالرغم من صغر حجمه، ومتقسم لصالة مأكولات، ومخزن للدبح والجزارة، وكان مخبي في الجزارة كلاب بوليسية شرسة لوقت الزنقة، والدنيا كانت ماشية تمام مع صاحب المحل دة لحد ما فجأة خسر فلوسه بسبب لعب القمار، وحصلت مشكلة بين

صاحب المتجر ومراته بسبب قلة الفلوس، ولما الخناقة كبرت هو مكنش واعى لي قدامه وكان سكران، ومن سوء الحظ إن الخناقة حصلت في مخزن المطعم، والمخزن مليان بقى سواطير وسكاكين من كل الأنواع والأشكال، وفجأة وبدون مقدمات قام ماسك ساطور وحذفه عليها وجه في نص راسها بالظبط وقسم الجمجمة نصين، وقعت الزوجة على الأرض جثة هامدة، ارتبك جداً ومكنش عارف يعمل إيه بس كل اللي جه في باله إنه يخبي الجثة لأنه خاف من الشرطة وأنهم يلاقوا جثتها، الباشا عمل خطة ذكية حبتين، أخذ جثة مراته ودخلها في الجزارة وقطع أعضائها وحطها في أطباق بلاستيك وغلفها بكيس شفاف، وبدأ يعرضها في المحل على أنها لحم خنزير، الزباين فرحت جداً لما جُم ولقوا ان فيه لحمة من اللي متعودين عليها، وبآداء سريع باع كل الكمية للناس بدون ما حد يلاحظ، المفاجأة بقى أن تاني يوم نفس الزباين جت وطلبوا كمية أكبر من نفس اللحمة اللي أخذوها المرة الفاتت، قاهم تمام موجودة وباعلهم لحم الخنزير اللي كان اشتراه بفلوس بيع لحم مراته، وفي اليوم الي بعده جُم نفس الزباين وقالوله ان اللحمة دي طعمها وحش وعايزين نفس اللحمة اللي اخدوها أول امبارح!!

الراجل فهم أنهم قاصدين لحم مراته، ووعدهم إنه اتعاقد مع شركة سويسرية للحوم وفي خلال أسبوع هيجيب منها تاني، ساعتها وقع في حيرة أكبر، دة حتى لحم الخنزير الي كان يبيع منه كميات مهولة في اليوم بمقاش حد يشتريه خلاص بسبب انهم لقوا لحمة أنصف وأطعم من

لحم الخنزير، بس طبعاً هما في إعتقادهم إنها لحم خنزير بس نوع غالي، وبالفعل خلال ٤ أيام كان يسافر أماكن مهجورة ومناطق سياحية نادرة جداً عشان يصطاد ضحاياه، وكان بينقيهم بعناية لأن كان يُقال إن لحم الإنسان النباقي ألدّ من لحم الإنسان الي بياكل لحوم، بدأ يستدرجهم في استضافة للمطعم والي كان يخططله نجح فيه وكان بيصطحبهم للمخزن ويقتلهم بالغدر ويقطعهم، وينصف لحمهم كويس ويبيعهم على أساس إنهم لحم خنزير، حتى الشرطة المسؤولة عن المنطقة دي بقوا مدمنين طعم اللحم الجديدة وصاحب المتجر بقى غني جداً لأنه بيع أضعاف الي كان يبيعه في الأيام العادية، وساعتها اكتشف إن يوم وفاة مراته كان يوم الهنا والسعد، بس الخايب مصيره يقع ..

في يوم من الأيام أهالي المنطقة كانوا يسمعون صوت صرير جاي من متجر اللحم، والصوت كل يوم بالليل بيزيد، ولما بيروحوا المتجر بيلاقوه مقفول ومفيهوش حد، لدرجة أنهم بلغوا الشرطة عشان يشوفوا حل للموضوع ده، ولما الشرطة راحت لبيت صاحب المتجر قالهم أنه ميعرفش حاجة عن الموضوع ده، ساعتها اصرروا انه لازم يجي معاهم ويفتحلهم المتجر، وبالفعل راح هناك وهو واثق أن مفيش حد عايش جوة وكل الضحايا هو مقطعهم وحاططهم في أطباق في التلاجة، بس هو كمان أول ما وصل المتجر سمع صوت صرير طالع من جوة، وماكتش صوت بشري، كان صوت ضخم شوية شبيه بصوت الجن، الأهالي قالوا إن المتجر مسكون بالأرواح، بس الأرواح دي جت منين؟

الشرطة كسرت الباب ودخلوا جوة وراحوا لمصدر الصوت الي كان طالع من المجزرة الي جوة وساعتها شافوا دبان كثير جداً ملموم فيها، دة غير إن فيه ريحة بشعة طالعة من جوة المخزن، وبالرغم من إنه كان عامل حساب اليوم دة ومضطرب دنيته وخافي الأعضاء البشرية، إلا إنه كان بينسى ينصف الحوض الي بيغسل فيه اللحمة دي، وبالصدفة لما الدبان اتلم على وش الطابط قرر إنه يغسل وشه وراح ناحية الحوض واتفزع من المنظر الي شافه في الحوض،لقى قرنية عيون مرمية جواه، ولسان بشري وجمجمة متكسرة تحت صغيرة وصوابع متقطعة، وقتها أمر العساكر الي معاه إنهم يقبضوا على صاحب المحل فوراً..

صاحب المحل بأشارة واحدة قدر إنه يندة على الكلاب الشرسة الي جت بسرعة وهاجمت الطابط والعساكر، وهو استغل الموقف ومسك الساطور ونزل ضرب فيهم لحد ما قتلهم كلهم، وكانت صفقة حلوة بالنسبale وبضاعة جاهزة، عمل فيهم نفس الي عمله في ضحاياه وقطعهم وعباهم في أطباق وعرضهم للبيع، كان فيه محتويات متعلقة بالظابط والي معاه زي سلسلة عليها صورة مرات الطابط، وكمات خاتم زواج، احتفظ بالمقتنيات دي في مكان سري داخل الجزيرة، واستمر في شغله وباع أكثر وكسب أكثر، بس مكش عايز يجيب لحمة الخنازير الرسمية لأن الزباين مبيتش تشتريها، وقتها قصة اختفاء الطابط والعساكر انتشرت، وأهل الحي قالوا ان آخر مرة شافوا الطابط لما كان في متجر اللحمة، وبالفعل نزل قوة كبيرة من القسم تفتش عن سبب

اختفاء الظابط والي معاه وكانوا يبحثون لولا يلاقوا طرف خيط أي حاجة توصلهم لمكان الظابط، المشكلة ان كل الظباط دول زباين المطعم من زمان وعارفين ان صاحبه راجل كويس ويكرهمهم في الأكل وفي دفع الحساب، ودة الي كان مخليهم صارفين النظر عنه، بس فيه سر خطير انكشف مرة واحدة وهو إن الكلاب الشرسة كانت بتخرج من الجزاراة أحياناً وأسنانهم بتنقط دم، ودة الي شكك البوليس في إنه بيع لحم كلاب، ولما جالهم أمر بتفتيش المطعم والمخزن نزلوا على طول يفتشوه ويتفحصوا كل خطوة فيه، وأثناء ما كانوا متواجدين في المخزن مع صاحب المطعم لاحظوا إن بلاط المخزن مكسّر ويتحرك تحت رجليهم على حسب حركة المشي والوقوف بتاعتهم، ودة الي خلاهم يشيلوا البلاط فوراً والصدمة الكبيرة لما لقوا تحت البلاط مقتنيات الظابط الي اتقتل والعساكر، والي كانت عبارة عن سلسلة عليها صورة زوجته وخاتم ومحفظة فيها هوية الظابط، وقبضوا عليه في نفس الوقت بتهمة قتل الظابط والعساكر، وبما إنهم كانوا قوّة كبيرة فالكلام مقدرتش تسيطر عليهم زي المرة الفاتت، ولما الموضوع كبر والطب الشرعي وصل المطعم، أكد لهم ان اللحمه دي مش لحمه خنازير، وإنه كان بيضحك على الزباين ويبيعهم لحمه بشر على أساس انها لحمه خنازير، ولما حققوا معاه اعترف إنه قتل زوجته عمد ومكنش عارف ينجي جثتها وقام بايعها للزباين في أطباق مغلفة، والموضوع مشي حلاوة واستمر فيه بسبب رغبة طلب الزباين للنوع دة من اللحمه، وبالرغم من أنه كان

جريء في اعترافاته، إلا أنه رد عليهم بكلمة واحدة بس لما سأله عن مدى خبرته بالعقوبة التي يحصل عليها، قالهم "أنا آسف، خرجوني ومش هكررها ثاني" ..

كان بيتكلم على أساس إنه دبح فرخة بالغصب مش أكثر، وأصبح عليه أكثر من ٥ قواضي بسبب القتل ويسبب غش في التجارة وبسبب اختطاف الناس وبلاوي ثانية كتيرة، ودة الي أصدر الحُكم عليه فوراً بالإعدام والمطعم اتشمّع ..

وبعد فترة من الواقعة دي تم إصدار سلسلة أفلام عديدة بتتكلم عن الأحداث والجريمة التي حصلت دي.

تفكر الجزار الي بتشتري منه لحم دة بيعلك لحمه مضمونة؟

"تمت"

"الجرعة الثالثة"

لا ينبغي قراءة هذه الجرعة إلا وفق إرشادات الصيدلي أو الطبيب الخاص بك، فبعد أخذ الجرعات السابقة أنصحك بالرجوع إلى الطبيب لتعرف مدى خطورة تأثير هذه الجرعة على خلايا الدماغ. (وجب التنويه).

"حامل من الجن"

كُنَّا فَاكِرِينَ إِنْ التَّوَاصَلَ بَيْنَنَا وَبَيْنَ الْعَالَمِ الْآخَرِ صَعْبٌ، لَكِنَّهُ طَلَعَ
مَوْجُودٌ فِي كُلِّ بَيْتٍ مِصْرِيٍّ، وَالْإِحْصَائِيَّةُ بِتَقْوِيلٍ إِنْ أَكْثَرَ نَاسٍ يَتَتَعَرَّضُ
لِلْإِتِّصَالِ مَعَ الْعَالَمِ الْآخَرِ هُمَا الْبَنَاتُ !!

"سندس" ١٦ سنة من محافظة الجيزة مقيمة في بيت مع أهلها، وحيدة أبوها وأُمها وكانت واحدة الدلع كله والاهتمام الزيادة، وبالرغم من صغر سنها إلا إنها كانت بتنام في أوضة لوحدها من وهي عندها ٤ سنين بس، ولما كبرت كانت شديدة الجمال، لحد ما خلصت الابتدائية ودخلت الاعدادية، وبدأت ملامح الجمال تبان أكثر عليها، لحد ما جه اليوم الي غير كل حاجة، واليوم دة هي كانت نائمة فيه طبعي زي أي يوم ولكن أهلها سمعوا صوتها وهي نائمة وبتصرخ وبتقول "ناضل .. نااااضل"، راحو لغرفتها لقوها نائمة على بطنها وجسمها بيتدش جامد وبتتألم وبتنطق الكلمة دي كتير لعدة مرات ورا بعض، بس كل دة بيحصل وهي نائمة، جريوا عليها حاولوا يصحوها ولمحاولات كتير صحيت في أيديهم وفاقت وكانت كويسة جداً، وبتقولهم إنها مش حاسة بنص جسمها التحتاني!!

لكن بعد ساعات قليلة بدأت التتميلة تخف من جسمها ورجعت لطبيعتها وأهلها اطمنوا عليها وافتكروا إنها بتحلم مش أكثر، وسابوها تكمل نوم وراحوا غرفتهم، اليوم الي بعده في النهار وأثناء الفطار كانت البنت ملامحها مبتسمة ابتسامة غريبة، بخلاف الأيام العادية الي كانت طبيعية فيها، والابتسامة كانت بسيطة ويمكن يكون سببها هو السعادة الداخلية والسكون النفسي ليها، بس ساعات لما بتتكلم كان بيطلع منها صوت خشن شوية، نبرة مش نبرتها، والي أثار الجدل أكثر إن نمو شعرها بدأ يطول بشكل مبالغ فيه، وكمان حواجبها بقت ثقيلة، وفي الليلة الثانية كانت نائمة لوحدها برضو، والأهل راحوا يطمنوا عليها في غرفتها بس لقوها مش موجودة والسرير فاضي!!

هتكون راحت فين في عز الليل؟

راحوا يدوروا عليها في باقي أنحاء الشقة، بس الصدمة أصابتهم لما لقوها واقفة على باب الحمام وباصة ليهم ومبتسمة وواقفة بدون حركة ومحتضنة الدبدوب بتاعها، والجو مُظلم حوالها، استغربوا من تصرفها ده وأخذوها ورجعوها غرفتها واطمنوا عليها ومشيو، تاني يوم بيسألوها عن سبب وجودها في الحمام في التوقيت ده من الليل بس صدمتهم أكثر وقالتلهم إنها مخرجتش من أوضتها أصلاً!!

وحتى لو هتروح الحمام طب ما أوضتها فيها حمام جنب السرير، هتروح الحمام الثاني ليه؟

بدأت التساؤلات تزيد عندهم والاستغراب والخوف على بنتهم من أي خطر، ومرت الأيام والأسابيع على الحال دة وهما مش فاهمين قصة بنتهم إيه، والي زاد غرابة أكثر إنهم بيلاقوا اسم "ناضل" في كل حنة، يعني مكتوب على التلاجة بقلم فلوماستر مثلاً، أو مكتوب على الكتب بتاعتها أو على إيديها بقلم جاف، ولما كانوا بيسألوها عن الاسم دة كانت تقولهم إنه "صديقها العزيز" .. طب جه منين صديقها دة وأصلاً المدرسة بتاعتها مش مشتركة، وهي معندهاش حسابات على مواقع التواصل الاجتماعي ولا بتختلط بالولاد في أي مكان أصلاً، اللي أثر في نفسية البنت إن تعامل أهلها معاها اتغير، دة ساعات كانوا بيروحوا غرفتها يلاقوها نائمة في الدولاب، ومرة تحت السرير، وبتقول إن الأماكن دي مفضلة ليها !!

وبعد مرور عدة شهور البنت لاحظت حاجة غريبة جداً، وهي إن بطنها كبرت !!

زي ما يكون عندها انتفاخ بسيط شوية وكم إن كانت بتوجعها جداً جداً، كانت خايقة تقول لأهلها رغم إنها متعرّش السبب وبقت تلبس هدوم واسعة جداً بحيث إن بطنها متظهرش ومحدث يعرف حاجة، بس هتعمل إيه بعد ٤ شهور مثلاً؟؟

وفي يوم كانت نائمة بالليل وصوتها كان عالي ونفس الصريخ بتاع

المرّة الفاتت وبتنطق نفس الاسم، الأب والأم جريوا عليها لقوا البطانية متشالة من عليها وهي واقعة في الأرض ونايمة على ظهرها ورجلها مرفوعة على السرير، والأغرب إنها كانت بدون ملابس وجم عشان يصحوها بس برضو مصحيتش، وفجأة بعد عناء كبير أغمى عليها وملاحها بقت شاحبة، أخذوها في العربية وراحوا بيها المستشفى، وأول ما الدكتور شافها كان مستغرب جداً من ملاحها وكمان شاف بطنها المنفوخة بزيادة، ولما سأل الأهل عن السبب قالوله ما إحنا جايين عشان بطنها الي ظهرت مرة واحدة كدة بالشكل دة، هما كانوا فاكرين إن جالها تسمم مثلاً عشان كدة بطنها اتنفخت، بس الدكتور كان عنده وجهة نظر ثانية وكان شايف إن فيه حاجة جوة بطنها بتتحرك، وقالمهم لازم نعملها سونار، والمفاجأة الكبيرة بقى لما حطوا جهاز السونار على بطنها، ظهرهم في الشاشة إنها فاضية!!

يعني بكدة مفيش جنين في بطنها؟ الأهل اخدوا بالهم من الحاجة الغريبة الي بتتحرك جوة بطنها وقالوا للدكتور يتصرف قبل ما البنت يجراها حاجة، وقتها كانت البنت فاقت وبتحاول تستوعب هي فين، وأول ما صحيت كانت حاسة بألم رهيب في بطنها، وعلى حد قولها كانت بتتمتم بكلمات مش مفهومة، بس لما هديت أهلها استجوبوها وأصروا إنها لازم تحكيلهم عن السر الي في بطنها..

قالت لهم إنها كل يوم بالليل بتحس إن فيه شخص نايم عليها وبيمارس معاها العلاقة الزوجية بشكل كامل، وكانت بتبقى متقيّدة ومش عارفة تتحرك وكيان بوقها مكتوم وشبه مشلولة، الأمر الي خلاهم ياخدوها على دكتور نسا وتوليد عشان يكشف على عذريتها ويتأكدوا إن كلامها سليم فعلاً ولا هي بتقول كدة نتيجة هلاوس؟ ولما كشفوا عنده قالمهم إن غشائها سليم تماماً!!!

طب معنى كدة إن البنت بتكذب ومفيش حد لمسها ولا جه عندها، طب وبطنها دي إيه الي عمل فيها كدة، الغريب في الموضوع إن كان فيه خرايش على دراعها وظهرها ورقبتها، وموضوع "سندس" كان موضوع غامض جداً، قرايبها والجيران لما سمعوا عن موضوعها قالوا لأهلها إنهم لازم يعرضوها على مُعالج روحاني، هو الي هيعرف يشخص حالتها بعد عجز الدكاترة للتشخيص، وبالفعل راحوا المعالج روحاني مشهور في محافظة الجيزة وحكولوا عن الموضوع بالتفصيل، وهنا صدمهم بكلامه الي كان نازل زي الصاعقة على قلوبهم..

وقالمهم إن من طريقة كلامها ومن أثر الخرايش الي في جسمها دة أكبر دليل إن هي تم التواصل معاها من شخص من العالم الآخر، و إن موضوع بطنها دة بالفعل حصل بسبب الاعتداء عليها جنسياً من الشخص دة، وإنه شخص مُسلم واسمه "ناضل"، وعمره ١٣٠ سنة، من عشيرة في الجن اسمها "حرايين" وكان بيظهر لها من العدم كل ليلة

في غرفتها ويكتنفها ويعمل معها علاقة بالغضب، والموضوع دة تم أكثر من ٢٨ مرة على مدار ٦ شهور، وهي حامل بالفعل بس الجنين اللي في بطنها هو مش جنين بني آدم، دة جنين "جن" عايش في بطنها وعمره ما بيظهر في السونار لأنه شفاف، ولما الأهل سألوه عن طريقة علاجها قالهم إن لازم يتم تحضير الجن "ناضل" بنفسه ويتكلم معاه ويشوف هيوصل لأيه، يا أما تروح تولد اللي في بطنها عادي طبيعي، بس لو الزوج اللي هو "ناضل" كان رابط على بطنها فهي مستحيل تخرج بعد الولادة دي سليمة، وإن جنين الجن وهو خارج من بطنها هيسحب روحها معاه ويخرج بيها للعشيرة بتاعته، وهي هتموت ..

أما لو تم التواصل مع الجن دة ووافق على فك الربط اللي على بطنها فهو هيسحب الجنين بدون أي عمليات وبكدة هي هترجع لطبيعتها وبطنها هتبقى سليمة، الأهل استبعدوا الحل الأولاني تماماً لأنهم مش مستغنيين عن روح بنتهم، لكنهم وافقوا على التواصل مع العالم الآخر واستدعاء الجن "ناضل" عشان يحلوا المشكلة دي معاه وديا.. وبعد ما تم التواصل معاه قالهم أنه فك الربط من على بطن سندس وأنه لو سحب الجنين بطريقته هيطلع ميت، وهو يهيمه ابنه جداً وعازي أنه يعيش، وأقنعهم إنها لما تولد طبيعي هو هينزل وحياتها هترجع طبيعية وهو هيسيبها في حالها ومش هيرجعلها، وللأسف سمعوا كلامه وراحوا المستشفى خلوها تولد طبيعي، وأثناء الولادة حصل جرح كبير جداً في الرحم من الداخل ومستحتمل تش الألم وماتت ..

صدمة كبيرة على أهلها خصوصاً إنها بنتهم الوحيدة وإنها تموت بالطريقة المؤلمة دي فهي حاجة صعبة جداً على قلوبهم .. يمكن اللي حصل دة إهمال من الأهل أو عدم ترقية البيت من الأرواح ولكن تعدد الأسباب يثير احتمالية حدوث أي شيء.

الواقعة دي حصلت كثير جداً في معظم الدول العربية مع مجموعة من الأسر واللي قالوا إن مفيش بنت عاشت بعد الموضوع دة وإن طالما بقيت حامل فهي خلاص مفيش مفر من الموت، لأن يعتبر كتلة نار عايشة جوة الرحم عندها وأثناء تواجد جواها بيؤوظ أعضاء كثير في الجسم زي الرئة والكلية والقلب، مما يؤدي إلى وفاتها فوراً.

بس السؤال هنا .. ليه البنات أكثر عرضة للمس من الجن؟

"تمت"

"أطفال ذوي العيون الدائكة"

قبل أي حاجة بس عايزك تركز معايا وتتخيل كدة وأنت قاعد في بيتك معزز مخضرم بتشرب ينسون بالليمون وتتفاجئ بحد بيخبط عليك الباب الساعة ٢ بالليل، طبعاً أنت هتفتكر حد تعرفه او حد من أهلك، بس لما تيجي تفتح الباب هتلاقي أطفال واقفين في سكون تام وبيتكلموا ببراءة ويقولولك "إحنا تايهين والجو برد وليل، ممكن تدخلنا عندك؟؟" وعشان سيادتك قلبك حين هتقول تعالوا يا أحبابي متخافوش أنا هحملك من الأشرار، وبعد ماتدخلهم البيت هتسألهم انتوا مين؟ او جيتوا منين؟ فهتلاقي إجابات غير منطقية بالمرة، طبعاً كل دة وهما منزلين راسهم لتحت وبيكلموك، يبدأوا يرفعوا راسهم بقي ويبصولك وتتفاجئ أنت من المنظر دة، تلاقي عيونهم لونها أسود داكن بدون جزء أبيض حوالين العين، وتبدأ رجفة جواك وتحس بخوف وإنك لازم تطلعهم برا بيتك حالاااا..

ركّز معايا بقي عشان هحكليك موقف حقيقي حصل للأطفال دول..

سنة ١٩٩٦ فيه صحفي من المكسيك اسمه "ب. ب" بيحكي عن موقف حصل معاه من الأطفال دول في مدينة "تكساس"، يقول

أنا كنت راكب عرييتي ومروّح البيت بالليل متأخر، وفجأة شوفت أطفال في بداية أعمارهم شاورولي من بعيد ووقفت ليهم وافتكرت أنهم محتاجين مساعدة، وكانوا لابسين سويتشيرت ومغطيين عينيهم بالكابتشو بتاعه، ولما وقفت وبسألهم انتوا مين قالولي احنا تايهين وعازينك توصلنا للقرية بتاعتنا، وافقت اوصلهم وجيت افتحلهم الباب لقيتهم بيكلموا بعض بصوت خيف، ولما ركزت في عينيهم لقيت شكلها مرعب جداً وكلها داكنة، أتأسفت ليهم ومشيت بهدوء من غير ما احسسهم إني خايف، كنت فاكر إنهم جن او مخلوقات غريبة، عشان لما مشيت فضلت باصص ليهم في المراية وهما بيخنفوا تدريجياً لحد ما اتبخروا خالص ومبقاش ليهم أي وجود، وقتها انطلقت بالعربية بأقصى سرعة..

بعدها بفترة قال انه سمع نفس الموقف مع زميل له في الشغل، ومن ساعتها بدأت الحكايات والروايات حوالين الموضوع ده، وكان مسبب الرعب للمُدن المجاورة..

فيه حكاية كانت مشهورة للأطفال دول وحصلت مع عائلة بسيطة وحالهم اتدهور تماماً..

الحكاية بتقول إن كان فيه عيلة مكوّنة من ٤ أفراد، أب وأم وطفلة عندها ستين وكلب حراسة، وفي ليلة من ليالي الشتاء العميقة كانت

العائلة دي عايشة في سلام، الأب والأم والبنت نايمين والساعة ١٢ بعد نص الليل، والجو هدهوء جداً بس بحركة عشوائية بدأ كلب الحراسة يهوهو بصوت عالي ويعمل حركات غريبة، الأم صحيت على صوت الكلب وفتحتله باب البيت عشان فاكدة انه عايز يخرج، بس لما وصلت باب البيت سمعت صوت الجرس بيرن، جت تفتح الباب لقت الكلب بيهيج اكرت ويهوهو بشكل أغرب وافطع، والكلب بيعمل كدة لما بيكون فيه خطر حواليلهم بس، لدرجة ان الأم قلققت جداً، وبصت من العين السحرية، لقت بنتين واقفين برا وسنهم صغير وطولهم زي بعض، بس منزلين راسهم لتحت وواحدة منهم عاملة شعرها قصة ونازل على عينيهام مغطيهام، والثانية ملامحها شاحبة مش باين منها حاجة، بس فجأة بنت منهم اتكلمت وقالت للأم "افتحيلنا الباب احنا تايمين وعاييز نكلم ماما من عندك"، وعلى حسب كلام الأم قالت ان نبرة صوتهم كانت غريبة، المهم الأم مسمعتش الكلام واكتفت بأنها تفضل باصة عليهم من العين السحرية بس، وبعد شوية البنتين رفعوا راسهم قدام عين الباب وعينيهام بانز وزعقوا بصوت عالي وقالوا "افتحي الباب وإلا هنفتحها احنا"، الأم خافت لما سمعت صوتهم الخشن دة وملاحهم المربعة، دخلت اوضتها وقفلت الباب، وفضلت صاحية للمصبح حتى مرضيتش تصحّي جوزها ولما صحي متأخر حكيته الي حصل بس هو مصدقش وقالها يمكن كتي بتحلمي يا هانم!!

واليوم الي بعده محصلش نفس الموقف بس الكلب اختفى ومبقاش

ليه أيّ وجود !!

والمشاكل بينهم زادت والظلام زاد في البيت والأمر بقيت متدهورة من بعد اليوم الكئيب ده، بس كلهم اجمعوا إن وجود الأطفال دول هو السبب..

أنا بس كنت عايز أقولك إن ظاهرة الأطفال ذو العيون الداكنة دي أسطورة بدأت في المكسيك، بتبقى عبارة عن طفل عمره بيتراوح من ٥ سنوات لـ ١٥ سنة، بتبقى ملامحه باهتة ووشه قديم كدة وعيونه تخوّف جداً وبتجيب اكتئاب لأي حد يبص في عينه، الأسطورة بتقول إن الأطفال دي بتبقى ورثة الجن، بمعنى إن معروف ملامح الجن بتبقى عيونهم داكنة وواحدة شكل بيضاوي، وفيه رواية كمان بتقول إن لما يحصل تزاوج بين الجن والبشر بيخلفوا الأطفال دول، لكن العقل والمنطق بيقول إن يحصل خلل بسيط في جينات الطفل أثناء التكوين، وفي الأغلب بتكون وحم من الأم لكائنات عشوائية بتتسبب في الخلقة الهباب دي ويقرفونا بيها، المهم إن الطفل لما بيوصل للعشرينات بتختفي الظاهرة دي من عنده وبيكون طبيعي لكن بيعيش حياته تعيس وحاسس بأكتئاب دايم، المقولة الأكثر انتشاراً في العالم إن الظاهرة دي بتبقى متواجدة على السيرة، يعني وأنت بتكلم حد عليهم ممكن يظهرولك، زي الجن كدة بيظهروا على السيرة، وياااه بقي لو شتمتهم أو

اتكلمت عنهم بطريقة مش كويسة، هتتشمبر حرفياً وهناخد حكايتك
نعمل منها قصة كبيرة..

عايز احكيك كمان حكاية حقيقية حصلت لواحدة ست برضو
وكانت بتقول إنها عايشة في قرية صغيرة وكل الجيران عارفين بعض،
وفي يوم من الأيام الساعة ٢ بالليل الباب خبط جامد مرة واحدة
وسكت، طلعت هي تبص من الشباك لقت آثار أقدام على الثلج
من الشارع العام لحد باب بيتهم، الغريب في الموضوع إن مستحيل
حد يمشي في الجودة على رجله، ولازم يكون معاه عريية لأن الجو
صعب جداً، بس مكش فيه أي أثر لإطارات العربية، بعدها بشوية
الباب خبط تاني ولما بصت من الشباك بسرعة ناحية باب البيت لقت
فيه طفلين واقفين باصين للأرض، قالت لجوزها يروح يفتح الباب لأن
الحوار كان مريب وراحت وقفت في الطريقة تراقب الموضوع من بعيد،
فالزوج فتح الباب و قالولوا "مممكن تدخلنا البيت؟" بأسلوب بارد و
نبرة حادة، فزوجه سألهم "طب انتوا فين أهلكم؟" قالوا "أهلنا هيجوا
ياخدونا!.."

والزوجة بتقول ان دي مش أول مرة يحصل موقف زي دة معاهم و
أن قبل كدة كان فيه حادثة وأطفال (بس أطفال طبيعيين) جُم وخطبوا
وكانوا تعبانين من الحادث وهما استضافوهم بس اللي كان مخوفها أن

هي ملقّتش آثار عربية في الشارع العام ولا فيه أي حادث، وأن اليوم ده كانت الدنيا فيها تلج جامد وأن في الجودة ازاى اصلاً جُم؟

المهم كانوا بنت وولد وقعدوا في الصلاة ومكانوش بيتكلموا وباصين تحت، الزوجة راحت تعملهم حاجة سخنة يشربوها بحيث يتدفوا شوية، وقتها كانت القطط بتاعتها بتتصرف بغرابة ومش زي العادي لأن في العادي الأربع قطط بتوعها لما بيعجي ضيف بيقعدوا يقربوا منهم ويلعبوا معاهم، بس المرة دي حصل العكس وفيه ثلاثة من القطط كانوا مستخبين وواحدة منهم كانت مع الزوجة وهي بتعمل المشاريب وكان شعرها كله واقف وكانت مرتبكة ومتوترة، ولما جت الزوجة تهديها لقت القطة بعدت عنها وكانت بتحاول تدافع عن نفسها مع أن الزوجة كانت بس بتحاول تهديها وتمسح على راسها، ولما راحت تقدم المشاريب راحت الصلاة ولقت أن جوزها حاطت إيده على رأسه ونازل تحت وكان شكله تعبان (مع العلم إنه كان طبيعي وكويس)

فسألته وبتقوله "مالك؟"

قالها "مفيش حاسس اني مُرهق بس" وهو بيصص ليها لقت دم بينزل من مناخيره، ولما راحت تقدم المشروبات ليهم وهي بتقدمهم بصولها في عينها بعينهم المليانة سواد طبعاً والرعب بدأ يملأ كل حثة في جسمها بس ثبتت وقدمت المشروبات من غير ما توقع الكوبايات وراحت عند جوزها على أساس أن هي تمسح الدم وتشوفه وكدة، وبعد ما مسحت

الدم الأطفال قالولها أن هما عايزين يستخدموا الحمام، وراحوا ببطء شديد، بس فجأة وهما ماشيين الكهرباء قطعت!

شيء يعتبر مبيحصلش عندهم فراححت الأم تشوف الاطفال ولقت أن كان في ضوء خفيف جاي من عند الأطفال وسط الظلام الدامس الي كان محاط المكان، وكان منظر مُرعب بمعنى الكلمة، وبعدين الأطفال اتوجهوا للزوج والزوجة وقالوا ليهم "خلاص أهلكنا برا" وخرجوا من البيت، وطبعاً الزوج والزوجة كانوا مصدومين وخايفين والزوجة راحت وقفلت الباب على طول، وبعدها بربع ساعة الكهرباء جت تاني ومن اليوم دة والوضع عندهم مش تمام، القطط شخصيتهم اتغيرت وبقوا دايمًا خايفين والزوج بقى عنده مشاكل صحية أكثر من قبل كدة ولما راحوا يكشفوا اكتشفوا أن هو عنده سرطان بالجلد والغريب أن علشان حد يجيله سرطان في الجلد لازم يكون اتعرض لفترة طويلة لأشعة الشمس مع أن الزوج يعتبر ما بيخرجش من البيت وحتى شغله في مكتب مش برة والزوجة بتقول أن من يومها وحياتهم مبقيتش طبيعية ولا رجعت زي الأول!!

انا بس عايزك تبقى واثق إن مفيش معلومة مؤكدة من كل دة ومصدر القصص دي مجهول لكن دة ميمنعش انهم ممكن يكونوا موجودين فعلاً، وانهم ممكن يكون ملهمش علاقة بالجن أصلاً!!!

ودول مخلوقات فضائية مثلاً أو مصاصين دماء، المهم دلوقتي الأخبار العربية قالوا ان الظاهرة دي انتهت من القرن الـ ١٨ بس اعلنوا عن وجود طفلين بعيون داكنة في السعودية، ودة دليل إنهم موجودين لسة ونسبة انتشارهم في الدول العربية كبيرة جداً وقريب هنسمع عنهم في كل مكان، بس الأهم إنك لما تقابل حد منهم حاول متبصش في عينه او تتكلم معاه، ودة لمصلحتك مش أكثر.

"تمت"

”ماذا يوجد أسفل المرحاض؟“

فيه جنّ عايش تحت حوض الحمام في شقتي!!

٢٨ ديسمبر ٢٠١٩ .. الساعة ١١ بالليل ..

كنت واقف في الحمام بغسل وشي والجو كان برد جداً، وبالرغم من البرودة دي بس كنت حاسس إن نصي التحتاني مولّع، كمية سخونة طالعة من تحت الحوض رهيبة، لدرجة إني كنت فاكّر فيه نار تحت الحوض، مرة في الثانية بدأ الموضوع يزيد والسخونة تزيد لدرجة إني مبقيتش قادر أفق قدام الحوض، جيت في مرة بالليل كان النور قاطع ساعتها، روحت الحمام وشغلت فلاش الموبايل وقولت أما ادخل اشوف إيه اللي جوادة، وبالفعل عملت كدة وجمدت قلبي ودخلت الحمام ونوّرت الفلاش تحت الحوض واتفاجئ بشكل البلاط!!

بلاط أسود سواد داكن جداً وكأن فيه حريقة حصلت في المكان دة، بلاط الأرض والحيطه اللي تحت الحوض كلها سودة وفيها أثر دخان، والمكان جايب سخونة رهيبة، المنظر دة مكايش بيظهر ونور الحمام شغال عادي، ولما شغلت الفلاش ظهر، شكيت إن ممكن يكون بسبب

الناحية الثانية عند الجيران مثلاً..

إحنا بيتنا طراز قديم وعلى البلوك الأبيض، عايشين في بلد أرياف والأرض اللي حوالينا مشبوهة بالسُّكنة..

مرة ثانية دخلت على الحوض عادي وكنت ناسي الحوار أصلاً ومكانش فيه سخونة، بس مرة واحدة حسيت بلسعة شديدة جداً لدرجة إن شعر رجلي اتحرق!! وخرجت برا الحمام بسرعة وقولت أنا لازم أنزل ارواح الناحية الثانية في البيت اللي جنبنا اشوف فيه إيه، بس لما نزلت وروحت اخبط على باب شقتهم لقيت الباب كله تراب وعليه قفل قديم جداً وكأن بقاله سنين متفتحتش، رجعت شقتي تاني وأنا لسة محتاس في حيرتي مع الحوض اللي هيجنني دة، اتعاملت عادي وقولت مفيش حاجة ويمكن سخونة في الحيطه، من حظي الهباب إن أهلي كانوا مسافرين في الفترة دي وكنت لوحدي في البيت، وأنا مُهمَل بصراحة وماكتتش بطفي النور بالليل ولا بقفل باب الحمام كويس ومش مُهتم بحاجة، لحد ما في مرة وأنا نايم بالليل والأوضة عندي ضلمة بس نور الصالة شغال، سمعت صوت "همهمة" بشكل واضح جداً جاي من الحمام، تقريباً صحيت على الصوت دة وأنا مفزوع وعرفت متأخر إن مصدر الصوت دة هو الحمام، المشكلة إني كنت سايب الباب مفتوح لما

نمت، دلوقتي هو مقفول وبيطلع منه دخان بسيط لونه أسود من تحت الباب، فضلت واقف قدام باب الحمام لمدة دقيقة وأنا متمسمر ومش عارف اتحرك، مصدوم من هول المنظر ولا قادر اصرخ ولا قادر اعمل أي حاجة، أنا موضوع الجنّة في دماغي على طول وأيّ صوت كنت بسمعه زمان في البيت بقول إنه جن والبيت مسكون، بس بعد كدة بيتضح إنها تهيّئات وأن الدنيا تمام، أنا من النوع اللي بيخاف جدًّا جدًّا، ومن أي حاجة بتفزّع واخاف، وممكن أفضل احلم بالحاجة المرعبة دي، كان فيه نقطة سودة في حياتي وهي كانت الأصوات الغريبة اللي بسمعها بالليل في الشارع، دلوقتي النقطة السوداء اللي في حياتي هي الحمام، أنا مش قادر استوعب إني واقف قدام حمام مسكون وفيه صوت بشع طالع منه، ودخان بسيط كمان، لأ أنا لازم اجّمد قلبي وادخل اشوف فيه إيه، أنا كدة كدة ميت بس لازم اعرف إيه اللي جوة قبل ما أموت..

اتقدمت خطوة ناحية باب الحمام وهو مقفول، حطيت ايدي على أوكرة الباب وفتحتها بالرااحة، لقيت الصوت سكت!! حتى الدخان اختفى، كملت كمان وفتحتها أكثر وبصيت على الحتة اللي تحت الحوض لقيتها سودة سواد الفحم، وسخنة جدًّا كأن فيه نار كانت والعة هنا، قفلت الباب وقولت لازم أجيب شيخ أو أي حد يعرفني اللي بيحصل دة، وبالفعل اتصلت على شيخ معرفة قديمة وقالي أنا جايلك مسافة

السكة بس، فضلت مستني الباب يخبط لمدة ربع ساعة وبعدها سمعت دقاته، قومت فتحت الباب ولقيت الشيخ واقف ودخل على طول بيقولي موضوعك بسيط بس لازم اخلصهولك عشان مستعجل ووراي كذا موضوع ثاني، كان معاه شنطة جلد سودة فيها العدة بتاعته، بدأ يفتحها ويطلع منها شموع مستعملة قبل كدة، وطلع منها بخور وكوبايات بلاستيك وقلم حبر وورق أبيض وطوب صغير بحجم عُقْلة الإصبع، فَرَش الورق الأبيض على الأرض وحط الطوب الصغير على أطراف الورق وجاب شمعة وولعها وبدأ ينقط بيها على الورق الأبيض، لحد ما شكّل اسم، اسم غريب لحد الآن مش عارف أقراه، بيعمل كل دة وهو لسة مدخلش الحمام أصلاً، بس أنا كنت حكيته كل حاجة، بعدين جاب كوباية بلاستيك وحبس فيها دخان الشمعة وغلفها بورقة بيضة من الورق الي اتخط عليه شمع سايح، وقالي امسك الكوباية دي وادخل بيها الحمام وحطها تحت الحوض، أنا كنت مرعوب اعمل كدة بس وجوده في البيت كان مطمئني شوية، عملت زي ما قالي ودخلت الحمام بالكوباية وحطيتها تحت الحوض وشيلت الورقة من عليها وسببت الدخان الي فيها يخرج برا، الكوباية قعدت حوالي ٥ دقائق مبطلتش دخان، الدخان بيطلع منها بشكل متساوي بدون ما يقطع، وهو كان قاعد برا بيعمل وضعيات مختلفة بالشمع على الورق الأبيض، وبعدين جاب ورقة من الورق دة وكتب عليها بالخبر الأحمر كلام مش مفهوم وبعدين طبقها كذا طبقة بشكل متساوي وقالي خدها

حطها في الكوباية اليي أنت سيبتها جوة، أخذت منه الورقة اليي بقت مطبقة وحجمها صغير جداً ودخلت بيها الحمام حطيتها جوة الكوباية، لقيت الكوباية بتتهز جامد وكأن فيها مياه بتغلي، لمدة دقيقة وكل حاجة بقت تمام والكوباية بطلت تطلع دخان، خرجت برا الحمام وروحته قالي أنت دلقت مياه سخنة في الحمام قبل كدة؟؟ قولتله لا محصلش.. قالي طب صرخت قبل كدة جوة الحمام؟ قولتله لا برضو أنا حياتي طبيعية زي اي حد، بس بصراحة كنت لما باخد دش واغمض عيني بحس ان فيه شخص واقف قدامي وبيص في عيني جامد، ولما بفتحها مش بشوف حد، وكنت بقول ان عادي يحصل الموضوع دة لأن كل الناس بتعاني منه، لكن لما حصل موضوع السخونة اليي بتطلع من تحت دة كلمتك على طول..

الشيخ كان بيسمع لي بتركيز شديد لدرجة إنه كان بيخليني أعيد كلام الجملة تاني عشان يتأكد إنه سمعها صح، أنا حكيته كل الحاجات اليي بخاف منها وبعد ما خلصت قولتله عن أذنك هدخل الحمام، دخلت جوة ولقيت المنظر اليي متوقعتش اني اشوفه طول عمري، لقيت المنطقة المتفحمة دي بتنزل دم من بين البلاط، بينزل بحركة خفيفة وبيطلع من جوة الحيفة، فتحت الباب بسرعة وخرجت برا بنادي على الشيخ وقولتله الحيفة بتنزل دم!!!

لقيته ابتسم وقلبي متخافش متخافش دة طبعي، ولقيته دخل معايا الحمام وجاب علبة الخبر الأحمر وحطها في الأرض تحت الحوض، وبقي الدم الي بينزل من الحيلة بينقط في علبة الخبر بتاعته، مؤخراً اكتشفت إن علبة الخبر دي عبارة عن علبة دم مش حبر، لما كنت بسأله عن اللي بيحصل دة كان بيتوه الموضوع ويكلمني في حاجات مختلفة، بعدين الدم قطع وبطل ينزل من الحيلة راح شال العلبة وقلبي تمام كدة مش هتلاقي حاجة تاني، وقلبي أنا همشي ولو حصل حاجة كلمني، كنت قربت اتطمئن بس تعبيرات وشه مكانتش بتطمني، خرج من البيت وقفلت الباب وراه، بصيت عليه من الشباك لقيته ييمشي بسرعة ويمسح العرق من وشه بمنديل، رغم إننا كنا في الشتا بس وشه كان عرقان بشكل غبي، وكان ييمشي ويبص وراه كأنه هربان من حد، أنا كنت مركز معاه جداً لحد ما سمعت صوت الحنفية اتفتح لوحده في الحمام، انفزعت!!

دخلت قفلته وخرجت بصيت من الشباك تاني لقيت الشيخ مشي خلاص ومبقاش باين، كانت الساعة داخله على ١٢ بالليل وكان يوم خميس وهنصحى على يوم جمعة، دخلت افرد ضهري على السرير شوية وبعد فترة قصيرة سمعت نفس صوت الحنفية اتفتح في الحمام، بس المرة دي دخلت عشان اقفله لقيته اتقفل لوحده قبل ما ادخل الحمام أصلاً!!

خرجت وقعدت استغفر ربنا وكان بيحاوطني تفكير اني اقوم امشي من البيت دة وأبات عند اي حد من أصحابي، بس شكلي هيتقى إيه قدامهم؟؟ لأ مينفعش لأ مش هعمل كدة، "صوت الحنفية بيتفتح لتالت مرة" ياااادي الليلة السوداء، شكلها مفياش نوم خالص، لا مفياش حيل أقوم اقلها، سييتها مفتوحة وطنشت، وفجأة سمعت صوت من قدام باب الأوضة يقول "مش هتقوم تقفلها ولا ايه؟؟"

على قد ما الموضوع حقيقي مُضحك بس أنا حرفياً حسيت بجرذل مية ساقعة اتدلق عليا، كنت فاكر اني مُت خلاص وروحي طلعت، كنت اتمنى السرير يتفتح بيا وانزل استخبي جواه، انا مش مستوعب اللي سمعته، هو دة بجد فيه حد اتكلم ولا دة فوتوشوب؟؟؟؟

مفيش ربع ساعة ولقيت نور البيت كله طفى مرة واحدة، أهى كملت، والحنفية اتفتحت كمان، بقت ضلمة وحنفية مفتوحة، خرجت برا الأوضة وقولت لازم انزل اروح عند اي حد أنا كدة هتلبس، والشيخ دة شكله اي كلام، يا أما حد نصاب وعامل نفسه شيخ، مع أنه معرفة قديمة يعني، خرجت برا لقيت السلم ضلمة جداً لدرجة اني مش شايف حاجة كأني اتعميت، غالباً المثل اللي يقول المصايب مبتجيش واحدة واحدة، المصايب بتيجي مرة واحدة كان عنده حق، فيه حد قاصد إنه يخوّفني، ونجح في كدة، بحسس على السلم عشان انزل لقيت النور جيه في الشقة، بقيت متردد انزل واكمل ولا ألف

وارجع تاني!! مش عارف لو حد مكاني كان عمل إيه بس العقل السليم يقول إن المفروض اهرب من القارة كلها بسبب اللي بيحصل دة، ومش عايز أكلم حد من أهلي عشان محدش يتوتر ويقلق عليا، أنا هرجع وأعدي الليلة دي على خير والصباح رباح، رجعت ودخلت جوة وقفلت الباب ورايا كويس، ودخلت الأوضة قعدت على السرير، وفجأة سمعت صوت خبط جامد على باب الشقة وكأن حد هربان من سفاح ويستنجد بيا، خبط شديد لدرجة إن الباب قُرب يتخلع من مكانه، قُمت بسرعة ناحية الباب وفتحتها بسرعة لقيت خيال حد جري بسرعة ونزل تحت، ملحقتش اشوفه بس خياله كان باين جداً، عرفت إن حد من أطفال الشوارع بيرخم، بس جيه في الوقت الغلط ولو كنت لمحتة كنت همرجحه بس الحظ، المفروض إن الشباك عندي جايب مدخل البيت واقدر اشوف مين خارج ومين داخل، لما قفلت الباب وروحت ناحية الشباك مشوفتش الطفل دة خارج من مدخل البيت، رغم إني فتحت الباب تاني وبصيت من بين السلم ملقيتش حد برضو، مش عارف راح فين، مش متخيل أنا ليه بيحصل لي كل دة، والوقت متأخر جداً واسمع أصوات كركبة في الحمام، طب اللي جوة دة عايز يوصل لأيه؟ هو لو قاصد إنه يرعبنى بس فأنا خلاص والله اترعبت وقربت اتلبس، ممكن تهدي بقى خلاص أنت حققت هدفك، ملوش لزوم بقى إنك تقتلني لأنِّي مُت خلاص وبنظولني اتبلّ، دماغي هتنفجر وأفكار كثير بترادوني وحبل أفكارى يقطع كل شوية بمجرد

ما اسمع الكركبة في الحمام والحنفية اللي بتتفتح وتتقفل دي، الشيخ كان سايب الكوباية البلاستيك تحت الحوض، لما دخلت أففل الحنفية أول مرة لقيتها متطبقة ومرمية في الحوض من فوق، ومفتوح عليها مية سخنة، لدرجة إن جزء منها سايح، أياً كان الكائن اللي عايش في الحمام أنا مستعد اعمله اي حاجة عشان يسييني في حالي، شغلت قرآن على الموبايل وحطيته على السرير جنبي، ويادوب غمضت عيني لمدة ٣ ثواني، لقيت القرآن قفل لوحده وشاشة الموبايل مفتوحة، شغلته تاني وغمضت عيني واتعاد نفس السيناريو واتقفل لوحده!!

كأن فيه حد بيقلله عمد، فتحت عيني ويارييني ما فتحتها، لقيت خيال أسود وطويل جداً واقف قدام باب الأوضة باصص عليا وشكله بشع جداً لدرجة إن عيني وسعت وصوتي اتكتم وروحي قربت تتسحب مني، لقيته خلال ثواني مشي بحركة بطيئة وراح الناحية الثانية في الصالة، وسمعت صوته وهو ييقعد على الكرسي والكرسي بيزيّق، بعدها سمعت صوته وهو بيخبط بكل عزم على الحيطه، لدرجة إن البيت كان بيتهز، طب ميين دة؟؟ أنا شايف باب الحمام مفتوح وأنا قفلته، وبعدها سمعت الباب بيخبط نفس الخطب السريع، طب دة إيه دة كمان، الصدمة الأكبر بقى إن باب الشقة اتفتح!!

أنا خلاص بطّل آخر نفس عندي وبموت حالاً، سحب البطانة واتغطيت جامد وغطيت كل حته في جسمي وبدأت اترعرع جامد

غضب عني وصوت طقطقة أسناني بقى مسموع لآخر الشارع، عرقت وبقيت مش عارف اتنفس وصوت الخبط على الحيطه بيزيد أكثر وأكثر، باب الشقة مفتوح ومفیش حد داخل ولا طالع، فجأة صوت الخبط اختفى والجو بقى هادي وانا غرقان بالعرق رغم برودة الجو، طلعت راسي بحركة بطيئة برا البطانية لقيت نفس الخيال الأسود الطويل واقف قدام السرير بالظبط وباصصلي وملامحه باينة جامد، صرخت وغطيت وشي تاني وعضم جسمي كله بيخبط في بعض، كان قلبي خلاص وقف من الخوف ونفسي ضاع وحسيت إن فيه حجر كبير جداً على صدري، وقعدت استعيز بالله من الشيطان الرجيم بصوت عالي وأقول آيات قرآنية، كل دة وانا مستخبي تحت البطانية، وبعد دقائق جمدت قلبي وطلعت راسي برا لقيت الدنيا سكون ومفیش اي حاجة، حوشت البطانية خالص وروحت اتسحب ناحية باب الشقة، فتحتُه وخرجت منه وأنا حفيان ومش شايف قدامي غير إني اهرب بأي شكل من الأشكال من هنا، وهوب وأنا على السلم سمعت صوت صريخ عالي جداً جاي من الشقة بتاعتي، جريت بسرعة جداً لتحت وخرجت من البيت ووقفت في نص الشارع وانا بنهج جامد وفي عيني نظرة انتصار إني خرجت سليم من هنا، بصيت على الشباك بتاعي لقيت الخيال الأسود واقف فوق وباصصلي بشكل ساكن مبيتحركش، طلعت اجري لبعيد وروحت عند واحد صاحبي قضيت باقي حياتي عنده، حتى لما أهلي رجعوا مرضيتش أرجع معاهم وبقيت مقيم برا،

حصل معاهم حوارات كثير في البيت دة لحد ما سابوه خالص، وحالياً معروض للبيع برُخص التراب، لو حد حابب يشتريه يكلمنى ..

حقيقة اللي حصل دة كان بسبب إهمال كبير في نظافة الحمام، لدرجة إنه أصبح سَكَن للشياطين، أما اللي ظهر بصورة واضحة وكان عبارة عن خيال ف دة معروف إنه بيسكن في الأماكن المهجورة أو الأماكن اللي مش بتتنظيف باستمرار، وهو شيطان معروف في كل البيوت، وكل غرضه هو تطفيش سُكَّان البيت بأي شكل حتى لو أراد أنه يقتلهم.

"تمت"

"أخذ الحف حرفة"

من أغرب المواقف الي حصلتي في حياتي لما بابا حطني في القبر وأنا عايشة، كنت بين الحياة والموت ومكنتش مستوعبة إني طلعت من القبر وأنا لسة على قيد الحياة..

أنا "نسرين" .. إحنا عايشين في قرية صغيرة في مركز "بني مزار" تبع محافظة المنيا، كنت كل يوم بسمع خناقات كبيرة بين ماما وبابا وكانت بتوصل للطلاق كذا مرة وكانوا بيكملوا عادي، مكانوش بيروحوا لمأذون أو لشيخ، كنت بسمع بابا كل يوم والثاني يقولها انتي طالق بالتلاتة، وبعد يومين يكملوا عيشة عادي ويضحكوا، ومع تاني خناقة بيحصل نفس الحوار، أنا كنت طفلة وقتها عندي ١٠ سنين، مكنتش فاهمة الكلام ده غير المناوشات الي بتحصل ما بينهم، ماما كانت طيبة جداً معايا بس بابا لأ، ماما كانت بتجيلي هدايا كتيرة جداً وتاني يوم بابا ياخذ الهدايا دي ويبيعها، ويقول لو عرّفتي حد هموتك وادفئك حية، كنت بخاف جداً منه، ولما بقى عندي ١٢ سنة وفي عيد ميلادي ماما جابتلي ساعة أندرويد من نوع "أبل" .. لبستها في ايدي وكنت فرحانة بيها جداً، وتاني يوم بابا شافها في ايدي واستغل ان ماما نزلت

قام ماسكني من ايدي وقالي إقْلعيها بسرعة، أنا كنت فرحانة بيها جداً ومرضيتش أفلعها، قام هددني وقالي لو مقلعتيهاش هدفنك حيّة، مخوفتش وقتها غير على الساعة وقولتله أنا مش هديها لك، دي بالذات أنا كنت هموت عليها وما صدقت إن ماما جابتهالي، لقيته يبص بصّة كلها شر وعدوانية وقالي تمام، وسكت..

في نفس اليوم بالليل كان الخميس الساعة ١ بعد نص الليل، لقيت باب اوضتي بيخبط، قمت فتحت لقيته بابا، قالي أنا عملت عصير فراولة وافتكرت نسرين حبّية بابا قولت لازم أجيبك منه، اتبسّطت جداً بأنه افتكرنى وأخذت منه العصير وشربته، وبعد دقائق محسيتش بنفسي ونمت..



أنا كان كل همي الساعة الغالية وبس، مهمنيش إن نسرين تموت من العصير أو تنام بس كل الي عملته إني دخلت أوضتها تاني واتأكدت إنها في سابع نومة قومت جايب شوال كبير وحطيتها جواه، ونفس العصير شربت منه مراتي وكانت نايمة هي كمان، ودة ساعدني فإني أخرج من البيت بنسرين ومحدش يحس بيا، وبما إن بيتنا قريب من المدافن فأنا مكش في بالي غير إني ادفنها فعلاً، خصوصاً لما عرفت إن تمن الساعة معدي الـ ١٠ آلاف جنيه، قربنا من المدافن وأنا شايها جوة

الشوال على ضهري ومامشي بيها، ولما وصلنا .. حفرت حفرة عميقة جداً في خلال ساعة زمن، ولما طلعتها من الشوال ونزلتها في القبر حاولت اقلعها الساعة بس معرفتش، وكنت سامع صوت حارس المقابر جاي من ورايا، اضطريت إني احط باقي التراب عليها وادفنها ومامشي بسرعة، ومبقاش ليها أثر، وعلى بال ما الحارس وصل عندي من الضلمة مكنش شايف حاجة، قولتله أنا داخل أقرأ الفاتحة لأمي وأبوياء، واستأذنته ومشيت، وأنا متحسّر على الساعة الي معرفتش آخذها من إيد نسرين، رجعت البيت كانت مراقي نايمة، طلعت جنبها على السرير ونمت، وتاني يوم صحيت على صوتها وهي بتصرخ وبتقول لي "نسرين فين!!" .. قولتلها معرفش أنا سايبها في أوضتها بالليل ونمت، ومرة واحدة لقيتها أغمى عليها ووقعت على الأرض ..

أنا كنت نايمة وحاسة إني بتنفس تراب وكنت باخد نفسي بالعافية، كنت مدفونة تحت الأرض وأنا مش حاسة وكل الي حاسة بيه هو التراب الي دخل في كل حثة في جسمي ومش عارفة اخرج، حاولت احرك أيدي لفوق وأحفر التراب بس كان بيقع على وشي ويعميني ويخليني عاجزة عن الحركة، وبعد محاولات كتير قدرت احرك أيدي ناحية وشي وأبص في الساعة، وإيدي جت بالغلط على الساعة على زرار الاتصال بالطوارئ، وبالفعل كان بيرن وكلمتهم قولتلهم إني مدفونة في المكان

دة، ومن خلال الموقع بتاع الساعة قدروا يحددوا مكاني وخلال الوقت دة كنت بكنتم نفسي لفترات طويلة لحد ما كان هيجيلي اختناق واموت، وخلال ربع ساعة لقيتهم جُهم ويحاولوا يشيلوا التراب ويفضوا الحفرة ولقوني مدفونة تحت بالفعل..

إحنا لما جالنا البلاغ بأن فيه بنت مدفونة في إحدى المقابر في القرية، كنا فاكرين حد بيشتغلنا، بس لما رجعنا لموقع الجهاز الي تم التواصل منه قدرنا نحدد مكانه واتضح إن الجهاز فعلاً في المقابر، وبسرعة اتحركنا ومعانا عربية إسعاف ناحية الواقعة، وبعد الحفر في المكان المطلوب قدرنا نشوف البنت وهي مدفونة حية والتراب مغطيها ومكانتش قادرة تفتح عينيها، طلعتها بسرعة وحطيناها في عربية الإسعاف وكانت بتتنفس بصعوبة جداً، حطيناها أكسجين لحد ما هديت ووصلنا المستشفى ودخلناها غرفة العناية المركزة، وبعد ما اتأكدنا إنها بقيت كويسة حاولنا نتكلم معاها ونعرف إيه الي وصلها للمكان دة..

أنا أول ما فتحت عيني لقيت ناس كتيرة جداً حواليا ومش عارفة أنا فين، بس حمدت ربنا إني قدرت اطلع من القبر دة وكمان قادرة اتنفس واتكلم، سألوني على الي حصل بس مكنش على لساني غير كلمة "عايزة ماما"..

عيني جت بالصدفة على ورق النتيجة الي متعلق في غرفة العناية
المركزة وبصيت في التاريخ لقيت ان النهاردة السبت!!

يعني اديلي يومين في القبر، حاسة إني بلعت كمية تراب رهيبه،
بس قدرت احكيلهم عن كل الي حصل قبل الواقعة وقولتلهم إني
شربت كوباية عصير ونمت، بس مرضيتش احكيلهم عن مشاكل بابا
وعن التهديدات، ودة لأسباب معينة هحكىها بعدين، كل الي قوله
ليهم إني مش فاكدة حاجة غير كوباية العصير، واتظاهرت بأني فاقدة
الذاكرة، وقعدت حوالي أسبوع في المستشفى، حتى الساعة مبقيتش في
ايدي ومش عارفة راحت فين ومين أخذها، وكل ما اسأل حد يقول لا
مشوفتهاش، مكتتش عايزة ارجع البيت، وازاي ماما سمحتله بحاجة
زي كدة؟

طلبت منهم إني اقعد أكثر في المستشفى لأنني لو خرجت مش هعرف
أروح البيت لأنني مش فاكدة حاجة، والمستشفى دي أساساً بعيدة عن
بيتنا يمكن تكون في المحافظة نفسها..

حسيت إن الدنيا بتلف بيا وزوجي بيقولي إنه سابها نايمة بالليل
وصحينا ملقيناهاش، ولما فوقت من الإغماء مستوعبتش إن بتي بعيدة
عني، دورنا عليها في كل حتة وكل مكان، حتى في المستشفيات القريبة
منا ومراكز الشرطة ومفیش حاجة، الغريبة إن في نفس اليوم سمعنا عن

حارس المقابر اتقتل بطريقة غامضة ومحدث يعرف مين الي قتله، كنت بدور على بنتي لوحدي وجوزي مفكرش ينزل من بيته حتى، مكش وراه حاجة غير المخدرات وبس، وفضلت أكثر من شهر أدور عليها بس مفيش ليها أثر، ومفقدتش الأمل إنها في يوم ممكن ترجعلي، حياتنا الزوجية بقت زفت أكثر من الأول ومشاكلنا زادت وزوجي بقى بيات برا البيت بالأسابيع ويرجع آخر الليل مسطول وسكران، في الفترة الأخيرة سييت البيت وروحت أعيش في بيت أهلي، الي تعبوا معايا جداً في البحث عن نسرين، بس أخيراً يشاء القدر إننا نلاقي اسمها في قائمة الي دخلوا مستشفى المنيا العام في المحافظة نفسها، بس قالولنا إنها مشيت وقالت إنها هترجع البيت لما اتأكدنا إنها بقت كويسة !!

ماكتش عارفة ارواح فين لما أخرج من المستشفى خصوصاً إن سني صغير ومليش بيت ارواحه، بس الممرضة عرضت عليا إنها تاخذني في بيتها الي عايشة فيه هي وبنتها بس وجوزها متوفي، وافقتها الرأي وروحت معاها وبقيت مقيمة هناك، مفكرتش إني ارجع البيت لأن عارفة إن بابا هو الي عمل فيا كدة، بس أشك إن ماما شاركتة في الجريمة دي.

بعد مرور ٨ سنوات..

أنا لسة عايشة في بيت الممرضة وبنتها الي كانت من سني كبرت معايا وبقينا أكثر من أخوات، بس الممرضة توفاه الله وسابت لنا البيت لوحدنا، طوال الفترة دي وأنا مكتتش حابة احكي الي حصل لي مع أي حد، وكنت على طول بتظاهر إنني فاقدة الذاكرة، بس جه الوقت المناسب الي هحكي فيه عن الي حصل لي مع أكثر شخص وقف جنبي، وهي "جيهان" .. بنت الممرضة الي اتربيت معاها، وبالفعل لما حسيت اني كملت ٢٠ سنة وبقيت ناضجة وكمآن كملت تعليمي، حسيت وقتها إنني لازم احكي ولازم حد يساعدني في الي هعمله، حكيتها كل حاجة واحنا قاعدين في البيت وأخذتني في حضنها وبدأت تبكي بشكل هستيري، وتحكي عن باباها الي كان بيعاملها معاملة الملوك، بس مات في سن صغير، صحيح كل الأوفياء ييموتوا ويسبوننا..

جيهان كانت خريجة أزهر جامعة أسيوط، وبالرغم من التدنُّن الي كان عندها إلا إنها كانت بتملك شرَّ الدنيا كله لما حكيتها عن بابا، وقالتلي انتي لو منتقمتيش منه انا هروحله بيته واقتله !

ومن هنا بدأ التخطيط في رحلة الانتقام من الأب .. كل الي أنا فكرت فيه وعازياه يحصل هو إنه يدوق نفس الي أنا دوقته وأنا مدفونة حية وبطلع في الروح، وبدأنا نخطط عشان نوصل له، بس أنا مكتتش ناسية عنوان بيتي، وعمري ما هنساه، تفكير جيهان كان مستوى عالي

جداً وخلتني انبهرت من الي هي عملته، راحت سألت عنه في القرية بتاعتنا والناس دلوها عليه، وبالفعل هي وصلته وقالتله إنها موظفة في جمعية قروض وبتحاول تقدم خدمة لي حابين يفتحوا مشاريع، وهو رَحَّبَ بيها جداً ودخلت البيت..

أنا لو كان عليا كنت عايزة اطلع السكينة الي في شنتي واقتله فوراً، بس اضطريت إني اكمل تمثيل في حوار القروض عشان الخطة تمشي تمام، كانت الساعة ١٠ الصبح، دخلت عنده البيت ولقيت أم نسرين قاعدة وملاحها تدي على ٨٠ سنة، بالرغم إن نسرين كانت قايلالي أن مامتها شابة مش كبيرة، بس الحزن أكل ملاحها الجميلة، قعدت معاهم في البيت وأنا بحكيلهم عن مميزات الخدمة وعن سهولة استلام القرض بدون أي ضامن أو فوائد، أنا كل غرضي إني اجمع أكبر معلومات عنه، وبالفعل دة الي حصل، دَوَّنت في الورقة الي معايا كل تفاصيله وأماكن تواجده، وأرقام تليفوناته، ومشيت بعدها مُتجهة لنسرين، والصدمة هنا إني أول ما وصلت البيت ملقيتهاش!

رغم إن نسرين مبتزلش من البيت لوحدها، طلعت موبايلي واتصلت عليها لقيت موبايلا في الشقة هنا جنبي وبيرن، اتطمنت شوية، وبعد ربع ساعة لقيتها جت وكانت بتجيب فطار، قولتها تمام هنصلي الظهر جماعة وبعدين نفطر ونكمل مشوارنا..

أنا حاسس إن البنت دي وراها حاجة، ومش بتاعة قروض ولا حاجة، دي شكلها بتقول أي كلام وتبع شركة نصابة، ولا انتي شايقة إيه؟؟ انتي مبتريش عليا ليه؟

-ولا عمري هطيق إني أخاطبك طول ما أنا متأكدة أن أنتَ السبب ورا اختفاء بنتي نسرين..

-تَقَبَّلَ اللهُ يا ستي.

-مِنَّا وَمِنْكُمْ إِنْ شَاءَ اللهُ.

بصي يا نسرين أنا حاسة إنه لو شافك دلوقتي مش هيعرفك، هو ملاحه اتغيرت ومراته ملاحها اتغيرت كمان، فأحنا كدة هنلعب عليهم براحتنا، بصي يا ستي.. أنا هتصل بيه وأقولُه تعالى علشان تستلم المبلغ اللي أنت طلبتُه من الجمعية، وبمجرد ما يوصل هنقدمله نفس العصير اللي هو قدمهولك، وهنحطله منوم، ولما يشرب العصير وينام ناخذُه نحطه في شوال وندفنه حيّ..

-طيب هندفنه ازاي وفين؟ هنا في المدينة مش زي الأرياف إحنا كدة هنتفضح وهيعرفونا.

-طيب اهدي، أنا هكلم "حازم" زميلي في الجامعة وهقولُه يحيي

بالعريية ونحط أبوكي جوة العريية ونروح لأقرب مكان مقطوع
وندفنه.

كملنا اليوم بتاعنا طبعي وتاني يوم الساعة ١١ الصبح كنت مكلمة
حازم وفهمته كل حاجة وكان متعاطف معنا جداً، وخليته يجي بعرييته
هنا ودخلناه البيت وقعدناه في أوضة لوحده، وفرشنا الصالة على إنها
مقر شركة القروض، واتصلت بأبو نسرين وبعد ٣ ساعات جه ودخل
البيت، استقبلته أنا، نسرين كانت في المطبخ بتحضر العصير لأبوها،
ولما خلصته لقيتها طالعة بيه وبتقدمه لأبوها وبتبص في عينه، بس هو
معرفهاش زي ما أنا كنت متأكدة، نسرين كبرت واتحجبت وملاحمها
انغيرت عن ملامح الطفلة أم ١٢ سنة، قدمته العصير وقعدت جنبي،
وهو عينه منزلتش من عليها بس أنا كنت بتوّه في الكلام، بدأ يأخذ
رشفة من العصير، في الثانية، في الثالثة، في الرابعة، وإحنا قاعدين بننتظر
لحظة إغماءه عشان ننقضّ عليه ونحطه في شوال، بس الموضوع طَوّل
معانا واكتشفنا مؤخراً إن الكحول اللي في جسمه يقلل نسبة مفعول
المنوم، ودة عطلنا أكثر لدرجة إني عشان استدرجه أكثر قومت جبته
فلوس حقيقية وحطيتها قدامه، وجبته شوية ورق عشان يمضي عليه
وبحاول أطوّل معاه في الكلام، وفجأة لقينا عينه بدأت تغيب تدريجياً
لحد ما فقد الوعي خالص ونام مكانه على الكرسي، ندهت على حازم

بسرعة وحطيناه في الشوال، بس مكنش ينفع نخرج ندفنه في النهار، واضطرينا نستنى لليل وحطيناه جوة العربية وروحنا مكان بعيد جداً، يكاد يكون معدوم من البشر، وسواد الليل محاط المكان، طلعنا الكشاف وحازم طلع الكوريك من شنطة العربية، وحفر حفرة كبيرة جداً تسع ٥ أشخاص، وبعدين أخذنا كل ممتلكاته عشان لو حد لقاه ميقدرش يتعرّف على شخصيته، شيلنا المتعلقات الي معاها في كيس أسود وحطيناها في العربية، ولسة هنعطه في القبر لقينا نسرین واقفة بتعيط وبتقول استنوا !!

قولنا لها إبيه تاني مالك؟ قالتلنا طلعهو برا الشوال، استغربنا جداً من كلامها وقولنا دي أكيد حنّت لأبوها ومش عايزة تدفنه، بس اتفاجئنا أكثر لما لقيناها بتقول طلعهو برا الشوال بسرعة وهاتوا الشوال فاضي وادفنوه من غير شوال عشان يحس بنفس الي كنت حاسة بيه، وهنا طلعناه بسرعة من الشوال وحطيناه جوة الحفرة وبدأنا نردم الرملة والتراب عليه، لحد ما اتدفن خالص وأصبح مستحيل أنه يخرج، وركبنا العربية ومشينا، وأثناء ما إحنا راجعين كنا شايفين نسرین بتبكي بهستيرية شديدة، مكناش عارفين دي دموع على الي عمله فيها أبوها ولا على الي هي عملته في أبوها..

أنا معملتش حاجة غريبة، أنا أخذت حقي من بابا الي أنا سكتت

عليه لمدة ٨ سنين، واطمنى إنه ميخرجش من القبر دة لأنه كان من البداية دة مكانه هو مش مكاني أنا، جيهان قالتلي إن أنا هفضل مستمرة في العيشة معاها بس أنا قولتلها إن لازم أشوف ماما واطمنها عليا بعد كل الغيبة دي، قالتلي تمام بس لازم نصبر على الأقل شهر عشان نتأكد أنه مات ومخرجش من الحفرة، وبالفعل بعد شهر كلمنا حازم وقولنا له يجي البيت، ولما جه أخذناه وروحنا مكان الحفرة لقيناها زي ما هي مفيش حاجة متغيرة، دة حتى الطوبة الي كنت سايباها علامة فوق الحفرة كانت زي ما هي ما اتحركتش، معنى كدة إنه مخرجش وأكد خلال الشهر دة زمانه مات، وقتها مشينا مع حازم للقرية بتاعتنا، عشان أخيراً هشوف ماما بعد كل السنين دي، وأول ما وصلنا المنطقة بتاعتنا حسيت بضيق تنفس وكأن أيام طفولتي رجعت، والصدمة الكبيرة إننا لما روحنا البيت بتاعي لقيناه مقفول وفيه قفل كبير على الباب!!

استغربت من القفل دة وسألنا الجيران عن ماما وكان الرد بتاعهم نزل على قلبي زي الصاعقة، ماما انتحرت!!

"عزيزتي نسرين، أنا أعلم إنك على قيد الحياة، ولكن لا أعلم أين أجلك، مرّ على فراقك ثماني سنوات والحزن لم يفارقني، أنا لم أفقد الأمل ولكن عليّ الرحيل الآن، أكادُ أن أرى روحك الطاهرة في السماء فأحتضنها بلهفة، أنا أكتب هذه الكلمات وأنا على قدر كبير من العلم

بأنكِ لن تقرأين كلماتي، أعلم هذا جيداً فلن تعودِي هنا مرةً أخرى حين تقرأين هذا الجواب، إن كنتِ تعلمين .. فأنا اشتقتُ إليك حقاً، فإن كانت الدنيا فرقتنا، فالآخرة تجمعنا، إلى اللقاء ابنتي الجميلة، وغداً نلتقي في سلام وأمان".

حاولنا نفوِّق نسرِين لمدة ساعة وفشلنا في كل محاولتنا، نسرِين بعد ما أصرّت إننا لازم نفتح البيت ودخلنا جواه لقينا الجواب دة في غرفة نسرِين على سريرها، وعرفنا إن الأم انتحرت من شدة حزنها على فراق بنتها الوحيدة، ونسرِين قرأت الجواب وأغمى عليها، الخوف والقلق سيطر علينا وإحنا مش عارفين نصحي نسرِين، واضطرينا ناخذها على المستشفى في عريية حازم، وطلعناها غرفة العناية المركزة، والدكاترة قالولنا إن نبضات قلبها تكاد أن تنعدم لأنها تعرّضت لصدمة كبيرة، وخلال تواجدِها في المستشفى قررنا نروح القرية تاني أنا وحازم ونسأل عن طريقة انتحار أم نسرِين، وبعد البحث المستمر قدرنا نوصل لأقرب حد ليها من جيرانها وقالولنا إنها انتحرت بحبوب الغلّة !!

واتدفنت في مقابر العائلة، ولما رجعنا المستشفى تاني لقينا حالة نسرِين استقرت، وبعد فترة قليلة قدرنا نخرجها من المستشفى ووقفنا جنبها وخليناها تصمد وتبقى قوية عشان تقدر تكمل حياتها..

الحقيقة أنا معتقدش إن فيه حد حياته بائسة أكثر من حياتي، قتلت بابا بأيدي، ماما انتحرت من حزنها عليا، وأنا كنت على وشك الموت لأكثر من مرة، بس بحمد ربنا على كل حال، حرفياً معظم البيوت بتُمرّ بنفس المشاكل دي، وبيكون سببها الأبوين، اتمنى إن حكايتي متكرررش مع حد لأن مش عارفة ازاى ربنا ألهمني الصبر وقدرت اتخطى كل دة، بس هفضل طول عمري مقتنعة بجُملة "دوام الحال من المحال".

"تمت"

"الجرعة الرابعة والأخيرة"

يُذكر أن انتشار تعاطي المُسْكَنَات الورقية من هذا الكتاب قد تسبب فيما يمكن تسميته بـ "وباء الخوف من الخوف" الذي أصاب أعداداً لا حصر لها من الأشخاص، ونتيجة ذلك أدى لوفاة عشرات الآلاف بسبب تعاطي جرعة زائدة من مُسْكَنَات بعد منتصف الليل.
(وجب التنويه).

"قَطْرَ ش"

أول مرة شوفت فيها الجن على هيئته الحقيقية لما كنت في تانية إعدادي..

كُنَّا عيال صغيرة أفكارنا طائشة ومش شايلين هم حاجة، وكنت لسة عامل حساب على الفيسبوك جديد، أنا من طبيعتي بحب الغوامض وبحب اعرف المستخبي واللي محدش يقدر يوصل له، المهم اتعرفت على واحد زميلي في الفصل وكان على طول هدومه متبهذلة وشكله مش ولا بُد، كان بيقد يحكي لي حاجات غريبة بس مكنتش بصدقه وبقول إنه بيخرف، في مرة قالي إن أبوه راجل مشعوذ وبيحضر جن في البيت عندهم وبيجمله زباين من آخر الدنيا، و أم الولد كمان بتساعده في الموضوع دة، وهاملين الولد جداً لدرجة إن كانت ريحته لا تُطاق حرقياً، موضوع أبوه دخل دماغني جامد وكنت عايز اتواصل معاه بأي طريقة، صحيح بالمناسبة أنا خربت بيت أهلي بسبب المواقع الغامضة الي بدخل عليها وبيطلبوا آلاف الدولارات عشان يسمحولي بالدخول، وكنت بدفع من فيزا بتاعة بابا، لغاية ما حرمني من القُعاد على الكمبيوتر أو أي جهاز فيه نت، بس وقت الدراسة كان سايلي موبايل صغير يادوب بيفتح فيسبوك وواتساب بالعافية، المهم .. كلمت

الولد وقولتله إن لازم أروح معاه زيارة في البيت، عشان أقابل والده وأفهم منه شوية حاجات، قالي هاخذلك معاه ميعاد وأبلغك ثاني يوم..

بالفعل جه ثاني يوم قالي بابا رفض!

-رفض ازاي؟ هو بيرفض أي حد عايزه في شغل؟

-لأ بس هو لما عرف إن أنت لسة صغير ماحبش إنك تزوره..

-آه ، طيب بُص .. إعرفلي منه طريقة التحضير وبس، أنا كنت هقابله عشان السؤال ده لكن طالما رفض فأنت أسأهولي وعرفني بكرة قالك إيه!

-ماشني تمام.

وثاني يوم في المدرسة اتقابلنا وقولتله ها عملت ايه؟؟ لقيت الولد اداني ورقة صغيرة مكتوب فيها كلام بخط صغير، لسة هقراها لقيته بيقولي ممنوع تقرأها في أي مكان غير لما تكون لوحده!!

اضطريت إني استنى لحد ما أروح البيت وهبقي أقرأها، ومع نهاية اليوم الدراسي أول حاجة عملتها إني دخلت أوضتي وقفلت على نفسي الباب وفتحت الورقة، لقيت مكتوب فيها ..

"قَطَرَشْ يَحْضَر .. قَطَرَشْ يَحْضَر .. قَطَرَشْ يَحْضَر"

"عليك بذكر هذا الاسم ثلاث مرات في مكان يخلو من الناس، ومن ثم تضع هذا الرمز (ق = & ي = & ن = & =) في خانة البحث في تطبيق واتساب، سيظهر لك نافذة منبثقة تريد منك التأكيد لإتمام هذا الاقتران، ثم اضغط على زر الموافقة حتى يصل الإشعار إلى (الجان قَطْرَش) ومن ثم سيتواصل معك بطريقة غير مباشرة، عليك بضرورة الالتزام بالقواعد فقط."

أول مرة احس إن الموضوع جاد لأن مجاش على بالي إن فيه طريقة للتواصل مع الجن على الواتساب .. إيه يعني هيبعتلي ستيكرات صباحية ومسائية مثلاً !!

أنا هنفذ المطلوب مني وخلاص، يمكن يجي بفائدة وألاقي طلبي هنا، كررت الاسم المذكور ثلاث مرات بالفعل وعملت خطوات الواتساب واتفاجئت إن فعلاً ظهرلي نافذة منبثقة تحتوي على اسم قَطْرَش الجان، مكتتش اعرف إن الواتساب فيه الميزة دي لكن لما وافقت على الاقتران لقيت إنه جابلي تم التأكيد، والمفروض من بعدها يبدأ يظهرلي، ومن هنا بدأت المغامرة المرعبة مع الجن قَطْرَش ..

تاني يوم صحيت كعادتي رايح المدرسة ولسة بلبس في البيت، أول حاجة بدأت احس بيها هو إن فيه نَفَس موجود جنبي، وعلى طول حاسس بسخونة، كنت في عز البرد باخد دش بمياه ساقعة بس كنت

بحسبها بتلسع جسمي، دة غير إن وانا قاعد في الفصل بلمح خيال أبيض بيطير في زوايا السقف، ومكش فيه حد يشوف دة غيري أنا وبس، أما لما رجعت بقى .. كانت الأحداث أصعب وأكبر، كنت بروح على سريري وقت النوم أحس إن فيه حد جنبي بيتحرك، اتغطى واغطي وشي من الخوف ألاقي البطانية بتتشد من عليا بسرعة رهيبية، كنت بحكي لما بابا على اللي بيحصلي دة كله بس كانوا يقولولي "عيب .. أنت كبير مش صغير، اقرأ قرآن وهتنام مرتاح ومطمئن" .. أنا بالفعل كنت بنام مطمئن لما بقرأ قرآن لكن فيه أيام أنا كنت بنسى أقرأ قرآن وأناام على نفسي، ووقت النوم احس إن فيه صخرة كبيرة جداً على صدري ومش بعرف اتنفس منها، حتى صوتي مكش طالع والغريبة إن في الفترة الأخيرة دي بدأت اسمع أصوات حواليا..!

زي مثلاً وأنا في الحمام اسمع همسات من نوعية (ححيح) أو همهمة مستمرة بصوت منخفض، ولما كنت ببص حواليا مكتش بلاقي حاجة، وفي مرة قومت من النوم بالليل عشان ادخل الحمام والنور كان قاطع، وأول ما فتحت الباب ودخلت لقيت قطعة سودة كبيرة جداً قاعدة على قاعدة الحمام وباصالي وعينيها منورة وبتلمع، صرخت جامد وخرجت برا الحمام، ولما أهلي جُم قولتلهم إن فيه قطعة جوة بس لما دخلوا عشان يشوفوها ملقوش حاجة!!

طيب هو أنا قريت الاسم غلط؟ عملت الخطوات بشكل مش

صحيح؟ ليه بيحصلي كدة أنا كان غرضي إني اشوفه وبس، يمكن ألاقى فيه اللي ملقيتهوش في أصحابي، وبعد عناء كبير قولت للولد ابن الدجال دة يعرف أبوه إن بيحصلي كوارث بسبب الرموز اللي خلاني اكتبها دي، ولازم يجيلي طريقة عشان أبطل كل دة، وبالفعل تاني يوم لقيته جاييلي ورقة، والمفروض افتحها في البيت وانا لوحدي، اليوم الدراسي كان بطيء جداً مكنش عايز يمشي، وانا مستني كل دقيقة تعدي عشان أوصل البيت واقراها واخلص من كل دة، وأخيراً اليوم خلص وروحت البيت، وأول ما فتحت الورقة لقيت فيها كلمة واحدة بس مكتوبة باللون الأحمر..

"قَطْرَش"

مستفادتش حاجة من الاسم دة ومعرفتش المفروض اصرفه ازاى، واليوم عدى طبعي بكل الحاجات اللي بتحصل الي أنا أساساً اتعودت عليها، وجه وقت النوم، قرئت قرآن ونمت، بس حسيت إني نمت كثير قوي ساعتها ومكتتش حاسس بنفسي، ولما صحيت حسيت بسخونة رهيبة في جسمي وألم شديد واحتقان زور وكنت بموت، واضطريت آخذ إجازة مرضية من المدرسة ومروحتش، فضلت أبكي وانا على السرير ومش عارف كل دة بيحصلي ليه والمفروض يخلص امتي، وغمضت

عينيَّ ونمت تاني نوم عميق، ولما صحيت فتحت عيني على حاجة غريبة جداً، لقيت شخص ضخم لابس عباية سودة وواقف قدامي، ومش باين منه غير عينية الي كانت حمراً جداً بلون الدم، وباصصلي بشكل مبالغ فيه، الغريبة إنه كان واقف ومكنش لامس الأرض، كان شبه طائر لأن حركته مكانتش ثابتة، والأصعب والأغرب أنه كان يهمس بصوت خفيف جداً ومرعب ويقول "قَطْرَش حَضَر .. قَطْرَش حَضَر .. قَطْرَش حَضَر .. قَطْرَش حَضَر .."

من الصدمة أغمى عليا، مقدرتش استحمل المنظر ولما صحيت تاني مرة لقيت بابا وماما جنبي وبتعملي كمادات عشان السخونة تخفف، الموضوع مقتصرش على كدة وبس لأ أنا أحلامي كلها بقت كوابيس بالراجلة، وكل مرة بيطهرلي بنفس العباية السوداء ونظرة الغضب والتكشيرة الي على وشه، وشه مليون تجايعد كأنه وش راجل عجوز، وعينه حمراً جداً ولما بيتكلم بتبان أسنانه الصفراء المكسرة، جابولي معالج روحاني بس لما قعد معايا قال إن أنا كويس ومفيياش حاجة، على الرغم من إني كنت طفل صغير وقتها بس اتصرفت تصرف غريب شوية، وهو إني بقيت افتح كاميرا الموبايل واسيب الموبايل فوق الدولااب عشان يصور الأوضة طول الليل وأعرف إيه الي بيحصل، وبالفعل عملت كدة وسييته فوق الدولااب والكاميرا شغالة في اتجاه السرير بتاعي ونمت، ولما صحيت تاني يوم قُمت من السرير بسرعة جيبت الموبايل من فوق الدولااب وهنا كانت الصدمة!!

التصوير كان شغال طول الليل لحد ما يبجي آذان الفجر والكاميرا بتجيب شاشة سودة، كأن حد بيحط صباعه عليها، وبعد الفجر بساعة الكاميرا بتشتغل تاني ويظهر لي صورة الأوضة بتاعتي طيعية، ماكتش فاهم اشمعنى التوقيت دة بالذات اللي الكاميرا بتفصل فيه أو بتجيب شاشة سودة، المغامرة بتاعتي طوَّلت والموضوع بدأ يخرج عن السيطرة ويقلب شر وحاجات أنا ماكتش حابب إنها تحصل، أنا بطلت ادخل الحمام من ساعة ما شوفت القطعة السوداء الكبيرة وهي قاعدة في الحمام، وبطلت أنام لوحدي بسبب الشخص الشفاف اللي بينام جنبي وياخد البطانية مني، دة الموضوع اتطور معايا وبقيت لما بنام في أوضة ماما وبابا معاهم كنت بسمع صوت زراير لوحة مفاتيح الكمبيوتر وكأن حد بيكتب عليها بشكل سريع، والكمبيوتر كان في الأوضة بتاعتي، وكنت بسمع صوت الكمبيوتر وهو بيشغل لوحده ويطفي لوحده، لدرجة إني في مرة كنت مشغل قرآن على الكمبيوتر ودخلت نمت جنب بابا وكلهم ناموا، بس أنا فضلت صاحي وفجأة سمعت صوت القرآن فصل لوحده!!

بدأت اتعب نفسياً والخوف اتملك مني خلاص ومبقيتش عارف أكون متواجد في مكان لوحدي، وبعد ما التعب خلص من عندي ورجعت المدرسة تاني قررت إني أقابل أبو الولد زميلي تاني لكنه رفض المرة دي كمان، ودة خلاني اضطر استنى لآخر اليوم وامشي ورا الولد دة لحد ما اعرف هو ساكن فين بالظبط وأروح لأبوه، وبالفعل عملت كدة

وكنْتُ براقبه من بعيد وشايْفُهُ وهو بيركب الميكروباص قدام وانا ركبت الميكروباص الي وراه عشان ميشوفنيش وكنا ماشيين بالميكروباصات ورا بعض، وعيني منزلتش من على الميكروباص وهو ماشي قدامي وكان السواق بينزل ناس ويركب ناس، وانا عيني بتراقب الي بيحصل ومشوفتش الولد خالص لحد اللحظة دي، والميكروباص الي أنا راكب فيه كل الناس نزلت المحطات بتاعتها ولما السواق سألني نازل فين؟ قولتله آخر الخط، وفضل ماشي لناحية الموقف والميكروباص الثاني قدامي، ولما وصلت الموقف والميكروباصين وقفوا أنا كنت منتظر لحظة نزول الولد من الميكروباص عشان امشي وراه، لكنه مظهرش!!

حرفياً كل الي في الميكروباص نزلوا والولد مظهرش، وأنا متأكد أنه منزلتش في أي محطة من المحطات الي فاتت لأن عيني منزلتش من على الناس الي ركبواوالي نزلوا، سألت سواق الميكروباص على إن فيه طفل في إعدادي كان راكب معاه وكدة وعازب اعرف هو نزل فين، لكنه رد عليا بكلمة قسمتني نصين .. قالي أنا مفيش أطفال ركبوا معايا من ساعة ما تحركت!!!!

أنا متأكد أن الولد ركب معاه ومتأكد جداً جداً كمان، ازاي اختفى؟
راح فين؟ الله أعلم.

كل الي قدرت اعمله في التوقيت ده إني ركبت ميكروباص تاني ورجعت للمنطقة بتاعتي وروحت البيت متأخر، وقررت إن تاني يوم

همشي جنبه ومش هخليه يركب ميكرو باص عشان ميتوهش مني، لكن الصدمة الكبرى لما رocht المدرسة تاني يوم لقيت الولد مجاش!

يمكن دي أول مرة تحصل أنه يغيب، وبالرغم إنه مكنش بيختلط مع حد خالص بسبب إن محدش بيطبقه من ريحته ومن شكله بس لما سألت عليه باقي أصحابي قالوا إنهم معرفوش الشخص ده!!

عجزوني وحسيت إني طفل مشلول أو مجنون من اللي بيحصل، المشكلة إني حتى مفكرتش أسأله عن اسمه ولما وصفت شكله لباقي الطلاب وكمان للمدرسين قالولي إن عمرهم ما شافوا حد بالمواصفات دي .. معقولة كنت أنا بس اللي بشوفه؟؟

طب ومين اداني الورقة؟ أكيد الولد ده مش بشري، أكيد عفريت، رَوّحت البيت وأنا مش مستوعب كل اللي بيحصل، ولما الفصل الدراسي خالص قررت إني اروح أعيش عند جدتي في الأرياف من باب تغيير الجو، وبيت جدتي كان بيت متدين جداً والقرآن شغال فيه ٢٤ ساعة مبيفصلش، كنت مطمئن جداً وأنا هناك ومكنش بيحصل حاجة من الحاجات اللي كانت بتحصل وأنا في بيتي، وزعلت جداً لما الإجازة خلصت وكان لازم ارجع بيتي، ومع بداية الدراسة بقيت اشوف الولد ده بشكل غير مباشر في أماكن مختلفة، ومبيظهرليش غير لثواني معدودة، مرة اشوفه طالع قدامي على السلم وييجري، ولما بجري وراه مش بلحقه، ومرة اشوفه واقف بعيد ناحية الحمامات، لكن اللي أنا متأكد منه

إن الولادة مستحيل يكون إنسان، لأن فيه كل صفات الجن بشراة، لما كبرت ودخلت ثانوي عرفت إني استخدمت الطلسم بشكل غلط وأن مكشش المفروض اعمل كدة، ومع مرور الوقت عرفت إن "قَطْرَش" دة اسم لأحد كبار الجن، وتحضيره بيتم عن طريق التكنولوجيا والأدوات الحديثة والتطبيقات، ويمكن أي حد يقدر يتواصل معاه بأكواد ورموز مختلفة، البيت بيتخلص من كل اللي كان بيحصل فيه تدريجياً ومبقيتش احس بحاجة غريبة، خصوصاً لما الولادة اختفى ومقاش ليه أي وجود، حتى أنا انشغلت بالدراسة والثانوية العامة وفضيت دماغي من الهلاوس والألعاب الطفولية دي، لكن مع دخولي أولى جامعة اتعرفت على شلة أصحاب بيعملوا محتوى على يوتيوب، ومحتواهم عبارة عن زيارة الأماكن المهجورة وتصوير العفاريت اللي بتظهرهم هناك، ودي كانت فرصتي المناسبة إني ألاقى غرضي الحقيقي معاهم، لكن بعد أول مغامرة قلبي مطاوعنيش وقررت إني ابقى في حالي أحسن، خصوصاً إني بدأت اشوف ملامح قَطْرَش من تاني في أماكن مظلمة وكنت بترعب وامشي من المكان بسرعة..

الخلاصة إنك بلاش تجازف بحاجة أنت مش عارف نهايتها إيه، ممكن تنهيك، وممكن تقويك، لكن لو اتعمقت في المجهول .. هتلاقي قَطْرَش مستنيك.

"تمت"

”الجن المنحول“

كُنتُ مقتنع تماماً إن الجنَّ قادر يتشكّل في أي شيء وأي كائن حيٍّ، لكن أول مرة أعرف أنه ينفع يعمل العكس، يعني في العالم بتاعهم فيه ققط وفيه كلاب وفيه حشرات وكل دة من الجن برضو، أنا فاكّر في مرة شوفت صرصار وعلى بال ما جيبب الشبشب وجيت اضربه لقيته اختفى ..

والموضوع دة بيحصل كثير مع فئة كبيرة من الناس ومش بيكونوا عارفين السبب او المصدر اللي بيخلي الحيوانات والحشرات تختفي بالسرعة دي، أحياناً كُنت بقول إن هو نفسه الكائن قادر يتشكل في صورة إنسان أو حيوان زي ما هو عايز، بس مؤخراً اكتشفت ان باقي المخلوقات والحيوانات دي عادية عندهم، وكون أنك تسمع صوت قطة في البيت عندك وأنت أصلاً معندكش ققط دة أكبر دليل على وجود حيوانات الجنّ، كاميرات المراقبة في أستراليا والنرويج قدرت تلتقط مشاهد مرعبة لكائنات تشبه الحيوانات ولكن بصورة تخوّف شوية، ودة لفّت انتباه الناس وقالوا إن الحيوانات اللي ظهرت في كاميرات المراقبة دي مستحيل تكون زي اللي بنشوفها عادي، وفيه لقطة كانت ممنوعة من التداول واللي كان بنشوفها كان بيحصله حالة ارتفاع ضغط هيسْتيري

وإحمرار الوش وفي الغالب بتؤدي للإغماء المؤقت، اللقطة كانت عبارة عن دُبّ لونه أسود يمشي على رجله بس .. زي البشر بالظبط، ودي كانت أول لقطة غريبة تثير فضول الناس عن الموضوع دة، من بعدها بدأ الحوار يتداول بين الناس وبدأ يظهر على الطبيعة بدون الاحتياج لكاميرات المراقبة، يعني ممكن تبقى واقف مستني ميكروباص في شارع عام وتلاقي فيه كلب يمشي جنبك على رجله بس ورافع إيديه وواقف زيك ويمشي زيك بالظبط، الغريبة أنه مبيكونش خايف، ولو حاولت تبعده عنك بكل الطرق هتلاقيه يقرب منك أكثر، وكان يُقال أنه لو قرب منك جامد ييمدّ إيده بمحاولة أنه يسلم عليك، وأنت لو قلبك جابك بقي مدّ إيدك وسلّم عليه يامعلم متتكسفش.

في عُمان بقي كاميرات المراقبة كانت دايمًا بتجيب حيوانات لونها أسود وعينيتها بتلمع، ودة بالطبع مش كائن طبيعي، دة حيوان من الجنّ، وكان فيه مصادر بتقول إن العين الي بتلمع او بتنور في الظلام دي مابتكونش طبيعية نهائي، ولو الموضوع دة حصل قدامك وشوفت قطة او كلب او دُبّ عينه بتنور خليك متأكد أنه جنّ، فكّرني بموقف حصليّ في مدخل العمارة عندي لما كُنت داخل بعد ما خلصت شغل وطالع على سلم العمارة، لقيت قطة واقفة بشكل مرعب قدامي وبتبص ليا جامد، ونّ عينيتها كان بشكل رأسي مش دائري، يعني كأن فيه رقم واحد

في عينيها، ولما حاولت اهشها مارضيتش تمشي وفضلت ثابتة وبتبرق لي، ساعتها اترعبت ومعرفتش اطلع فوق بصراحة واضطريت استنى برا العمارة بالساعات عشان تخرج، بس مفيش خبر عنها ومخرجتش، لدرجة اني لما دخلت العمارة تاني ملقيتهاش!!

وللتذكير عمارتنا مقفولة من فوق مفيتهاش سطح، يعني مفيش مفرّ غير من مدخل العمارة الي عيني ماراحتش من عليه، ومتأكد إنها مخرجتش .. بس اختفت!!

فيه كلام متداول بين الناس بأنك لو كَبَّيت مياه سخنة في الشارع فأنت كدة من المحتمل تكون أذيت حد منهم كان متشكل بهيئة حيوان خفي، كان فيه حكاية مشهورة من زمان بتقول إن كان فيه راجل في بلد أرياف راجع بيته بالليل متأخر، وكان بيعدي على أراضي زراعية كثيرة وبالصدفة شاف أرانب بتجري ورا بعض قدامه، والدنيا كانت شبه مظلمة، هو طمع فيهم وشال الأرانب دي في شنطة سودة كبيرة معاه وراح بيهم البيت، وأول ما شاف مراته قالها خدي ادبجي دول واطبخيهم بكرة على الغدا، ولما مراته أخذت منه الشنطة السوداء وفتحتها.. اتصدمت ولقّت فيها طوب أبيض!!

الراجل مكانش مصدقها بس أخذ منها الشنطة تاني وقطعها لقي

الطوب بينزل منها وأحجار كبيرة بحجم الأرنب، يمكن دي حكاية بسيطة من حكاوي كثيرة وأغلبها بيحصل مع الناس، وارد جداً يكون حصل معاك في يوم من الأيام أو هيحصل، بس خليك محافظ على الاستعاذة بالله من كل شر ومتفتكرش إن كل حاجة حواليك طبيعية، ومتنساش إن معانا عالم آخر بيعيش على نفس الكوكب ونفس الشارع بتاعك ومش بعيد نفس الاوضة بتاعتك، لأن أصوات القطط اللي بنسمعها جوة الشقة بالليل دي أكيد مش من فراغ، وساعات بنستغرب إن القطة بتاعتنا عايشة معانا لوحدها في البيت ومع مرور الايام بنكتشف إنها حامل، طب دة حصل ازاى وهي مبتخرجش برا؟؟ المشكلة انها لو ولدت هتولد قط أسود بشكل بشع ومريب، بس فيه احتمال ٩٠٪ انها متقدرش تولد والجنين اللي في بطنها بيبقى عبارة عن مادة شفافة، وبمجرد خروجه من رحم القطة بتسبب وفاتها على طول، ودي الحكاية اللي حصلت في إحدى قرى محافظة أسيوط ..

في الغالب إحنا عايشين وعارفين إن كل حاجة خفيّة بتحصل بيبقى مصدرها العالم الآخر، لكن من وجهة نظر ثانية واللي بنحاول نهوّن بيها عن نفسنا وبنقول "تهيئات"، دراسات وبحوث كثيرة بتتعمل عن الموضوع دة وكاميرات المراقبة بتزيد في الغابات والصحاري والأماكن اللي بيتجمع فيها الحيوانات أكثر من البشر، وللأسف بيلاقوا حالات

كثيره جداً غامضة والحالات دي بتتصور فيديو بس بتبقى موجودة على مواقع معينة خاصة بالخفايا دي، ومش أي حد يقدر يوصل ليهم ولكن بالتأكيد الموقع ده ليه صلة بالديب ويب والدارك ويب، وعشان نكون واقعيين أكثر بغض النظر عن المعلومات المرفقة في المقال ده بس حرفياً الموضوع موجود حوالينا في كل مكان واللي عايز اتأكد منه هو ازاى احنا عايشين وسط كل الرعب ده؟ وهل دي حاجة تخوف؟ يعني هما هياؤونا لو سبيناهم في حالهم؟

الموضوع مُريب جداً بس أنت لو عندك حيوان أليف في البيت حاول تجيبه كاميرات مراقبة وتصوره وهو نايم وخصوصاً بالليل، وشوف تصرفاته وشوف مين هيقربله وهيعمل ايه؟!

ومش عايز أصدمك وأقولك إن الموضوع ده اتطور حالياً في استراليا ومعظم الحيوانات الي المفروض هي بتعيش في الغابة فقط بقيت بتظهر في المدن فجأة وكمان بتخط الباب بالليل على السكّان، وأنت لو من سكان استراليا كنت هتشوف ده بعينك وهتشوف الحيوانات وهي بتمشي على رجلها بس زي البشر، علماء البحوث والغوامض قالوا إن الكائنات دي موجودة في كل مكان، بس بتكون موجودة بكثرة في المكان اللي بينعدم فيه وجود الإيمان، فأنت خليك مؤمن بالله ومخلوقاته وقدرته في كل شيء.

ومش عايزك تخاف لو قابلت حاجة زي كدة في وقت متأخر من الليل، دة إذا ماكتتش صادفت حاجة منهم، بس المهم إنك تستعيز بالله في نفس الوقت وتحاول تتجاهل وجود الحيوان أو المخلوق دة، لأنك لو اديتله اهتمام وفضلت مركز معاه مش بس هيلبسك، لأ دة هيبقى متواجد معاك في البيت ويظهر لأهلك وكل الناس الي أنت بتشوفهم لحد ما تبقى مجنون بس بطريقة غير مباشرة..

طبعاً أنت كل دة فاكرني بهيد وبقول أي كلام، طيب ياسيدي تقدر تتأكد بنفسك وتنزل الشارع من بعد الساعة ١٢ بالليل وياريت يكون يوم خميس وصباح جمعة، وأول ما تقابل أي مخلوق قدامك سواء قطة أو كلب حاول تتكلم معاه وتقول أي كلمة، وشوف هيرد عليك بأيه! من المحتمل أنه مش هيبص عليك أصلاً، ودة طبيعي ممكن يكون حيوان فعلاً، لكن ازاى تقدر تفرّق بين الحيوان العادي والحيوان الجن؟ بص يا معلم مبدئياً لو قلبك ضعيف فأنت مش هتعرف تفرّق بين الاثنين، لأنك بسهولة لو شوفت قطة بتنونو هتسييها وتجري، أما لو أنت جريء وقلبك ميّت فأنت محتاج تتعب شوية وتعمل كل التجارب مع الحيوانات، سواء تجربة حركية أو تجربة قولية، يعني ممكن الحيوان يعرفك أنه جن بمجرد ما ترفع إيدك وتسلم عليه، وممكن لما يسمع صوتك هيرد عليك، لذلك أنا بنصحك بأنك تحاول شوية مع الكلاب

اللي بتسرح بالليل متأخر، حاول تكلمهم وشوف رد فعلهم هيكون عامل ازاى، بس لو جراك حاجة أنا مش مسؤول يا معلم.

"تمت"

لقد ظهرَ القرين !! " "

هو إحدانا ينفع نشوف القرين بتاعنا؟

أصل مستغرب من الناس اللي يقولوا إنهم يشوفوه باستمرار وبيتكلموا معاه كمان، وأنا بصراحة نفسي اخلية يظهر واشوف هيعملي إيه، بس اللي مانعني هو قلبي الضعيف، أنا بخاف جداً من أي حاجة غامضة بس فضولي بيخليني عايز استكشف واعرف الحاجات المستخية واللي بتجيب تساؤلات صعبة للمخ، المهم بدون كلام كثير خلونا نعرف قصة واقعية حصلت مع شابة متوسطة السن، الحكاية بتقول إن فيه بنت من محافظة الشرقية عندها قدرة خارقة، وهي إنها بتعرف تتواصل مع العالم الآخر بشكل مباشر وطبيعي.

تحذير: هذه القصة لا تناسب الأطفال أو ما هم أقل من ١٨ عام.

أنا اسمي منة السيد من الشرقية، الحكاية بدأت لما عرفت إن الإنسان بيتولد معاه القرين الخاص بيه، لما كان عندي ١٢ سنة كنت بدور وابحث عن الموضوع وعرفت إن ممكن الإنسان يشوف القرين

بتاعه ويكلمه ويتواصل معاه ويبقوا أصحاب عادي، كلمت كذا حد من أصحابي عن الموضوع ده بس كلهم خافوا وقولت إني لازم انفذ الموضوع لوحدي بدون مساعدة من حد، اتفرجت على فيديوهات كتير لحد ما وصلت لطريقة مضمونة جداً عن حوار رؤية القرين والتواصل معاه، وتاني يوم بدأت انفذ العملية ..

كانت الساعة ٢ بالليل في عز البرد والجو شتا ومطر رهيب، وحصل ماس كهربائي والنور قطع عندنا والقرية الي أنا فيها بقت كلها سواد، قولت هو ده الوقت المناسب لأن رؤية القرين بتبقى أسهل في سواد الليل وخصوصاً من بعد الساعة ١٢ بالليل من ليالي الشتاء، دخلت اوضتي وقفلت الباب عليا وبابا وماما واخواتي قاعدين برا عادي وفاكريني هنام، طلعت مراية صغيرة من الدولاب وشمعة بسيطة خالص وولعتها وحطيتها على المكتب وجبت المراية ووقفت قصاها وفضلت باصة فيها، يقولوا إن القرين بيظهر ويتفاعل مع الشخص تبعه إذا كان هو نفسه عاوز كدة، لكن لو حاسس بخطر فمستحيل يظهر، بمعنى إنك لازم تكون في مكان آمن وقرينك حاسس بأمان وسكون، ووقت الليل هو أفضل وقت للسكون والصمت، فضلت باصة للمراية بدون ما أرمش لمدة دقيقة وبعدين جبت موس صغير وعملت جرح فوق حواجبي وبدأ الدم ينزل على عيني ووشي وبدون ما أرمش بردو، ودي الطريقة الي لقيتها على النت عشان أقدر اتواصل مع قريني، كان صوت الرعد والبرق عامل جو مرعب قوي وقتها، المهم فجأة وبدون

مقدمات لقيت المراية وقعت على ظهرها مرة واحدة، وبعدين اتعدلت ورجعت تاني مكانها لوحدها بردو، أنا حسيت بخوف بس كان لازم أكمل وأوصل للي أنا عاوزاه، وبعدين جه وقت السؤال الي المفروض أسأله وقولت "أنت سامعني"؟

في الأول ملقيتش رد ولا صوت بس بعد دقيقة تقريباً سمعت صوت ضخم جداً يقول "أنا سامعك"، حسيت إن جسمي تلج وقتها وبقيت خايفة جداً ورديت عليه قولتله أنا عايزاك تظهر، طبعاً كل دة وانا باصة في المراية بس شكلي زي ما هو في المراية بدون تغيير، بس وانا بقوله اظهرلي لقيت ملاحي في المراية بدأت تتغير للأوحش، بدأت اشوف ملامح بشعة جداً في المراية وأنا بحرك نفسي وبحاول اقنع نفسي إن دي ملامح في المراية بس مش ملاحي الحقيقية، لحد ما حسيت إن الملامح وصلت لأقصى حد من البشاعة لدرجة إنني طفيت الشمعة لإني مستحملتش أكمل واشوف المنظر دة وحسيت برعب جامد وقلبي بدأ يدق بسرعة وكأن روحي بتتسحب، وعلى قد ما الجو كان برد ومطر بس كنت حرانة جداً وحاسة بسخونة حواليا، الإحساس دة حسيته زمان لما كنا عايشين في شقة مسكونة بالجن والعفاريت بس الي اعرفه إن السخونة دي من الجن مش من القرين، لكن مؤخراً اكتشفت إن القرين أصلاً نوع من أنواع الجن !!.

الجو حواليا ضلّمة جداً وحر وخوف ومش عارفة اعمل إيه واروح
 فين وفضلت صامدة لمدة ٣ دقائق تقريباً وبعدين بدأت اسمع صوت
 بيقول "أنا ظهرت حسب أوامرك"، معرفش جبت الجراءة دي منين
 ورديت عليه قولتله "اظهرلي بشخصيتك مش بصوتك"، ساعتها
 حسيت بحركة مش طبيعية حواليا، ودة أكثر وقت مناسب اني اهرب
 فيه لأن أكثر من كدة روحي هتسحب وهموت، بدأ نفسي يضيق أكثر
 لما بدأت اشوف خيال بيتحرك حواليا وبقيت امشي واخبط في اي
 حاجة في وشي وعازية اوصل لطريق باب الأوضة مبقيتش شايفاه،
 اتعصبت وخوفت أكثر وبقيت اجري بشكل هيسيتري لحد ما حسيت
 بأيّد بتمسكني من دراعى بشكل عنيف، وقتها وقعت وأغمى عليا
 ومحسيتش بحاجة تانية نهائي !!

(الحوار من ناحية الأخ)..

إحنا لما سمعنا صوت كركبة في أوضة منة جرينا عليها وخبطنا الباب
 بس هي مبردش، واضطرينا نكسر الباب وفتحناه ولقيننا منة واقعة
 على الأرض ومتعورة في راسها وبتنزل دم كتير، القرية عندنا مفيهاش
 مستشفى قرية أو مركز طبي بس البيت اللي جنبنا كان قاعد فيه شيخ
 ومراته بس بدون أطفال، لما سمعوا الصريخ بتاعنا جُم وخبطوا الباب
 وفتحناهم والشيخ دة قرر يساعدنا بس أول ما شاف منة لقيت وشه

اتخض كدة وقعد يستغفر ربنا ويقول آيات عشوائية من القرآن، مسحنا الدم من وش منة وربطنا راسها بقماشة مؤقناً لأن الشيخ منعنا من الخروج بيها وقال إنها لو اتعرضت على مركز طبي أو مستشفى حالتها هتزيد سوء، بس إحنا اتخضينا أكثر لما الشيخ كمل كلامه وقال إن حالتها مش محتاجة دكتور، حالتها محتاجة شيخ ورقية شرعية، ولما سألناه ليه قال إن فيه مخلوق متواجد حوالينا ومحدش هيشوفه غيرها، وهي لو فاقت وشافته ممكن يحصلها حالة إغماء ثاني، الحل الأنسب إننا نقرأ عليها قرآن، وبالفعل حطينا منة على السرير بتاعها وغطينا شعرها والشيخ "مسعود" بدأ يحط إيده على راسها ويقرأ قرآن، وكُلْنَا قاعدين حوالها خايفين جداً عليها وبعد مرور ربع ساعة تقريباً لقينا منة بتقوم من مكانها وهي مغمضة عينيها وبتتحرك في اتجاه عشوائي والشيخ ما زال يقرأ قرآن وإحنا باصين عليها ومترقبين حركاتها كويس، قامت من مكانها ومشيت راحت ناحية المكتب اللي في أوضتها ووقفت قدام الماية الصغيرة اللي على المكتب وشاورت عليها بصباها، وإحنا مش فاهمين حاجة بس الشيخ مسعود كان مركز أكثر منا وكنت حاسس إنه هيوصل لحاجة، بدأت منة تشاور أكثر على الماية بشكل هستيري وتحرك إيدها بسرعة كذا مرة ناحية الماية، قام الشيخ مسك الماية وبص فيها وفجأة رماها وصرخ بصوت عالي وقال أعوذ بالله من الشيطان الرجيسيم، وبدأ صوته يعلى أكثر وقالها كذا مرة، بس الغريب إن الماية متكسرتش ..

الأمر الغريب اللي شئت تفكيرنا هو كلام الشيخ مسعود لما قال هاتوا مياه سخنة بسرعة، ولما جبناله المية السخنة مسكها وقرأ عليها قرآن بصوت واطي وراح رماها على المراية، لقينا المراية بتطلع دخان بسيط وبتتبخر، في نفس الوقت سمعنا صوت منة وهي بتتنفس بصوت عالي ووشها كله أزرق وواضح إنها بتتخنق أو حد بيخنقها او كاتم نفسها، الشيخ جاب شوية من المية السخنة وحط على إيده وبدأ يثرها على وش منة، وهي بدأت تفوق وتكح دم وتبص حوالها ومستغربة اللي هي فيه وإحنا واقفين مرعوبين ومش فاهمين حاجة ..

(الحوار من ناحية منة) ..

أنا أول ما فتحت عيني لقيت أخواتي وبابا وماما واقفين والشيخ مسعود جارنا واقف ويقرأ قرآن بصوت عالي، حاسة إن عضم جسمي مكسّر ومش قادرة أقوم، كأن فيه عربية داست عليا، فوقت وبقيت طبيعية خالص واطمنوا عليا والدنيا بقيت تمام، بس لفترة مؤقتة ..

يعني ثاني يوم بالليل وانا في اوضتي بقيت اسمع أصوات حواليا وبحس إني مش لوحدي، مكنتش أعرف إن الموضوع هيوصل لكدة بس كنت عايزة قريني يظهر ومكنتش عاملة حساب السيناريو اللي ما بعد ظهور القرين، كل يوم من بعد الساعة ٢ بالليل احسّ بضيق تنفس وتعب في الجسم وحاجات غامضة بتحصل معايا في الأوضة، أنا كنت

فأكرة إن القرين يحمي صاحب الجسد من الشر ويفضل معاه لحد ما يموت وهو يموت معاه، لكن الحقيقة إنه بغير مسار صاحب الجسد للأسوء، ودة لما بيوسوس له في ودنه عن أفعال بذية، ويفضل عايش حتى بعد موت صاحبه، ويفضل يظهر للناس بشكل صاحبه وطريقة كلامه ولهجته، عشان كدة لو قابلت شخص صدفة واكتشفت إنه ميت من زمان خليك مقتنع إن دة القرين بتاعه!!

(الحوار من ناحية الشيخ مسعود)..

أنا كنت بصلي الفجر وقطعت صلاتي لما سمعت صوت صريخ في بيت الحاج سيد الي جنبنا وروحت بسرعة أشوف فيه إيه ولما فتحولي الباب وشوفت منة وأخواتها مكانوش لوحدهم يا "سُمِيَّة" إنتي بقالك ١٧ سنة زوجتي بس أول مرة اعترفلك الإعتراف دة، أي نعم ربنا مش رايد إننا نخلف بس مؤمن بقضاءه وقدره كويس، وانتي يا سمية مش مراقي وبس، انتي بنتي وحتة مني ولازم أحكيلك كل حاجة، أنا مكشوف عني الحجاب وبشوف الجن والعالم الآخر، وقبل حادث منة الأخير دة هي كانت عندي وكانت بتسألني عن طريقة رؤية القرين بس أنا مساعدتهاش بأي حاجة لأن عارف إن الموضوع خطر، ولما الحادث حصل وروحت عندهم البيت كنت شايف كيان مظلم واقف على بطن منة، وملامحه كانت باينة جداً بنظرات شريرة كلها انتقام،

الظاهر إن منة استدعت القرين بشكل غلط او حَضَرَتْ روح أو جن بطريقة غير مباشرة وبدون ما هي تكون عارفة، لما شوفتُه مسيطر عليها ظهر عليا الخوف واخواتها حسوا بكدة، بس حاولت أكون ثابت على قد ما أقدر وفضلت أقرأ قرآن لحد ما بدأ يتلاشى، وكنت شايفه وهو كاتم بوقها بأيده وعازب يخنقها بس محدش في أخواتها كان شايفها، ولما رشقت عليه مياه سخنة مقري عليها لقيته بعد عنها شوية وفضل واقف بعيد وباصصلي بغضب وانتقام، بس اللي كان حايشه عني هو قرأتي المستمرة للقرآن، ولما منة شاورت بصوابعها على المرآة أنا مسكت المرآة وكانت ثقيلة جداً، وكأن فيه حد دايس عليها بس لما شيلتها وبصيت فيها شوفت ملامح الكيان المظلم بشكل أقرب وكان قمة في الرُعب، منظر معتقدش إن أي حد يقدر يستحمله ولولا إيماني القوي بالله كان زماني ممسوس او مُغمى عليا، ومرضيتش امشي من عندهم إلا لما لاحظت عدم وجود الكيان الأسود دة والجو عندهم بقى تمام، والحمد لله قدرت أحل المشكلة وبقيت على تواصل معاهم لو فيه أيّ مساعدة ..

(الحوار من ناحية منة) ..

من ساعة ما قررت اعمل الكارثة دي وأنا مش على بعضي، وكل يوم فيه مشاكل في البيت وخناقات والصراحة كنت بحس بحد معايا حتى

وانا في الحمام بحس بأيد خفيفة بتلمس رجلي من تحت وآخر مرة كانت النهاردة في النهار لما طلعت غَيَّة الطيور والحمام فوق السطح وقعدت فيها مع نفسي وتفكيري يحيب ويودي وكنت بكلم الحمام والعصافير واتفاجئ بالحمام وهو بينزل دم من عيونه، كانت واحدة بس وقولت أكيد الحمامة دي مريضة بس بالتدريج بقى كل الحمام ينزل دم من عينه واطرعت جداً ونزلت اوضتي وقولت لأخويا على اللي حصل وطلع للسطح ونزل بيقولي الحمام مفيهوش حاجة من اللي انتي بتقوليه !!.

اكتشفت إن الحاجات دي محدش هيشوفها غيري ومحدش هيقنع بكلامي، بعد مرور أسبوع مُعَانَاه ومواقف مرعبة بتحصل معايا سمعت عن أغرب خبر ماكتتش حابة اسمعه، وهو وفاة الشيخ مسعود..

(الحوار من ناحية سميّة زوجة الشيخ مسعود)..

لما جوزي حكالي عن الحادث اللي حصل مع منة وعن إنه مكشوف عنه الحجاب بقيت أخاف اقعد معاه، أنا ست منتقبة ومؤمنة بربنا كويس، بس مواقف الجن والعفاريت بنسمع عنها دايمًا في القرية عندنا، إحنا بلد أرياف أيوة ومش بنخاف من المواضيع دي بس الغريب إن مسعود اتعمّق في موضوع منة والقرين اللي ظهر لها لدرجة إنه استدرج قرينها لحد البيت وبقي بيستخدمه في أعمال الدجل والسحر ولكن

في أعمال الخير وفكّ السحر، مش في أعمال الشر، مسعود زوجي كان أطيب وأحسن راجل في الدنيا وربنا كان راضي عنه ومكنش بيسيب فرض ويحب يساعد الناس، ولكن القرين الي استدرجه وبقي خادم عنده كان شرير، والعشيرة بتاعة القرين دة كانت من أكبر عشائر الشر في عالم الجن، ولكن مسعود كان قرر إنه يتخلص من العشيرة دي بعد ما ياخذ غرضه منهم في مساعدة الآخرين، ولما العشيرة عرفت بكدة وأن مصيرهم يتحرقوا على إيد الشيخ مسعود قرروا ينتقموا منه، وفي يوم من الأيام وإحنا نايمين بالليل سمعت مسعود وهو نايم بيتكلم ويقول "والله لأغلبنكم" وكان بيكرر الجملة دي كذا مرة وكأنه كان في صراع مع حد في الحلم، وجسمه كان بيتنفض جامد، مسعود كان قوي الإيمان لكن ضعيف البدن، أي نعم عمره ٥٨ سنة بس عنده علم يكفي دُول العالم كلها، في الليلة دي وشه بقي شاحب وشعره بقي أبيض بزيادة وشعر إيده وقف وحسيت إن جسمه اتعرض للقشعريرة المزمنة، وكنت خائفة ومتردة اصحيه وأنسب حل هو إني أقوم أجيب مياه سخنة وأبدأ انثرها على أطراف جسمه زي ما كان بيعمل مع المرضى الي شبه الحالات الي زي كدة، قومت بسرعة سخنت مية وجبتها في كوباية ووصلت عنده لقيت وشه ازرق كله ومفيش نفس، وبوقه مفتوح بشكل غريب وفيه دم بينزل من ودانه، صرخت وصحيتيه وبدأت اهز في جسمه بس مفيش حس خالص وميردش، وفجأة فتح عينه جامد بطريقة سريعة وشهق شهقة عميقة وراح مغمض عينه تاني ومات!!.

لفت انتباهي جروح على إيديه ودراعه وأنه فعلاً كان في صراع مع حد منهم، ولكن لما اتصلت بقرايبي وُجُم البيت اكتشفوا إنه كان في صراع وعراك مع عشيرة مكوّنة من أكثر من ٥٠٠ نفر من الجن، وقدروا يتخلصوا منه في وقت نومه، لأنه معيّب ميقدرش يقرأ قرآن وهو نايم، وهما استغلوا الفرصة دي، بس أنا مش زعلانة عليه .. لإني هاخذ حقه وهنتقم، ومش من الجن لأ، من السبب الرئيسي الي كان سبب في كل الي حصل لأهل القرية ..

(الحوار من ناحية منة) ..

أنا ما صدقت خلصت من الي أنا كنت فيه راح ظهري لأعمال سحر من سمية زوجة الشيخ مسعود، بقّت بتعمل أسحار عند دجالين بغرض الضرر والانتقام مني وأخذ حق زوجها، أنا مكنتش عايزة كل دة يحصل ونفسي افهمها كدة، أنا حتى بقالي حوالي شهر بقنع نفسي إن نور المطبخ يطفئ ويشغل لوحده بالليل عشان النور ضعيف، بس ليه اسمع حد بينادي عليا يعني ليسييه؟ أقول تهيّئات مثلاً؟ طب وصوت النفس الي بسمعه على السرير جنبي دة يبقى إيه؟ وباب البلكونة الي كل يوم يفضل يجبّط بصوت عالي ويرعيني، بقيت في عز الحر بنام متغطية بالليل عشان بكون خائفة ..

هو أنا يعني كان لازم أخلي القرين بتاعي يظهر؟! كان يوم أسود والله يوم ما عملت كدة، وسمية مش هتسييني في حالي ولو الموضوع زاد عن حده أنا كمان هعملها سحر واخليها تكره نفسها، بس لما قررت اعمل كدة اكتشفت إن سمية سابت القرية وهاجرت، ومحدش يعرف عنها حاجة، وبدأت الأنظار تختفي من على سمية بس الأسحار الي هي عملتها بدأت تظهرلي وتضرني، وكلمنا كذا شيخ ويحي يعمل رقية شرعية في البيت كله والموضوع يخف شوية وبعدين يرجع أكثر من الأول، ومن أكثر المشاكل الي كان سببها السحر هو إني بقيت اسقط في الدراسة لكذا سنة على التوالي بعد ما كنت شاطرة جداً، وبقيت مكتئبة وبطلت أكل، كمان وصلت لمرحلة إني امسك موس واجرح في دراعي وجسمي وكنت بتلذذ بكدة واستمتع بالوجع والدم، ومحدش كان عارف مكان السحر فين ولا حد عارف يبطله بس كنت مقتنعة وواثقة بـ إن الله سيبطله!!.

الموضوع فضل مستمر معايا والرعب موجود حواليا مش سايبني وكل يوم بالليل احس بأيد بتلمس رجلي وانا نائمة وأطراف صوابعي، وفي يوم صحيت لقيت صوابعي مربوطة بحبل صغير وقومت فكيتها ورميت الحبل، وفي مرة وأنا نائمة حسيت بملمس بسيط على شعري وبصحى مش بلاقى حاجة، ولما بكمل نوم بسمع صوت همهمة جنبي

وكان حد قاصد إنه يخونني، دة غير إن كل شوية اسمع حد بينادي عليا ولما أقول لأخواتي حد بينادي؟ يقولوا لأ، أهلي بقوا مهتمين بيا زيادة عن اللزوم ودة بسبب إني بقيت أقوم وانا نايمة واتصرف تصرفات غريبة !!.

(الحوار من ناحية الأب سيد)..

حسينا إن منة معمولها عمل بس مش عارفين نعالجها، وبدأنا نهتم بيها أكثر عشان كذا مرة كانت بتقوم وهي نايمة تعمل حاجات غامضة وخيفة زي مثلاً في مرة شوفتها خارجة من أوضتها وهي مغمضة عينها وراحت ناحية الحمام فتحت الحنفية وسابتها مفتوحة ورجعت أوضتها تاني ونامت، حتى وهي نايمة بقينا بنسمع صوت شخير عالي بالرغم إنها مكانتش بتعمل كدة في الأول، وآخر مرة صحينا على ريحة غاز في البيت كله والشبابيك كلها مقفولة واتضح إن أنبوبة البوتاجاز اتفتحت بالليل وفضلت مفتوحة لحد ما صحينا والبيت كان كله غاز، قومت بسرعة فتحت شبابيك البيت كله والأبواب بدون ما أعمل أي حركة عشوائية تسبب خدش أو شرز، وقفلت الأنبوبة وروحت اطمئن على الأولاد وكان كلهم مُغمى عليهم واتصلنا بالإسعاف جت أخذتنا كلنا وعملنا جلسة أوكسجين في المستشفى وجينا والموضوع هدي وعدى بسلام، بس الشر الأكبر حصل في الأيام اللي بعدها ..

أنا قدرت أسيطر على العشيرة الي قتلت مسعود، وبقيت اتحكم فيهم زي ما أنا عايزة وكلهم موجودين في بيت الحاج سيد وكل تفصيلة شر بتحصل كانت بسببهم، أنا قدرت احرق البيت كله بالي فيه وقدرة أموتهم كلهم بقدرة مني وكان لازم اختفي عشان محدش يقدر يضربني، أنا النهاردة أخذت حقك يا مسعود من السبب الرئيسي الي كان سبب وفاتك، أنا سميت زوجة الشيخ مسعود والي القرية كلها بتشهد بعظمتي وسلطاني في حق أخذ التار، وقدرة اتخلص من كل فرد من أفراد عائلة الحاج سيد ومحدش عرف إني ورا الواقعة دي، بس خليكُم فاكرين إن كل الي أنا عملته ده كان رد فعل لفعل مش أكثر !!.

تمت"

"روح المغامرة"

إليه اللي كان هيحصل لو مكنتش استخدمت جثث حقيقية في تصوير فيديوهاتى؟

الحقيقة إن أنا وأصحابي شلة منحوسة، واللقب دة بيطاردنا من أيام ما كُنا في ثانوي، كُنا على طول بنسقط في الدراسة، وكُنا بنعمل مشاريع وكانت بتفشل، أخذنا قروض وشغلناها وبرضو فشلنا، مش عارفين إيه السبب وإيه اللي مخلصنا منحوسين قوي كدة، انتهى بينا المطاف لفكرة عظيمة شوية، لكن انتهت بمأساة في النهاية، وبعد أفكار كثيرة عن المشاريع وعن أي حاجة تجيلنا ربح مستمر قررنا نعمل قناة على اليوتيوب، وأخذنا شهر كامل نفكر في محتوى يجيب نتيجة مع الناس ونقدر من خلاله نجيب مشاهدات عالمية، لحد ما استقرينا على فكرة كويسة، وهي إننا كل يوم نطلع كُنا نحكي قصص واقعية عن البيوت المصرية والخيانة واللي بتحصل فيها وجرائم القتل وحاجات من دي، إحنا كُنا ٥ أشخاص، أنا مازن، وأصحابي أيمن ومعتز وأنغام وسارة، وقررنا إن كل يوم هنقعد مع بعض ونناقش القضايا دي ونعمل مونتاج كويس ونرفع الفيديوهات على اليوتيوب، وبالفعل عملنا كدة

والموضوع مشي معانا وسجلنا ٣٠ حلقة وبقينا ننزل حلقة كل يوم، ومع مرور أول ٣ شهور بدأ يميلنا ربح بس كان ضئيل جداً يعني ممكن ٥٠ دولار كل شهر، وعشان نقسم المبلغ على ٥ أشخاص كان يبقى صعب شوية، قررنا نزود المحتوى غموض أكثر عشان نلفت انتباه المشاهدين، واشترينا جثث لعبة كأنهم حقيقيين لكنهم مصنوعين من الاسفنج وللأسف كان سعرهم غالي لأنهم شبه الجثث الحقيقية بالظبط، وكنا بنحاول نقنع الناس إنهم جثث حقيقية وبنحاول نحركهم بالخيط وبطرق معينة مش متشافة..

وفي مرة وإحنا بنصور كُنا حاطين شموع حوالينا ومندمجين في الحكاوي المرعبة في الفيديو، ومرة واحدة الشموع كلها وقعت على الجثث الاسفنجية واطرقوا كلهم وكانت حريقة كبيرة بس قدرنا نسيطر عليها وخرجنا منها بدون إصابات، لكن الجثث اللعبة اتحرقت وبكدة مش هنعرف نعمل فيديوهات تاني، وكمان صعب نشترهم لأن تمنهم مش متوفر معانا، والفيديوهات الي عملناها بيهم كانت جاية مشاهدات كبيرة وحلوة، الموضوع عجبنا وقولنا لازم نتصرف ونحاول نشتر الجثث، بس معتر كانت عنده فكرة غريبة شوية، وقالنا طيب بدل ما نشتر الجثث دي بسعر غالي، ما نجيب جثث حقيقية ببلاش!

ساعتها كُلُّنا بصينا عليه ونظراتنا بتقول "ما تبطل عبط يا عم معتر" .. لكنه لما شرح لنا إن الجثث الحقيقية بتتجاف بسهولة ومن غير فلوس، وكمان ظهورها في الفيديوها هيدِّي واقعية أكثر للناس، خلانا نفكر في الموضوع بعمق شوية، وبالفعل قررنا نخاطر ونعمل كدة، هنستعين بجثث حقيقية نطلعها في الفيديو عشان تحيب مشاهدات، واتفقنا وروحنا المقابر بالليل وقابلنا الغفير قولنا له إننا طلبه تشريح في كلية الطب ولازم نذاكر على جثث حقيقية لأن امتحاناتنا قربت، وهنكتب تعهد على الجثث دي بأننا هنرجعهم سُلام زي ما أخذناهم، وخطينا في جيبه ١٠٠ جنيه وعلبة سجائر واقنعناه إنه يوافق، كُنا رايمين بعربية أيمن، عربية صغيرة بس اهو هتأدي الغرض، وسيننا أنغام وسارة في العربية عشان خافوا ينزلوا، ودخلنا انا وأيمن ومعتز ومعانا الغفير عشان يوصلنا للجثث الي لسة مدفونة من قريب، وشاورلنا على القبر وروحنا حفرنا ولقيننا الجثث فعلاً، الجثث كانوا عبارة عن زوجين لسة متوفيين من قريب، الغفير قالنا إنهم ماتوا بسبب الغاز، الأنوبة فضلت مفتوحة طول الليل وهما اتنفسوا كل الغاز لحد ما جالهم اختناق وروحهم طلعت، ولما طلعنا جثتهم لقينا فعلاً ان وشوشهم لو نها أزرَق ومنفوخة، كان باين إنهم ماتوا بسبب تنفس الغاز، شيلناهم أخذناهم للعربية وكانت الساعة ١١ بالليل، وسيننا الغفير جوة يظبط تراب القبر زي ما كان، وخطينا الجثتين في العربية ومشينا، كنت أنا الي بسوق وأيمن قاعد جنبي وفي الكرسي الي ورا قاعد أنغام وسارة ومعتز، وعلى

رجلهم الجثث، وماشين خافين جداً..

وأخيراً وصلنا للأوضة الي إحنا عاملينها ستوديو تصوير وطينا فيها الجثث، وقررنا إننا نصوّر أكبر عدد من الفيديوهات عشان عايزين ننجز ونرجع الجثث للغير، وطيناهم قدامنا وفتحنا فيديو وقعدنا نتكلم عن الجثث وعن الي بيحصل في المقابر، وفجأة وأحنا بنتكلم لقينا رجل جثة الراجل اتحركت!!

اتصدمننا .. حسينا بحاجة غريبة وقولنا يمكن حد هز الجثة من غير ما ياخذ باله، وكملنا تصوير وبنحكي في الحاجات المرعبة الي بتحصل مع الجثث، وبعد فترة قصيرة سمعنا الجثة بتتنفس!

مكناش عارفين انه فيهم الي بتتنفس بس لما سكتنا مرة واحدة والمكان بقى هادي مسمعناش حاجة، وكملنا تصوير وإحنا حرفياً مرعوبين منهم، وخلصنا أول حلقة والوقت دخل في ١ بالليل، قولنا نسيب الجثث زي ما هما ونيجي بكرة نكمل تصوير، وكل واحد راح بيته وقفلنا الأوضة كويس ومشينا، الأوضة كانت في السطوح تبع بيت كبير واحنا مأجرين منهم الأوضة دي، ومشينا وكل واحد راح بيته، وفي اليوم الثاني كلمنا بعض واتقابلنا تحت البيت، وقولتلهم أنا حلمت حلم غريب جداً، حلمت إن إحنا قاعدين بنصوّر والجثث معانا ومرة واحدة الجثث قامت تجري ورانا وإحنا سيبنا الأوضة وهربنا، الحلم

خلص بسرعة بس المشكلة اتصدمت لما لقيتهم يقولوا إن هما كان
حلموا بنفس الحلم!!

معرفتش افسر دة بس ممكن نقول صدفة!

وطلعنا للأوضة فوق وإحنا خايفين ومتأكدين إننا هنفتح الباب مش
هنلاقي الجثث، بس لما فتحنا الأوضة ودخلنا لقينا الجثث زي ما هي
متحركتش، معتر قال لأ.. الجثث اتحركت، طب يابني اتحركت ازاى
ما الجثث قدامك اهي زي ما هي، قالنا لأ، إحنا ساييينهم امبارح كان
الراجل من برا والست من جوة ناحية الحيطه، دلوقتي العكس، قولنا له
لأ بقى أنت أكيد مبصيتش كويس وإحنا ماشيين، قعد يحلف ويقنعنا إن
كلامه صحيح، ولما كدبناه راح سابنا ومشى من الأوضة، أنغام مشيت
وراه ونزلوا تحت وأنا وأيمن وسارة قررنا نصوّر ونعمل فيديو هات
أكثر مع الجثث قبل ما نرجعهم للراجل، وبدأنا في تصوير فيديو جديد،
ومرة واحدة سمعنا صوت الباب يخبط جامد، قمنا نفتح الباب لقيناه
مش راضي يفتح، وصوت أنغام برا بتقول افتحوا بسرعة معتر خبطته
عربية في الشارع ومات...!!

إحنا سمعنا الجملة دي واترعبنا وخبطنا على الباب جامد من جوة
ومش راضي يفتح، وبالرغم إن الباب كان خشب خفيف إلا إنه في
اليوم دة كأنه باب من حديد أو فولاذ، ولما بصيت ناحية الجثث حرفياً

قلمي وقف لما لقيتهم هما الاتنين بيشيلوا الكفن من على عينيهم وباصين لينا بنظرة حادة ووشهم أزرق ومرعب بشكل غبي، بدأنا بالصراخ بقى والخطب على الباب وبرضو مش راضي يفتح، والأوضة فيها شباك بيص على الشارع والأوضة دي أصلاً على ارتفاع ٨ أدوار، يعني إحنا في الدور التاسع، حوار إن حد ينط من الشباك ده مستحيل لأنه هينزل ميت بالتأكد، حاولنا نصرخ من الشباك بس تحس إن الناس كلها ماتت ومحدث سامعنا، والجث لسة باصين لينا ومبرقين عينيهم، جينا بطانية وحطيناها عليهم عشان نبعد أنظارهم عنا شوية ونعرف نهدى ونصرف في الموقف ده، لكن فجأة صوت أنغام اختفى من برا خالص، نادينا عليها بس مردتش، قولنا أكيد نزلت تتصرف تحت، بس الجث مسكتوش على كدة وبس، لأ دول شالوا البطانية من عليهم وقاموا من مكانهم هما الاتنين في نفس الوقت وفضلوا واقفين باصين علينا، وشالوا الكفن من على جسمهم وبقوا من غير حاجة تسترهم خالص، وشوفنا أثر تعذيب على أجسامهم ومناطق زرقة ومناطق جروح وفيه دم بينزل، وفضلوا واقفين بحركة ثابتة قدامنا، وإحنا الثلاثة محشورين في زاوية الغرفة مش عارفين نتصرف ولا عارفين نعمل حاجة بسببهم، أيمن مستحملش المنظر وسابنا ونط من الشباك ووقع تحت مع صرخة كبيرة كانت نتيجتها الموت..

فضلنا في الأوضة أنا وسارة بس، وسارة دافئة وشها في كتفي ومش عايزة تبص عليهم، وأنا عيني مفارقتش عنهم ومش عايز أغفل عنهم

وعايز اشوف كل تحركاتهم، اكتشفت إن أنا قلبي جامد عن باقي أصحابي، وفي ثواني فكرت في الموت وبقيت شايفه قدامي واثنتين من أصحابنا ماتوا في نفس الوقت قدامنا، وأنغام مش عارفين هي فين يا ترى انتحرت ولا هربت هي كمان ولا حصلها إيه؟ كل اللي قدرت اعمله إني اتحرك ناحية الباب تاني واحاول أخبط عليها وافتحها وسارة لازقة في كتفي لكن للأسف محاولة دون جدوى ومفיש أمل في إن الباب يفتح، وكل ما نتحرك في مكان نلاقيهم باصين ناحيتنا وواقفين بدون حركة، مبقيتش عارف هما فعلاً عايشين ولا ميتين!

أجسامهم وملاحمهم كانت بتقول إنهم ميتين، لكن حركاتهم ونظراتهم بتقول إنهم عايشين، سارة أغمى عليها من الصرخ وهي على كتفي وفضلت لوحدي ومش عارف اتصرف، كل اللي حاسس بيه هو دوخة شديدة وخلاص قربت أقع من طولي ومش قادر استحمل المنظر المرعب دة، وفجأة وبدون مقدمات سمعنا صوت خبط شديد على الباب من برا، وصوت ناس كتيرة جداً بيحاولوا يكسروا الباب، وبالفعل الباب اتكسر في أيديهم وفتحوا الباب ودخلوا علينا بسرعة، وأنا أول ما شوفت نور الشمس من الباب شيلت سارة على كتفي وهربت بسرعة برا الأوضة، لكن فجأة وقفت لما بصيت ورايا ولقيت الناس واقفين في الأوضة باصين على مكان واحد بدون حركة، وقتها سببت سارة على الأرض ورجعت أشوف هما باصين على إيه؟ لقيتهم واقفين باصين على الجثث، المشكلة إن الجثث كانت على الأرض

ولاسين الكفن عادي وشكلهم طبعي زي ما جبيناهم أول مرة، وكأن شيئاً لم يكن ...!

كل اللي جه في بالهم هو إن ازاى أجيب جثث حقيقية في غرفة تصوير؟ لكن اللي جه في بالي كان أهم من كل دة، وهو الكاميرا اللي صوّرت كل الأحداث دي، لأن الموضوع حصل وإحنا بنصوّر ومندمجين في التصوير، وكل الوقت والأحداث اللي حصلت جوة دي متصورة صوت وصورة على الكاميرا، دخلت بسرعة أخذت الكاميرا وطلعت برا تاني، كانت سارة فاقت، أخذتها ونزلنا وسينا الناس واقفين باصين على الجثث وشكلهم مصدومين أو شايفين شيء أنا مش شايفه، وصلنا للشارع العمومي وركبنا تاكسي، وصلّت سارة لبيتها ورجعت أنا لبيتي وفتحت الكاميرا بسرعة، وهنا كانت المفاجأة ..

أثناء ما كُنّا قاعدين بنصوّر عادي سمعنا صوت خبط أنغام على الباب، من بعدها المفروض الجثث اتحركت ووقفوا قدامنا، بس اللي ظهر في الكاميرا إن الجثث متحركتش أصلاً!

وإن إحنا كُنّا كنا بنشور وسط الأوضة زي المجانين والجثث نايمين قدامنا بالكفن، متحركوش نهائي لحد آخر الفيديو، لحد ما الناس دخلت علينا والجثث متحركتش، طب إيه اللي إحنا كنا شايفينه دة بقى؟ ومعتز فين؟ وأيمن وأنغام فين؟ ومين بلغ الناس دي عشان يطلعوا للأوضة،

فضلت فترة منزلش من البيت بسبب الصدمة دي وكل ما يحاول اتصل بحد منهم يديني مغلق أو غير متاح، حتى سارة موبايلها خارج نطاق الخدمة، لكن لما قررت اروح لهم البيت اتصدمت، لقيت فيه عزاء تحت بيت معتر والناس بتقول إنه مات في حادثة عربية، ولما رocht بيت أيمن لقيت نفس الكلام والناس بتقول إنه مات متحر من شباك غرفة، ولما رocht بيت سارة لقيت عزاء كمان، استغربت جداً لأنني سايبها عايشة، بس لما سألت قالولي إن حالتها النفسية مكانش مستقرة في الفترة الأخيرة وكمأن لما اتعرضت لصدمة قوية مبقيتش عارفة تعيش ولا عارفة تنفَس، وجاهلها ضيق تنفس مع ذبحة صدرية وماتت !

كدة مفاضلش غير أنغام، لما رocht بيتها وسألت عنها لقيت أهلها يقولوا إنها متغيبية من حوالي أسبوع، ومحدث يعرف عنها حاجة، وآخر مرة نزلت قالت إنها رايحة تصوّر فيديو مع أصحابها في الاستوديو، ومن وقتها مختفية ومظهرتش !

أمّا أنا..

فأنا مُت من زمان، من ساعة الموقف دة وأنا مش حاسس بأي حاجة، عايش ومش عايش، وبيجيلي ضيق تنفس كثير جداً وحاسس إني في أي وقت ممكن أموت، لو ماموتش من الصدمة فأنا هموت حزين على أصحابي..

ساعات الشغف بياخذنا لحاجات غريبة مبنكونش عارفين هي صح ولا غلط، طب هي هتعمل فينا إيه؟ مبنسألش نفسنا لما اللعبة دي تخلص مين هيموت ومين هيعيش، بمجرد فكرة جت على بال أحدهم، خلصت بوفاة أربعة، والخامس جاي في الطريق، بس تعرف! أنا بحب لعبة الشطرنج جداً، اللعبة دي علمتني أن قبل أي تصرف اعمله لازم ابقى عارف كويس النتيجة هتبقى إيه، هل هتبقى في صالحى .. ولا في صالح المنافس ليا؟

طيب إيه اللي كان هيحصل لو مكتش استخدمت جثث حقيقية في تصوير فيديوهاتى؟

في العموم وقت المجازفة والتضحية مبنكونش عارفين ولا حاسبين الخسائر هتكون إيه، مجاش على بالنّا إن الخسائر هتكون أرواحنا، وإن الجثث هتعمل فينا كدة، روح المغامرة كانت مسيطرة علينا.

صحيح .. اللي يخاف من الدّح ، ميقولش يح .

"تمت"

"انتهت صلاحية المُسْكَنَات"

الآن أخبرني، كيف تسير الأمور معك، أريد أن اطمئن عليك، إذا كنت بخير فأخبرني بصوتٍ خافت، أنا اسمعك وأراك.
(وجب الإطمئنان).

"تَمَّتْ بِحَمْدِ اللَّهِ".

إن أردت أخذ المزيد من الجرعات يمكنك التواصل معي..

عبر الفيسبوك: أحمد طارق التوني.

عبر الانستجرام: dr_horror

عبر اليوتيوب: دكتور رعب - أحمد طارق (Dr.horror).